

# لوقس

خبر یغ بایک هق توهن بری لوقس  
رویت چارا حال عیسی المسیح

## باب 1

### سفاته کات درفد لوقس

- 1 کفد توان تیوفیلوس یغ د حرماتی،  
تنتو توان تاهو ده حال کجادیڼ سمو دالم فواق کیت . کران  
اد بایق اورغ هق کاجچ بوات سورت چارا حال سمو فرکارا نی
- 2 بری اورغ باچ . یاءیت فرکارا ۲ هق کیت سمو بولیو دغر درفد  
اورغ هق نمفق کجادیڼ نی سندیږی . فواق توله هق مولا ۲  
توبیت کی رویت خبر تو .
- 3 امب سندیږی سوده فریقسا کلیه دغن هالوس هالوسی ، سمو  
فرکارا نی ، نق تاهو هق مان هق سجاتی . سبب توله فاتوت  
امب کنا کارغ سمو نی ، بوبوه دالم ساتو سورت انتوق توان .
- 4 بالس تو ، توان بولیو تاهو دغن تنتو کات ، دالم سمو فرکارا  
هق توان بیاس دغر ، هق مان سوغکوه .

### ملاءیکه باوا خبر کفد زکریا

- 5 فد ماس راج هیروود دوق مرینته دالم نکری یهودیه ، اد  
سئورغ املم یهوی ، نام زکریا . دی جانی فواق املم هق اورغ  
فغکیل ابیا . بینی زکریا نام ایصابت . دوا اورغ نی کتورونن

- 6 هارون . لاکي بيني ني ، اورغ هق بتول دفتداغن توهن . سمو  
حکوم هق توهن سوروه يي تورتوت بلالک ، تاء سيلف سکارا .
- 7 تافي انق تاء اد ، کران اليصابيت مندول ، فس تکه تو ، يي کدوا  
فون توا ده .
- 8 فد ساتو هاري ، زکريا دوق بوات عمل دالم بيت المقديس ، سبب  
فواق امام ۲ هق ري سمفي گيليرن کنا ماسوق بوات عمل دسييتو .
- 9 فد هاري تو ، زکريا کنا جمفوت اوندي ، تورتوت عاده امام ۲ تو ،  
کنا ماسوق فاسغ کمپن دتمفت سوچي ، دالم رومه بوات عمل تو .
- 10 تکه زکريا دوق فراسف کمپن دالم ، اورغ زامي هق دوق لوار  
مينتاء دعا سمو سکالي .
- 11 تيبام زکريا نمفی ساتو ملائیکه دوق برديري سبله کانن تمفت  
12 فراسف کمپن . يي فون براس تاکوت ، تافي ملائیکه کات کا يي :  
13 هي زکريا ، مو جاشن تاکوتله ! کران توهن دغر ده ، هق مو  
مينتاء تو . بيني مو اليصابيت نق بوليه انق جنتن ده . فس  
14 مو کنا لتق نام دي يحيا . بيل يي برانق ده مو نق براس  
سوک هاتي سوغکوه ، فس بايق اورغ لاکي نق سوک ربا دغن کران  
15 انق مو تو . توهن نق بري يي جادي اورغ مليا . ارق ۲ اتوا  
بارغ هق بري مابوق فون ، يي تاء ليه ماکن ، فس ، روح سوچي  
هق توهن نق دوق اتس يي دغن کواس فنوه ري فروت اييو  
لاکي .
- 16 فس انق مو ني ، ملائیکه کات ، نق جادي اورغ فيمفين بغسا  
اسرائيل بري فالينغ کليق کا توهن ، رښي هق مريته اتس يي .
- 17 يي نق کي دولو ، سيمفن جالن انتوق رښي ، فس روح توهن  
نق بري يي کواس سروف دغن نبي الياس هق دولو تو . فواق  
جادي باف ، يي نق بري فالينغ بائیک سمولا دغن انق يي . اورغ  
هق تاء سير طاعة کا توهن فون ، يي نق بري فالينغ بوات تورتوت  
هق بتول .

- دي نق بري بڻسا هق جادي ميليق توهن ، دوق سيمفن سيف  
ده انتوق توهن !
- 18 ملائڪه رويت سکت ني، فس زکريا تان دي کات: توهن نق بري  
تندا لاڳو مان، نق بري امب فرچاي؟ امب توا ده، فس بيني  
فون توا جوڳ.
- 19 ملائڪه جواب: اڪو ني جبرائيل، هق دوق دافن توهن سعمور.  
فس توهن سوروه اڪو ماري رويت خبر ني کفد مو. دغرله زکريا !
- 20 موءَ فرچاي فرکارا هق اڪو رويت ني، هق توهن نق بري جادي  
سوڳوه. سابيت تو، مو کنا بيسو، هيڱ سمفي هاري هق  
توهن بري جادي فرکارا ۲ ني !
- 21 تڪه ملائڪه دوق کيچيق دغن زکريا تو، اورڱ رامي هق دوق ننڍي  
دلوار، براس سڪ هاتي، کران زکريا دوق دالم تو لام ساعت.
- 22 فس، بيلا دي توبيت تاءَ ليه کيچيق، بيسو. سماءِ فواق تو فون  
تاهو سلالو کات زکريا ني دافت وحي درفد توهن. تافي زکريا  
کنا کيچيق دغن تاغن، مولوت تاءَ ليه برتوتور ده.
- 23 بيلا هابيس کيليران، زکريا فون کليق کا رومه. لفس تو تاءَ لام،  
24 بيني دي اليصابيت لکت فروت. فس دي دوق درومه، تاءَ کي  
کا مان ۲، سمفي ليم بولن.
- 25 فرکتان اليصابيت فون بالس ني: لاني بارو توهن کسياغ بلس  
کا اڪو. توهن بري اڪو تاءَ کنا مالو کا اورڱ هق کيچيق هينا،  
کات اڪو تاءَ ار انق !

### ملائڪه باواءِ خبر کفد سיתי مريم

- 26 لفس فد تو، انم بولن فول، توهن سوروه ملائڪه جبرائيل  
کي کا ساتو کمفوڱ دچغوار کاليل، نام کمفوڱ نصره. ملائڪه  
27 نق برجومفاء دغن سئورڱ انق دارا، هق جاني تونغ دغن اورڱ

- 28 نام يوسف، کتورونن راج داءود. انق دارا تو، نام دي مريم. بيلا ملائكة جومفاء ده دغن مريم، دي کات: سلامت سجهترا له، مريم! توهن بري ده رحمة دي کفد مو، فس دي دوق سکالي دغن مو!
- 29 بيلا دغر فرکتان ني، مريم فون ترکجوت ساغت، فس، دوق فيکير دالم هاتي، سبب اف ملائكة ماري تگور دي لاکو ني.
- 30 فس ملائكة کات کا دي فول: جاغن تاکوتله، مريم، کران توهن بري ده رحمة دي کفد مو.
- 31 مو نق بوليه انق جنتن، فس بيلا برانق ده، مو کنا لتق نام دي عيسى. انق مو ني، نق جادي اورغ مليا. توهن يځ مهاتيځکي نق فځکيل دي انق. توهن هق مرينته فواق مو، نق سره مهکوت راج کفد دي، مهکوت هق تورون درفد نينيق دي راج داءود.
- 33 انق مو ني فون، نق جادي راج اتس سما فواق يعقوب سعمور. فس هق دي جادي راج تو فون تاءاد سود بوات سلام ۲۰.
- 34 لفس تو، مريم تان ملائكة کات: نق جاي بالس مان، فرکارا ني، کران امب ني انق دارا لاځي؟
- 35 ملائكة فون جواب: روح توهن يځ مهاتيځکي نق تورون اتس مو دغن کواس دي. سبب توله، مو نق بوليه انق هق سوچي، گلران دي انق توهن.
- 36 فس دغرله مريم، کات ملائکت، مق سودارا مو اليصابيت هق توا ده فون، نق بوليه انق جوځ. لاني، دي هق اورغ کات مندول تو، فروت بسر انم بولن ده، کران دغن توهن تاءاد سکارا هابوق، هق دي تاءليه بري جاني!
- 38 فس مريم کات فول: امب نق سره ډيري کا توهن سمات ۲۰. بري جاديله کا امب، سروف هق مو کات تو! لفس تو، ملائكة فون تيځگل کي.

## سيتي مريم تويت گي زياره اليصابيت

- 39 لفس فد تو، مريم برسيمفن دير، فس تويت گي گادوه ۲  
کا ساتو کمفوڊ دتغه بوکيت، دالم چٿوار يهوديه .
- 40 بيلا سمفي ده، يي ماسوق دالم رومه زکريا، هق سبوت تادي  
فس بري سلام کا بيني زکريا، اليصابيت تو.
- 41 با دغر سوارا مريم تو، انق دالم فروت اليصابيت فون گلفر،  
فس روح توهن توروون اتس مق يي دغن کواس فنوه، بري يي  
کات دغن سوارا درس:
- 42 هي مريم، مو بولييه رحمة لبيه فد اورځ بتينا لائين سموا.  
فس، انق مو دوق کندوځ فون، يي نق بولييه رحمة بايق،  
سروف تو جوڳ.
- 43 اکو حيران، توهن بري جاي فرکارا ني کا اکو!  
سبب اف مق رټي کو ماري زياره کا رومه کو ني؟
- 44 بيلا اکو دغر سوارا مو سائي، اليصابيت کات، انق کو  
دالم فروت گلفر دغن سوک هاتي.
- 45 مو براونتوځ سوځکوه، مريم، کران مو فرچاي ده، هق  
توهن نق بوات کفد مو، دغن تاسک هاتي!

## مريم سنديري فوجي کا توهن

- 46 فس مريم کات:  
اکو فوجي رټي کو دغن سوځکوه ۲ هاتي،
- 47 اکو براس سوک ريا کران توهن بري اکو سلامت،
- 48 سبب توهن دوق فادول کا اکو، همب يي هق رنده  
سکالي. جق دهاري ني، سموا مائسي نق ايشت  
نام کو، کات اکو بولييه اونتوځ سوځکوه!
- 49 کران توهن هق مهاکواس سوده بوات فرکارا بسر کا اکو.

50 دپاله توهن يځ سوچي! ښي تنجوق کسياغ بلس  
کا سموا ماءنسي هق مځاکو کا ښي دغن سوځکوه ۲  
هاتي، امبيق دماس توء نينيق دولو، ماري سمفي  
کا انق ۲ چوچو ښي.

51 توهن هولور تاغن بري نمفق کواس ښي اتس اورغ  
هق اغين تيځکي، بري مځه سليرق تابع،  
سکالي دغن هق ښي اغن ۲ تو.

52 راج ۲ هق بولييه کواس فون، توهن بري جاتوه  
فريځکت ښي، اورغ رنده فول ښي اغکيت ناءک.

53 اورغ هق هاتي ښي براس لافر، توهن نق بري کيځ  
دغن بارغ هق موليقي. اورغ هق ار بلاک ده،  
ښي سوروه کي دغن تاء باواء اف.

54 سموا هق توهن جنجي کا توء نينيق کيت،  
ښي بري جادي بلاک. اورغ اسرائيل هق جاني  
همب ښي، ښي دوق تولوغ سممور.

55 ښي تاء لوف کسياغ بلس ښي کفد ابراهيم،  
سکالي دغن سموا انق ۲ چوچو ښي بوات سلام ۲.

56 لفس فد تو، مريم دوق برادو درومه اليصابيت، لبيه کورغ  
تيځ بولن، بارو کليق کا رومه ښي.

### اليصابيت برانق کا ښي يحي

57 بيلا اليصابيت سمفي بولن، ښي برانق بولييه انق جنتن.

58 ساءين ۲ کمفوغ دغن اديق براديق ښي، بيلا دغر خبر ښي،

ښي فاکت فوجي توهن کات: توهن تورون رحمة سوځکوه کا  
اليصابيت ښي. سموا اورغ فون سوک هاتي بلاک.

59 لفس فد برانق لافن هاري، کنا برسونت بوق تو. فس اديق

- براديق سموا هق ماري كا رومه، فاكٽ لٽق نام كا بوق ني،  
 زكريا، توروٽ نام چيئي.  
 60 تافي مق ني كات: تاليه! كنا لٽق نام يحياء.  
 61 اديق براديق فون تان دي: باء اف كات بالس تو؟ تاءار سئورغ  
 هابوق دالم فواق كيت نام يحياء!  
 62 فس سموا اورغ فاليغ تان چيئي، نق لٽق نام اف؟ كنا تان  
 63 دغن بوات تاغن، سبب زكريا بيسو لاگي. زكريا فون سوروه  
 امبيق لوح باتو، فس دي تولىس كات: نام ني يحياء.  
 64 سموا اورغ تو فون براس حيران. تغه ۲ زكريا دوق تولىس تو،  
 دي بوليه كيچيق سلالو، فس دي فون اوچف تريما كاسيه كا  
 توهن سلالو.  
 65 بيلا نمفق كواس توهن بالس تو، سموا اورغ دسيٽو براس  
 تاكوت سوغكوه، فس خبر كجادين ني تاهوگي كا سموا تمفت  
 دالم بوكيت، دچغواد يهوديه تو.  
 66 اورغ هق دغر ده كجادين ني، تاءترلوف، فس، كيچيق سام  
 سنديري كات: تنتو بوق ني نق جاني اورغ بسر ماس دافن!  
 كران بوليه نمفق كواس توهن دوق اتس بوق ني.

### فركتائن هق روح توهن بري كد زكريا

- 67 فد هاري تو جوگ، روح توهن توروٽ اتس زكريا، بري دي  
 كواس بوليه رويت فركتائن ني:  
 68 ماريله كيت، فوجي توهن هق مريٽه اتس اورغ اسرائيل!  
 كران توهن سوده ايغت كا همب ۲ دي.  
 توهن سوده سيف جالن نق بري كيت سلامت.  
 69 دي بري سئورغ جوو سلامت، هق اد كواس نق تولوغ كيت.  
 جوو سلامت ني كتورونن فسوروه توهن، راج داءود.

- 70 فس توهن سوده رويت حال كجادين ني دولو ۲ لاکي،  
کا فواق نبي ۲ ي هق سوچي.
- 71 توهن جنجي ده دغن کيت کات: کيت نق بوليه سلامت  
درفد سترو ۲، کيت نق بوليه لفس دالم کځگامن تاغن  
اورغ بنجي کا کيت.
- 72 بالس توله، توهن نق بري رحمة بسر، هق ي جنجي  
کا تو نينيق کيت دولو. توهن تاء ترلوف فرجنجين دي  
يغ سوچي، هق ي برسومغه دغن ابراهيم تو نينيق کيت.
- 73 فس بيلا کيت لفس ده دالم کځگامن تاغن سترو ۲،  
توهن نق بري کيت طاعة کا دي دغن تاء کنا تاکوت کا اف ۲.
- 74 ي نق بري کيت جادي اورغ بتول، هاتي سوچي،  
هق بوليه دوق دافن توهن سعمور هيدوف.
- 76 فس زکريا کات:  
هي انق کو! اورغ نق فځکيل مو  
نبي توهن يغ مهاتيځکي، سبب توهن نق سوروه مو  
کي دولو سيف جالن انتوق دي.
- 77 مو کنا باواء خبر کا اورغ هق جاي ميليق توهن،  
کات ي نق بوليه سلامت کران توهن نق امفون سموا  
کسلاهن دي. سوځگوه، توهن نق تنجوق کسياغ بلس  
کا سموا فواق کيت.
- 79 چهيا توهن نق تورون ماري کا فواق کيت، سروف  
متهاري ناء يک فاکي، بري چره کا اورغ هق دوق دالم  
کلف، سمفي کا اورغ هق دوق تاکوت دالم چله موت فون.  
دياله هق نق فيمفين کيت کي کو جالن هق بري سلامت!
- 80 انق زکريا فون کهور ۲ بسر، فس کهور ۲ اد کواس دالم هاتي.  
فس، ي کي دوق دالم لاءوت فاسير هيځک سمفي ماس دي کنا  
تنجوق ديري دافن اورغ رامي.



عيسى برانق دكمفوغ بيت لاهيم

باب 2

- 1 ماس تو، قاءيصر اگستس جادي مهاراج بسر اتس سموا نكري هق دوق دالم فرينته روم. دي بوات اوندغ ۲ ني کات: سموا نكري هق دوق دالم فرينته مهاراج روم کنا ماسوق نام رعيت ۲ دي دالم سورت کبون دافور.
- 2 جادي تاهون هق کراجان روم مولا ۲ سوروه رعيت ۲ ماسوق نام بالس تو. فد ماس تو، کرينيوس جادي منتری روم هق مرينته دالم نكري سيريا.
- 3 سموا رعيت ۲ فون کنا کي ماسوق نام دتمفت اصل توء نينيق دي.
- 4 يوسف هق جادي تونغ مریم سائي فون، کنا کي جوگ، امبيق دكمفوغ نصره، دچغواد کاليل، کي سمفي کا کوت راج داءود، توء نينيق دي، نام کمفوغ بيت لاهيم، دچغواد يهوديه.
- 5 دي کي ماسوق نام سکالي دغن تونغ دي سיתי مریم. ماس تو، مریم تغه دوق مغندوغ.
- 6 تکه دي برهنتي بوبوه نام دكمفوغ بيت لاهيم تو، مریم سمفي بولن. دي فون برانق. دسيتو، بوليه انق جنتن هق سولوغ فس دي بدوغ انق کي لتق دي دالم تفت بکس ماکن رمفوت لمبو، کران تفت نق سيوا تاءاد ده دسيتو.

فواق فيرا بيریغ ۲ دغر خبر حال عيسى

- 8 تکه تو، ار سفواق اورغ فيرا بيریغ، دفاغ ۲ دکت کمفوغ بيت لاهيم تو. دي دوق جاگ کاون ۲ بيریغ هق دي، فد وقتو تغه مالم.
- 9 تيبا ۲، دي نمفق ملايکه تورون دغن چهيا کمليان توهن دوق چره چراچ دتمفت دي. دي فون ترکجوت ساغت.
- 10 تافي ملايکه کات کا دي: جاغن مو تاکوتله! سبب اکو ماري

- رويت خبر هق باءيك كغد مو، نق بري سماو اورغ اسرائيل  
11 سوک هاتي سوځکوه. کران فد مالم ني، دالم کمفوغ داءود، ار  
بودق هق بارو برانق. دي نق بري فواق مو سلامت، دياله  
المسيح، ربي مو!
- 12 مو بوليه کنل دي دغن تندا ني، ملائیکه کات، بيلا مو تمو  
دغن بودق هق دوق يدوغ، تيدور دالم تمفت بکس ماکن  
رمفوت لمبو، جيلا دي!
- 13 تيبا ۲ اورغ فيرا پيريغ تو نمفق ملائیکه کهور بايق لاکي، فواق ۲  
هق تورون دشرک ماري برهيمفون دسيتو بلاک. سماو تو  
دوق فوجي توهن کات:
- 14 فوجيله کا توهن يغ مهامليا، داتس شرک هق  
تيغکي سکالي! مائسي دنيا فون نق تريما  
سلامت جوگ، کران توهن کاسيه کا دي!
- 15 بيلا فواق ملائیکه تو ناءيك کليق کا شرک ده، فواق فيرا پيريغ  
سائي، دوق کيچيق سام سنديري کات: باءيك کيت کي کابيت  
لاحيم سلالو، نق تيغوق فرکارا هق توهن سوروه ملائیکه ماري  
رويت کا فواق کيت ني!
- 16 فواق دي فون فاکت ۲ کي برلومبا ۲ کا بيت لاهيم، فس تمو دغن  
مریم دوق دوا يوسف سکالي دغن بودق کچيک تو، دوق  
تيدور دالم کائين بدوغ، دالم تمفت بکس ماکن رمفوت لمبو.
- 17 بيلا تيغوق ده سماو ني، فواق فيرا پيريغ فون رويت فرکتان ۲  
هق ملائیکه رويت کا دي دولو چارا حال بودق ني.
- 18 سماو اورغ فون براس حيران دغر چريتا اورغ فيرا پيريغ سائي.
- 19 مریم فون دوق ايغت تاروه دالم هاتي، هق جايي اتس دي.  
فس دوق فيکير اف معنا سماو ني.
- 20 لفس تو، فواق فيرا پيريغ ۲ سائي، فاليع کليق کا تمفت دي.  
تغه ۲ دي برجالن کليق تو، دي دوق فوجي کمليان توهن،

نغن کران سموا فرکارا هق فواق ني بوليہ دغر، بوليہ تيغوق،  
فد ماس تو. سموا فرکارا ني فون جادي سروف ملائیکه رويت  
بلاک.

### عیسی برسونت عمور لافن هاري

21 لفس فد تو چوکوف لافن هاري، سمفي کا هاري کنا برسونت  
بودق تو. فد هاري تو، ني لتق نام عیسی اتس بودق تو،  
یاءیت نام هق ملائیکه رويت کا مریم، بلوم ني لکت فروت  
لاکي.

### ني باواۑ انق ني مڭهانف توهن

22 بیلا سمفي ده ماس هق اییو بارو برانق بوليہ کیرا کات  
چوچي، توروت حکوم دالم تورات نبي موسی، یوسف نغن مریم  
فون باواۑ عیسی کي کا بیت المقدیس رجروسلیم، انتوق باواۑ  
ني مڭهانف توهن، نق توروت حکوم توهن هق کات:

23 انق سولوڭ هق جنتن، تیف ۲ اورڭ کنا کي سره کا توهن.

24 لفس تو، ني بري بوروڭ بوات قربان، توروت حکوم توهن،  
یاءیت بوروڭ مرفاتي سکو، اتوا بوروڭ برکوکور دوا ایکور هق  
موا.

25 فد ماس تو، اد سئورڭ نام صیميون دوق دکوت جروسلیم.  
ني اورڭ هاتي بتول هق طاعة کا توهن سوڭکوه، فس ني دوق  
ننتي ماس هق توهن نق بري اورڭ اسرائیل دي سلامت. اورڭ  
ني، روح توهن تورون کا ني بري ني تاهو کات، بلوم فد دي  
ماتي، ني بوليہ تيغوق المسيح هق توهن جنجي نق هنتر تو.

26 27 فد هاري تو فون، روح توهن فيمفين صیميون کي کا بیت  
المقدیس، فس بیلا اییو باف عیسی باواۑ دي ماسوق، نق بوات

- هق توهن سوروه تو، يتولن دغن صيميون سائي .  
 28 صيميون فون امبيق بودق تو فوندوغ، فس ري اوچف تريما  
 كاسيه كا توهن كات :
- 29 يا توهن، ربي كوا! هق توهن جنجي تو جاي ده!  
 لاني توهن بوليه بري اكو لفس كي دغن هاتي سنغ،  
 30 کران مات اكو کليه ده، ري هق توهن هنتر ماري،  
 31 نق بري کيت سلامت. لام ده، توهن سوده سيف  
 جالن نق هنتر ري ماري، فس توهن سوده رويت  
 32 دولو، بري اورغ سموا بغسا تاهو کات، دياله سروف  
 چمپيا، هق بري سموا بغسا تو بوليه نمفق جالن  
 سلامت هق توهن! فس ري نق بري بغسا اسرائيل  
 کيت جاي مليا سوغکوه!
- 33 ايبو باف بودق تو حيران دغر هق صيميون کات سائي چارا  
 حال انق ري.
- 34 لفس تو، صيميون مينتاء توهن بري سلامت اتس ري کدوا تو،  
 فس ري کات کا مريم، مق عيسي تو: انق موني، توهن سوده  
 فيليه انتوق بغسا اسرائيل کيت. کران دياله، بايق اورغ نق  
 بناس، فس بايق اورغ لاكي نق بوليه سلامت. انق موني  
 جاي تندا درفد توهن، تافي بايق اورغ نق لاون دغن ري  
 جوگ، بري تاهو فيکيران دالم هاتي فواق تو.
- 35 فس هاتي مو سنديري، مريم، نق براس دوک چيتا، سروف کنا  
 تیکم دغن کريس، دغن کران انق موني!
- 36 فس اد سئورغ لاكي، اورغ بتينا نام حنه انق فنوئيل، کتورون  
 اشهور، هق بياس تريما خبر درفد توهن جوگ. عمور ري  
 بايق ده. ري دوق دغن لاكي توجوه تاهون، لفس تو دوق  
 بوجغ، هيگک سمفي عمور لافن فولوه امفت تاهون ده. ري  
 تايگکل بيت المقديس سمور.

- 37 ڊي ڊوق ٻوات عمل ڊسيتو، سياغ مالم، فس ڊي راجين فواس  
ڊغن مينٽاء ڊعا گاتيڻ. تڪه تو جوگ، حنه ماري تمو ڊغن  
عيسي، فس حنه فون اوچف تريما ڪاسيه ڪا توهن جوگ.
- 38 لفس تو، ڊي ڪي رويت چارا حال عيسي ڪا اورغ ڊڪوت جروسليم  
تو، هق ڊوق هارف ڪات توهن نق توروڻ سلامت ڪا بفسا ڊي.

### عيسي ڪليق ڪا ڪمفوغ نصره

- 39 بيل ايبو باف عيسي ٻوات ده، سموا فرڪارا هق حڪوم توهن  
سوروه تو، ڊي برجالن ڪليق ڪا نڪري ڪاليل، ڪا ڪمفوغ ڊي نصره.
- 40 عيسي ڊوق سیتو هيڱگ سمفي بسر. توبوه ڊي فون ڪاڪه،  
اوتق ڊي فون ڪهور ۲ فنڊي ميڪير، فس رحمة توهن ڊوق اتس  
ڊي.

### عيسي ڪي ڪا بيت المقدس عمور دوا بلس تاهون

- 41 هاري راي فسخر هق اورغ يهودي، ڪنف ۲ تاهون، ايبو باف  
عيسي ڪي زياره ڪوت جروسليم توروڻ عاده اورغ يهودي.
- 42 بيل عيسي سمفي عمور دوا بلس تاهون ڊي فون ڪي سڪالي ڊغن  
ايبو باف ڊي.
- 43 هابيس ده ڪرج هاري راي تو، فواق ڊي فالينغ ڪليق ڪارومه فول  
تافي عيسي ڊوق برهنٽي ڊڪوت جروسليم لاڳي. ايبو باف ڊي  
فون تاء تاهو. ڊي ڪامق ڪات انق ڊي ڊوق ڊالم فواق هق  
ڪليق سڪالي.
- 44 ڊي برجالن ڪي سهار ڊي، بارو چاري عيسي ڊالم فواق اڊيق  
براديق، ساءين ۲ ڊي. بيل تاء تمو، ايبو باف ڊي فالينغ ڪي
- 45 سمولا، چاري عيسي ڊڪوت جروسليم. ڊي ڊوق چاري سمفي  
تيگ هاري، بارو تمو ڊغن عيسي، ڊوق ڊالم بيت المقدس،
- 46 سڪالي ڊغن فواق ڪورو بسر. عيسي ڊوق سءال جواب ڪي ماري

- 47 دغن گورو ۲ تو . سمو اورغ هق دغر براس حيران ، سبب عيسى  
فندي جواب سوءالن هق فايه ۲ تو .
- 48 ايو باف دي فون حيران جوگ ، بيلا نمفق عيسى دوق دسيو  
تو ، فس مريم تان عيسى کات : باء اف ، انق بوات کا مق فق  
بالس ني ؟ اكو کدوا سوسه هابيس ۲ چيکف ، دوق چاري مو !
- 49 عيسى جواب کات : باء اف مق دوق چاري کوء لائين ؟ مق تاء تاهو  
که ، امب کنا دوق سيني ، دالم رومه باف کو ؟
- 50 باليق ايو باف ، دي تاء فهم مقصود هق عيسى کات تو .
- 51 لفس فد تو ، عيسى کليق دغن ايو باف دي کي کا کمفوغ نصره ،  
دودوق دالم فرينته ايو باف سعمور . مق دي فون ايغت تاروه  
سمو کجادين ني دالم هاتي .
- 52 عيسى فون کهور ۲ بسر ، کهور ۲ برعقل سعمور . سمو اورغ  
برکن کا دي ، فس توهن فون برکن جوگ .

### باب 3 نبي يحييا توبيت ماري دغن روکون مندي بفتيزما

- 1 فد ماس تو ، مهاراج روم نام تبيريوس دوق مريته سمو  
نگري دي ليم بلس تاهون ده . اورغ روم نام فونتيوس فيلاتوس  
جاي منتري روم دالم نگري يهوديه . هيرو جاي راج دنگري  
کاليل ، فس فيليف ، اديق هيرو فون ، جاي راج دوا نگري  
هق کچيک ، ايتوريا دغن تراخونيتيس . فس سئورغ لاکي نام  
لوسانيوس ، جاي راج دنگري ابيلين فول .
- 2 امام بسر هق سمو نگري ۲ اورغ يهودي ني ار دوا اورغ ، نام دي  
حتاس دغن قيافس . سمفي ده ماس ، توهن نق تورون خبر  
دي بري کا يحييا ، انق زکريا ، تکه دي دوق دالم لاءوت فاسير .
- 3 بيلا يحييا تريما ده خبر دغد توهن ، دي توبيت کي سرو خبر  
تو ، سمو کليواسن دغفي سوغي يردن ، کات : مو کنا توبتله ،  
تريما روکون مندي بفتيزما انتوق نق بري توهن امفون دوسا ۲ مو !

4 ار رويت دالم ڪتاب نبي يعضيا ماس دولو، چارا حال يحييا ني .  
ايات تو کات:

5 بومي سوارا درس دالم لاءِ وٽ فاسير کات : هي فواق سوما!  
سيمفله جالن انتوق ربي . فوتوغ بري بتول جالن ني نق  
لالو . تمفت رنده ڪنا تمبوغ، تمفت بگول ڪنا فرات تورون،  
تمفت ليغئق ڪنا فوتوغ بري بتول،  
6 تمفت برلوبغ فون ڪنا ڪمبوس بري سام رات، فس سوما مائيسي  
نق بوليه مليهت بالس مان توهن نق بري سلامت!

7 بايق اورغ توبيت ماري کا تمفت يحييا، نق تريما روكون مندي  
درفد ري . فرڪٽان يحييا کا اورغ رامي بالس ني :

هي فواق مو سروف اولر بيسا! سياف ني رويت بري مو سغڪ  
کات، مو بوليه لفس درفد مرڪ توهن، هق دڪت نق جاتوه اتس  
مائيسي؟

8 مو ڪنا بائيقي ڪلاڪوان مو هق جاهت، بري بوليه اورغ نمفق،  
بواه ۲ موليق، باروله تاهو کات مو سسل سوغڪوه ڪران دوسا ۲  
مو . جاغن مو سغڪ کات: بلرله، ڪيت ني جايي انق چوچو  
نبي ابراهيم موليق ده! مو نغرله! توهن اد ڪواس بوليه بوات  
باتو ۲ ني جادي انق چوچو نبي ابراهيم ڪنتي مو!

9 ايغٽله، يحييا کات، سمفي ده ماس، هق توان ڪبون نق امبيق  
ڪافق ڪي تبغ فوهون ۲ ڪايو هق توبيت بواه تاءِ ترفاڪي، نق  
تاهوق بوات ڪايو افې ساج . مو فيڪيرله!

10 اورغ رامي هق دوق نغرتو، تان يحييا کات: ڪالو بالس تو ڪيت  
نق بوات لاڪو مان؟

11 يحييا جواب کات: سياف دالم فواق مو اد ڪائين باجو دوا لاءِ  
ني ڪنا بري کا اورغ تاءِ اد سلاي، فس سياف اد مڪانن چوڪوف  
ني ڪنا بري کا اورغ تاءِ چوڪوف.

- 12 فس دالم فواق ۲ هق ماري تريما روكون مندي تو، اد اورغ كرج تاء موليقي، هق كوتيف حاصلن انتوق كراجاڻن. فواق ني تان يحيا كات: هي توان گورو! فواق كيت كرج كوتيف حاصلن ني، كنا بوات بالس مان؟
- 13 يحيا فسنن كا ري: جاڻن مو امبيق لبهه فد هق كراجاڻن سوروه!
- 14 فس اد سفواق سلدادو ماري تان يحيا جوگ: كيت هق جاني سلدادو ني، كنا كرج بالس مان؟ يحيا فسنن كا ري: جاڻن مو اوسيق اورغ، اتوا مڱادو بوگو بوهوڱ. مو كنا ماكن گاجي سلدادو ساج.
- 15 فد ماس تو، سموا اورغ دوق گامق ۲ كات: بڱكالي يحيا نيلاه، المسيح هق توهن نق هنتر ماري تو؟
- 16 فس يحيا رويت لاگو ني: اكو بوليه بري مو تريما روكون مندي دڱن اير ساج. تافي اد سئورغ لاڱي، هق ماري كديان فد اكو. ري فريڱكت تيڱي فد اكو لاڱي. كالو بنديڱ، اكو ني تاءفادن جادي همب چابوت كاسوت ري فون. بيلا ري ماري ده، ري نق بري تريما هق موليقي فد روكون تو لاڱي، ياءيت نق توروون روح توهن دڱن افي اتس مو.
- 17 ري هق ماري كديان فد اكو ني، نق ماري ميسل سروف دڱن پودق دالم تاڱن ري، نق بري سوگو فادي دڱن رومن. فادي هق موليقي ري نق تاروه دالم رومه فادي. تافي هق رومن تو، ري نق باكر دڱن افي هق دوق مپالا سمعمور هابيس ليچين!
- 18 فسنن يحيا كا اورغ رامي اد بايق فركارا لاڱي. بالس توله خبر هق توهن بري ري سرو كا سموا اورغ تو.

---

عيسى ماري نق تريما روكون مندي بفتيزما

---

19-22 لفس اورغ تريما روكون هابيس ده، بارو عيسى ماري تريما فول. بيلا سوڊه ده، ري دوق بردها سبنتر. فس لاڱيت تربوگ



بري روح توهن تورون اتس عيسى، نمفق سروف بوروغ مرفاتي.  
فس ار سوارا دري لاغيت بويي لاگو ني :  
موله انق کو، هق اکو کاسيه.  
اکو برکنن کفد مو!

لفس تو، يحيا رويت جوگ کا اورغ رامی کات، راج هيروود بوات  
ساله عاده، دغن امبيق بيني ادیق، بوات بيني ري. فس ار  
باق فرکارا لاگي هق جاهت. سابيت تو، هيروود بوات هق  
تروق لاگي، دغن ايکت يحيا بوه دالم کوک.

### بيلاغن توء نينيق عيسى المسيح

23-27 فد ماس عيسى مولا ۲ توبيت سرو خبر ري، عمور ري لبيه  
کورغ تيگ فولوه تاهون. فد فيکيران اورغ ري جايي انق يوسف.  
يوسف جايي انق حيلي، هق جايي انق متات، هق جايي انق  
ليوي، هق جايي انق ملخي، هق جايي انق ينائ، هق جايي  
انق يوسف، هق جايي انق متاتياس، هق جايي انق اموص،  
هق جايي انق ناحوم، هق جايي انق حسلي، هق جايي انق  
نگاي هق جايي انق معات، هق جايي انق متاتياس، هق  
جايي انق صيمعين، هق جايي انق يوسوخ، هق جايي انق  
يودا، هق جايي انق يحانن، هق جايي انق ريسا، هق  
جايي انق زروبابيل تو.

28-31 زروبابيل تو جايي انق شيالتعيل، هق جايي انق نييري،  
هق جايي انق ملخي، هق جايي انق آي، هق جايي انق  
کوسم، هق جايي انق المادم، هق جايي انق حير، هق جايي  
انق يوشوا، هق جايي انق علياصر، هق جايي انق جوريم،  
هق جايي انق متات، هق جايي انق ليوي، هق جايي انق  
صيميون، هق جايي انق يهودا، هق جايي انق يوسف هق  
جايي انق يونم، هق جايي انق علياکيم، هق جايي انق

میلیا، هق جايي انق مینا، هق جايي انق متاتا، هق جايي انق نتان، هق جايي انق راج دءورد تو.

32-34 راج دءورد تو جايي انق جسی، هق جايي انق عوبید هق جايي انق بواص، هق جايي انق سلمون، هق جايي انق نهشون، هق جايي انق امینادب، هق جايي انق امین هق جايي انق ارني، هق جايي انق حیصرون، هق جايي انق فیریص هق جايي انق یهورا، هق جايي انق یعقوب، هق جايي انق اسحاق، هق جايي انق نبي ابراهيم تو.

35-38 ابراهيم تو جايي انق تیراح، هق جايي انق ناحور، هق جايي انق سیروخ، هق جايي انق ریهو، هق جايي انق فیلیگ، هق جايي انق عیبیر، هق جايي انق سیلاح، هق جايي انق کاینن، هق جايي انق ارفقساد، هق جايي انق شیم، هق جايي انق نبي نوح، هق جايي انق لامیخ، هق جايي انق متوسلاح، هق جايي انق حینوخ، هق جايي انق یارید، هق جايي انق مهاللیل، هق جايي انق کاینن، هق جايي انق عینوش، هق جايي انق سیث، هق جايي انق توءام، فس یی فون جايي انق توھن.

#### هیللیس ماری چوب عیسی دفاغ فاسیر

#### باب 4

- 1 بیلا عیسی فالیغ کلیق دسوغي یردن تو، روح توھن دوق ار اتس یی، دغن کواس فنوه. فس روح تو فیمفین یی کی کا دفاغ فاسیر.
- 2 دسیتوله، کفلا هیللیس ماری چوب یی، هیفگ سمفی امفت فولوه هاری، تکه تو، عیسی دوق تاءماکن اف سکارا. لفس تو، یی لافر سوغکوه.
- 3 هیللیس فون کات کا عیسی: کالو مو جايي انق توھن سوغکوه، بواتله باتو۲ نی، بری جايي مکانن انتوق مو!

4 عیسی جواب کات: اد ایات دالم کتاب توهن هق کات:

بوکن دغن مکانن ساج، ماءنسي بولیه هیدوف.

5 فس، هیلیس باوا عیسی ناءیک کا تمفت تیغکی، بری دی نمفق سموا نگیری دالم دنیا، سکالي دغن راج ۲ دی.

6 هیلیس کات کا عیسی: سموا کواس دغن سموا ککایان هق نمفق تو، اکو نق بری کفد مو جوگ، سبب اکو تریم ده فرینته اتس

7 سموا نی، هیلیس کات، فس اکو بولیه بری کا سیاف ۲ فون، ایکوت سوک کو! سابیت توله، اکو نق بری کفد مو بلاک، کالو

مو سجد حرمة کا اکو!

8 تافي عیسی جواب کات: کتاب توهن رویت کات:

مو کنا سمبه کفد ربی، توهن مو، فس کنا جادي  
همب دي ساج.

9 لفس توفول، هیلیس باوا عیسی کی کا کوت جروسلم، لتق دی اتس فرابوغ بیت المقدیس، فس کات کا دی:

10 کالو مو جادي انق توهن سوغکوه، مو ترجونله کا تانه. کران  
اد ایات دالم کتاب هق کات:

توهن نق سوروه ملائیکه ۲ دی جاگ دیری مو بری مولیق.

11 فس اد جوگ، ایات هق کات:

فواق ۲ تو نق هولور تاغن ننٹی سمبوت مو، تاءسیر  
بری کاکیمو تمفوه دغن باتو هق دوق اتس تانه.

12 عیسی فون جواب کا هیلیس فول: اد ایات سا لاکي هق کات:

جاغن مو سوي ربی، توهن مو!

13 بیلا هیلیس سوده چوب عیسی هابیس ۲ چیکف ده، دی فون

هوندور کي درفد عیسی سلالو، ننټي ماس لاین فول.

### عیسی مولا ۲ توبیت کي سرو خبر دي

- 14 لفس فد تو، عیسی برجالن کلیق کا چټوادر کالیل. تکه تو روح توهن دوق اتس دي دغن کواس بسر، سهیڱگ نام دي مشهور کي کا سموا تمفت دالم چټوادر تو.
- 15 فد ماس تو، دي کي برشرح دمسجید ۲ اورغ یهوي، فس سموا اورغ فوجي کا دي.

### اورغ نصره تاه سیر تریما عیسی

- 16 بیلا سمفي کا کمفوغ نصره، تمفت اصل دي، عیسی کي کا مسجید اورغ یهوي هاري میڱو، سروف سمور، فس دي برديري نق باچ کتاب بري سموا اورغ نغر.
- 17 اورغ هولور کا دي کتاب نبي یعشیا، هق دوق ترسورت دالم کولوغ. عیسی فون بوک کولوغ تو، هیڱگ تمو ایات هق کات:

- 18 روح توهن دوق اتس کو. دي چوچور ده کواس دي توروون اتس کو نق بري اکو بولیه کي سرو خبر یغ باءیک کا اورغ هق تاه. دي سوروه اکو کي رویت کا اورغ هق دوق دالم فرغکف، کات دي نق بولیه توبیت لفس. دي سوروه اکو کي کا اورغ مات بوت، بري دي بولیه نمفق کلیق، فس اورغ هق کنا بوات پاڻ فون، اکو نق بري لفس جوگ.
- 19 فس اکو کنا کي کوسنر رات ۲ کات، سمفي ده فرياغ هق توهن نق بري سلامت کا فواق هق جاري میلیق دي.

- 20 عیسی باچ سکت ني، فس دي کولوغ کلیق کتاب بري کا اورغ

- جاگ کتاب ۲ تو. لفس تو، ي دودوق . سمو اورغ دالم  
مسجيد فون، دوق فاکت تيغوق کا ري بلاک.
- 21 فس عيسى مولا ي مغاجر کات: فد هاري ني جوگ، توهن بري  
سمفي سمو فرکارا دالم ايات ۲ هق امب باچ سائي!
- 22 سمو اورغ هق دوق دغر عيسى هاري تو، براس لکت دهاتي  
فس ري حيران کران عيسى فندي برشرح بالس تو. ري  
کيجيق سام سنديري کات: ايه! ني انق يوسف بق که؟
- 23 فس، عيسى کات کا ري: تنتو مو نق کات کا اکو سروف فغاته  
اورغ توا ۲، کات: بومور کنا بري سيار اورغ درومه ري سنديري  
دولو! سبب مو نق سوروه اکو بوات فرکارا فليق دسيني،  
کمفوغ اصل کو، سروف مو دغر ده هق بوات د کفرناحوم .
- 24 دغرله هق اکو نق رويت، عيسى کات، تاءاد سئورغ هابوق،  
نبي، هق اورغ کمفوغ ري سنديري نق حرمة!
- 25 سسوغکوھن، نبي الياس دولو جادي بالس تو. اد بايق اورغ  
بتينا کنا دوق بوجغ تاءاد نق ماکن دنکري اسرائيل ماس تو،  
سبب جادي کماراو بسر تيگ تاهون لبيه ده.
- 26 تافي توهن تاءاد سوروه الياس کي تولوغ فواق ۲ ني. ري سوروه  
کي تولوغ اورغ بتينا دوق بوجغ تاءاد نق ماکن، سئورغ ساج،  
فس ري اورغ بغسا لائين، هق دوق دسرافت، دنکري صيدون.
- 27 بالس تو جوگ، عيسى کات، اد بايق اورغ فپاکيت بادم دنکري  
اسرائيل، تکه نبي الياس دوق تو، تافي نبي الياس تاءاد بري  
سيار سئورغ هابوق دالم فواق اسرائيل تو. ري بري سيار  
نعامون، اورغ نکري سيريا تو، سئورغ ساج!
- 28 سمو اورغ دالم مسجيد، بيلا ري دغر فرکتان عيسى سائي  
29 تو، نائيک موريه بلاک، فس فاکت باغون گادوه ۲ هيريت  
عيسى توبيت دالم مسجيد، باوا کي نائيک کا فونچق بوکيت،  
تمغت بندر ري. توجوان ري نق تولق عيسى بري جاتوه توبير

30 بوکیت، ماتي. تافي عیسی بولیه لفس ډيري دغن مپلیت دالم اورغ رامي، کي کوء لاین.

### هنتو شیطان کنا ایکوت فرینته عیسی

31 لفس تو، عیسی کي کا کفرناحوم، ساتو کمفوغ دچغواد کالیل.

ډي کي مغاجر اورغ دالم مسجد هاري میځگو.

32 سموا اورغ فون حیران دغن فغاجران عیسی، سبب ډي مغاجر موځ اورغ کواس بسر.

33 اد ساتو اورغ دوق دالم مسجد، هق ماسوق هنتو.

34 ډي برجریت سوارا درس کات: هي عیسی، اورغ نصره! مو ماري

بااف، تمفت اکو؟ مو ماري نق خیانه فواق اکو که؟ اکو تاهو

مو جادي سیاف! مو جادي فسوروه هق توهن لتق انتوق

بوات کرج ډي!

35 عیسی فون لارغ هنتوکات: سپله! مو توبیتله دالم توبوه

اورغ ني! هنتو فون بوات بري اورغ تو ربه تورون دافن اورغ

رامي. لفس تو، توبیت کي، تالیه بوات خیانه کا اورغ تو لاکي.

36 سموا اورغ فاکت ترکاګیت، فس برکیچیق سام سنډيري کات:

بالس مان عیسی بولیه کیچیق لاکو تو، بري هنتو شیطان

توبیت؟ ډي اد کواس بسر سوځکوه، بولیه هنتو توروت فرینته

37 ډي! لفس تو، خبر چارا حال عیسی مشهور کي سرات چغواد تو.

### عیسی بري سیار باپق اورغ

38 بیلا عیسی توبیت دمسجد سائي، ډي کي ماسوق دالم

رومه صیمون. توءمنتوا صیمون فون دوق تروق، دم فانس،

فس اورغ مینتاء تولوغ دغن عیسی.

39 عیسی فون کي برډيري دکت اورغ ساګیت، فس، سوروه دم هیلغ.

دم فون هیلغ، توءمنتوا فون باغون سالالو کي امبیق مکانن

بري کا فواق عیسی تو.

- 40 لفس متهاري جاتوه، اورغ هق اد ساين ۲ اديق براديق کنا  
فپاکيت بايق فرکارا، فاکت باوا ماري کا عیسی. عیسی فون  
جامه گنف ۲ اورغ، بري سیار بلاک.
- 41 بايق اورغ هق ماسوق هنتو فون، عیسی همبت توبيت جوگ.  
فواق هنتو ۲ تو برجریت، بلغ ۲ کات: موله انق توهن!  
عیسی فون لارغ هنتو ۲ تو، تاسیر بري رویت کا سیاف، سبب  
فواق هنتو تو تاهو کات عیسی دیاله المسیح، هق توهن  
هنتر ماري.
- 42 فاکي لاکي، عیسی توبيت سئورغ، کي دوق ر تمفت سوپي.  
لفس تو، بايق اورغ توبيت کي چاري دي. بیلا تموده، دي  
مینتا عیسی برهنتي تمفت دي دولو، جاغن کي کالاین لاکي.
- 43 تافي عیسی کات: تالیه له! اکو کنا کي رویت کا سموا تمفت  
کات سمفي ده ماس، هق توهن نق امبیق فرینته دالم هاتي  
مانسي! انتوق کرج اینیله، توهن هنتر اکو ماري.
- 44 لفس تو، عیسی کي رویت خبر دي دمسجید اورغ یهوي  
سرات چغواد یهودیه تو.

## باب 5 عیسی کي تمو مرید ۲ دي هق مولا ۲ سکالي

- 1 فد ساتو هاري، عیسی دوق برشرح دتفي لاءوت کنساريت.  
اورغ رامی دوق لیغکوغ عیسی برسسق ترق، نق دغر خبر  
درفد توهن.
- 2 عیسی فون نمفق دوا بواه فراهو، دوق برهنتي دتفي لاءوت.  
توان دي دوق باسوه فوکت دفتي.
- 3 فس عیسی نایک دالم فراهو هق اورغ نام صیمون، سوروه دي  
تولق فراهو توبيت سیکیٹ. عیسی فون دوق برشرح دالم  
فراهو تو، بري سموا اورغ دفتي دغر.

- 4 بيلا سوده برشرح ده، عيسى سوروه كا صيمون كات: باوا، فراهو  
کي لابه فوکت کا تمفت دالم سيکيت!
- 5 تافي صيمون جواب کات: توان گورو، فواق امب کرج برت تاريق  
فوکت سملامن ده، تاء ليه سټيکور هابوق! تافي بوليه کي لابه  
سکالي لاکي ايکوت هق توان سوروه ني.
- 6 فواق صيمون فون کي لابه فوکت، سروف عيسى سوروه، فس  
بوليه ايکن بايق ساغت، هيگڏ سمفي فوکت نق چاريق.
- 7 سابيت تو، ري فگگيل اوق دي دالم فراهو سبواه لاکي، ماري  
تولوغ. کدوا فراهو فون ميوات ايکن هيگڏ فراهو سارت، دکت  
نق سلم.
- 8 بيلا صيمون فيتروس تيفوق کجادين ني، دي سجود دافن عيسى،  
فس کات: مينتاء توانکو تيغگل امب، کران امب اورغ بردوسا!
- 9 صيمون کات بالس تو، سبب دي حيران ساغت اتس کجادين  
بوليه ايکن بايق سروف تو. اوق ۲ دالم فراهو صيمون ساءني  
سکالي دغن دوا اورغ هق کوغسي ري، دالم سبواه فراهو لاکي،  
براس حيران جوڳ.
- 10 دوا اورغ تو، نام يعقوب دغن اديق دي يحيا. دي کدوا انق  
زبدي. لفس تو، عيسى کات کا صيمون، توان فراهو ساءني:  
مو تاء سه بيمبغله، صيمون! لفس فد ني، مو نق کرج چاري  
اورغ، کنتي چاري ايکن!
- 11 بيلا باوا، فراهو کليق سمفي کا دارت ده، فواق تو تيغگل  
سرب سربي هق دي، توروت عيسى کي.

### عيسى بري فپاکيت بادم هيلغ

- 12 تکه عيسى دوق برهننتي دساتو کمفوغ، دي برتمو دغن  
اورغ فپاکيت بادم، بغسا هق ملارت هابيس سبوتير تبوه.  
اورغ ني، بيلا دي نمفق عيسى، سجود کا کاکي دي، فس مينتاء



- تولوغ دغن عيسى کات: يا توان، کالو توان براس کسياغ بلس  
کا امب، توان اد کواس بري توبوه امب سيار ليچين هابيس!  
13 عيسى هولور تاغن جامه توبوه دي کات: تنتو اکو کهندق  
نق تولوغ مو. جاني چوچيله توبوه مو! فپاکيت دي فون  
ليچين ساللو. فس عيسى فسن کا دي کات:  
14 مو جاغن رویت کا سياف، کجادين ني ديه! تافي مو کيله ساللو،  
کا تمفت امام، بري دي فيقست توبوه مو. لفس تو کي سمبه  
قريان، سروف هق نبي موسی سوروه، جاني تندا کا سموا اورغ  
کات فپاکيت مو سيار چوچي ده.  
15 تافي، لفس فد تو، خبر چارا حال عيسى کهور مشهور کي لاکي،  
فس اورغ ماري چاري عيسى کهور ۲ رامي فد دولو. اورغ ني ماري  
نق دغر عيسى برشرح، فس نق مينتاء بري هيلغ فپاکيت ۲ دي  
16 کاتيق. کادغ ۲، عيسى کنا هوندور کي چاري تمفت سوپي فد اورغ  
رامي ني، انتوق نق مهادف توهن مينتاء دعا.

### عيسى اد کواس بوليه امفون دوسا

- 17 فد ساتو هاري، تکه عيسى دوق مجاجر، اد اورغ دالم فواق  
فريسې دغن کورو ۲ تورات، دوق دغر دي مجاجر. فواق کتوا ۲  
ني، اد هق ماري دالم چغواد گاليل، اد هق ماري دالم چغواد  
يهوديه، فس اد هق ماري دکوت جروسليم کاتيق. فد ماس تو،  
کواس توهن دوق اتس عيسى، بري سموا فپاکيت سيار.  
18 فس، اد سفواق هق اوسوغ اورغ تيفوق ماري، نق چاري جالن  
باوا اورغ ني ماسوق دتمفت عيسى. تافي نق ماسوق تاليه،  
کران اورغ بايق بدعه.  
19 رومه هق عيسى دوق مجاجر تو، اد سوتوه. فواق اوسوغ اورغ  
تيفوق تو، باوا دي ناءيك اتس سوتوه، چوغکيه بات ۲ بوات  
لوېغ، نق هولور اورغ تيفوق دغن گرغ فغوسوغ دي، تورون

- دغن لنجا سمفي دافن عيسى دتغه ۲ اورغ رامى تو.
- 20 بيلا عيسى نمفق کات فواق تو فرچاي کا بي سمفي بکيتو ،  
 بي فون کات کا اورغ تيفوق : هي اديق ! دوسا مو سموا اکو  
 امفون ده !
- 21 بيلا دغر بالس تو ، فواق فريسى دغن کورو ۲ تورات ساءني دوق  
 ممکير دالم هاتي کات : ايه ! اورغ ني جاي اف ، بوليه کيچيق  
 هينا کا توهن بالس ني ؟ تاءار اورغ بوليه امفون دوسا  
 ملينکن توهن ساج !
- 22 تافي عيسى تاهو ده فيکيران دالم هاتي فواق تو ، فس بي کات :  
 باءاف مو فيکير دالم هاتي کات اکو تاءار کواس نق امفون  
 دوسا مءنسي ؟ اکو نق تان فواق مو سيکيت ديه !
- 23 هق مان موده ، نق کات : دوسا ۲ مو سوده امفون ده ، اتوا  
 نق کات : مو باغونله برجالن ؟
- 24 تافي ، اکو نق بري فواق مو تيفوق تندا کات ، اکو مءنسي  
 هق تورون دشرگ ني ، ار کواس ددنيا ، بوليه امفون دوسا  
 مءنسي . تيفوقله ! عيسى کات . فس بي فالينغ کا اورغ تيفوق  
 کات : اکو سوروه مو امبيق فغوسوغ مو ، باواء کليق کا رومه !
- 25 اورغ تيفوق فون باغون سلالو ، دافن اورغ رامى تو ، فس امبيق  
 فغوسوغ بي باواء کليق کا رومه ، بلغ ۲ دوق اوچف تريما  
 کاسيه کا توهن .
- 26 سموا اورغ دوق ترکاگيت تيفوق کجادين ني فس تاکوت ساغت .  
 بي دوق فوجي کا توهن دالم فواق بي ، فس کات : هاري ني ،  
 کيت بوليه تيفوق فرکارا هق فليق بسر !

عيسى اجق ليوي توروت بي کي

- 27 لفس فد تو ، عيسى توبيت کي تمو دغن سئورغ نام ليوي  
 دوق کرج دتمفت اورغ کنا برادو باير چوکي . عيسى فون کات

- کا دي: ماريله، توروت اکو کي!
- 28 ليوي فون باغون تيغگل سماو تو، توروت عیسی کي سلالو.
- 29 لفس تو، ليوي فغگیل عیسی ماري ماکن جاموان بسر درومه  
 دي. اورغ ماري رامي، فس اد اورغ کرج کوتیف چوکی دوق ماکن  
 سکالي دغن سماو اورغ تو.
- 30 فس، فواق فریسي دغن گورو ۲ تورات ماري مغیفیق کا مرید ۲  
 عیسی کات: باء اف فواق مو دوق سوک ماکن سکالي دغن اورغ  
 هق کیت هینا، سروف اورغ کوتیف چوکی ني؟
- 31 تافي عیسی جواب دغن عبارة کات: بوکن اورغ سگر هق نق  
 چاري بومور، نق، تافي اورغ ساکیت.
- 32 فس، عیسی کات: اکو ماري ني، بوکن نق اجق اورغ هاتي بتول،  
 تافي نق اجق اورغ ساله، بري دي فالیغ توروت اکو!

### اورغ تان چارا حال فواس

- 33 لفس فد تو، فواق فریسي ماري تان عیسی: مرید یحیا هق  
 بري اورغ تریما روکون مندي تو، دي دوق فواس دغن باچ دعا  
 سلاریه، تافي مرید ۲ توان دوق ماکن مینوم سعمور.
- 34 عیسی فون جواب دغن عبارة ني: تکه اورغ دوق سوک درومه  
 بوات فولوت، اد کا نق سائین ۲ انق ترونا هق دوق فواس؟ تنتو
- 35 تاء! تافي نق سمعی ماس ده، اورغ نق امبیق انق ترونا تو  
 باواء کي کا تمغت لائین. فد هاري تو، تنتو سائین ۲ دي نق  
 فواس.
- 36 فس عیسی رویت عبارة سا لاکي کات: تاء اد سیاف هق گونتیغ  
 کائین دباجو هق بارو، نق امبیق کي تمفوغ دباجو هق بوروق.  
 تاء اد فاءیده. باجو بارو نق فونه، فس هق فوهو تاء فادن  
 نق تمفوغ دغن هق کوکوه!
- 37 فس، عیسی کات: تاء اد سیاف هق امبیق ایر جابیت هق بارو

- بوات، کي بويوه دالم بکس کوليت هق فاکي لام، کرس ده.  
 تاکوت اير بواه جابيت تو نق بري فچه بکس کوليت، اير تو  
 نق تومغه توبيت هابيس، فس بکس فون نق فونه جوگ.  
 38 نق! اير هق بارو کنا بوه بکس هق بارو جوگ.  
 39 فس عیسی کات: اورغ هق بیاس ماکن اير جابيت هق لام تو،  
 تنتو تاءسیر هق بارو، سبب يي کات: هق لام تو سرف فد  
 هق بارو.

### اورغ تان چارا حال حکوم هاري میځکو

### باب 6

- 1 فد ساتو هاري، هاري میځکو اورغ يیهوي، عیسی دوق  
 برجالن اتس باتس بندغ کندوم، سرکالي دغن انق مرید يي.  
 فس، انق مرید يي تو گتوس تغکي کندوم، اوفر دغن تاغن،  
 نق ماکن ایسي.
- 2 تکه تو فواق فریسي دوق اد سیتو، فس يي کات کافواق عیسی:  
 باءاف مو دوق گتوس کندوم، لغکر حکوم تورات کیت، هق  
 لارغ تاءبري بوات کرج فد هاري میځکو؟
- 3 عیسی فون جواب کا يي کات: مو تاء بیاس باچ که، ایات ۲  
 چارا حال راج داءود؟ تکه يي دغن انق تاغن يي دوق لافر،
- 4 بالس مان يي بوات؟ يي ماسوق تمفت بوات عمل، امبیق  
 روتي هق اورغ سمبه ده کا توهن، ماکن، فس بري کافواق يي  
 کاتیق. تاء کیرا کات حکوم تورات لارغ، تاءبري ماکن کا  
 سیاف، ملینکن کا فواق امام ۲ ساج.
- 5 فس، عیسی کات، اکو مائسي هق تورون دشرک ني اد کواس  
 بولیه فرینته اتس هاري میځکو تو جوگ.

### اورغ هق ماتي تاغن سبله

فد هاري میځکو سا لاکي، عیسی کي مغازر اورغ دالم مسجد

- 7 اورغ يهودي . فس ار جوگ اورغ دسيټو هق ماتي تاغن سبله .  
فواق فريسي دغن گورو ٢ تورات تو ، نق تودوه عيسى کات دي  
بوات ساله . سابيت تو ، ري دوق فرهاتي تيغوق دغن هالوس  
هالوسي ، نق تاهو کات عيسى بوات کا دق ، بري اورغ تو هيلغ  
فد هاري ميغکو .
- 8 تافي عيسى تاهو فيکيران دي . ري سوروه اورغ هق ماتي تاغن  
سبله تو ، باغون ماري برديري دافن سما اورغ .
- 9 فس عيسى تان سما اورغ تو : هق مان توروټ حکوم تورات  
سوځگوه ، انتوق هاري ميغکو ؟ کيت نق بوات هق موليق اتوا  
نق بوات هق هودوه کا اورغ ؟ نق بري سلامت اتوا نق  
بونوه اورغ ؟
- 10 بيلا تان ده ، عيسى کليه توجو کا مات سما اورغ تو ، فس ري  
سوروه اورغ لمبيق تاغن تو کات : مو هولورله تاغن مو کو  
ني ! اورغ تو فون اغکيت تاغن . بلغ ٢ ري اغکيت فون جادي سيار  
سروف سديا .
- 11 تافي فواق دالم مسجد تو براس گرم کا عيسى ، فس دوق  
کيچيق سام سنديري ، بالاس مان نق بونوه عيسى .

---

عيسى فيليه صحابة دوا بلس اورغ هق باوا تيته دي

---

- 12 فد ماس تو ، عيسى ناء يك اتس بوکيت نق بردها سفنجغ
- 13 مالم . بيلا سمفي فاكي تو ، ري فغکيل سما مريد ٢ دي ماري  
برهيمفون ، فس ري فيليه دوا بلس اورغ دالم فواق تو ، هق  
ري فغکيل صحابة هق باوا تيته دي .
- 14 فواق هق عيسى فيليه ني ، نام صيمون هق اورغ گلر فغکيل  
فيتروس ، دغن اندرياس ادیق ري ، يعقوب دغن يحييا ، فيليف
- 15 دغن برتولومي ، متيوس دغن تومس ، يعقوب انق الفيوس دغن  
صيمون ، سئورغ دالم قوم فکغ بغسا يهودي تو ، يودس انق

16 يعقوب، دغن يودس اسكريوت، اورغ هق نق درهاك كا عيسى،  
ماس دافن.

### شراحن عيسى فد تمفت تانه رات

17 بيل عيسى تورون داتس بوكيت سائي دغن صحابة دوا  
بلس اورغ تو، دي برهنتي دتمفت لواس، تانه رات. دسيتو  
مريد ۲ عيسى بايق اورغ دوق سكالې بلاك، فس اد اورغ رامې  
لاكي. اد هق ماري دچشواد يهوديه، فس هق ماري دكوت  
جروسليم. اد هق ماري جاء وه لاكي، دنكري صور دغن نكري  
صيدون جوگ.

18 كسموا ني ماري نق دغر عيسى برشرح، فس نق مينتاء بري هيلغ  
فپاكي٢ دي. اورغ هق سوسه ماسوق هنتو فون، عيسى بري  
هيلغ بلاك.

19 سموا اورغ تو فون دوق فيسه چاري جالن نق برتمفوه دغن  
عيسى، سبب كواس توبيت درفد توبوه دي، بري هيلغ سموا  
فپاكي٢.

### اورغ براونتوغ دغن اورغ سوسه سوغكوه

20 عيسى فون دوق تيغوق كا سموا مريد ۲ دي تو، فس دي  
برشرح لكو ني:

هي فواق مو هق تاءا سكارا، مو براونتوغله سوغكوه!  
سبب مو تريما ده فرينته توهن دالم هاتي بري سلامت.

21 هي فواق مو هق براس لافر لاني، مو براونتوغله سوغكوه!  
سبب هاري كوء دافن، توهن نق بري كيغ.

هي فواق مو هق دوق ترياق مناغيس لاني، مو براونتوغله  
سوغكوه! سبب هاري كوء دافن، توهن نق بري مو سوک هاتي.  
22 فد ماس اورغ بنجي كا فواق مو، فس همبت مو توبيت تاء بري

- ماسوق فواق دي، دغن کران مو دوق توروت اکو ني، عیسی کات،  
 مو فون براونتوغ جوگ! فد ماس اورغ ماکی کغد مو، کیچیق  
 مفهودوه کات مو اورغ جاهت، کران اکو، مو فون براونتوغ جوگ!  
 بیلا جانی بالس تو، مو بولییه ملومفت دغن سوک هاتی، سبب 23  
 فرکارا تو جانی تندا کات، توهن سوده چادغ تاروه فهلا بسر  
 انتوق مو دشرگ. فواق هق بوات فرکارا ۲ تاء مولیق کغد مو تو،  
 توء نینیق یی فون بیاس بوات سرورف تو جوگ کانبی ۲ زمان دولو.  
 تافی دغرله، فواق مو هق کای ده لانی، مو سوسه سوغکوه!  
 سبب مو تریما بلاک ده کسناغن مو، ددنیا نی! 24  
 فس فواق مو هق ماکن سمفرن لانی، مو سوسه سوغکوه!  
 ماس کو دافن مو نق لافر بلاک! 25  
 هی فواق مو هق دوق سوک ۲ سنغ هاتی لانی فون، مو  
 سوسه سوغکوه! سبب ماس کو دافن، مو نق سوسه هاتی  
 تریاق مناغیس فول.  
 فس بیلا سماو اورغ فوجی بوهوغ کات مو مولیق فون، مو 26  
 سوسه سوغکوه! فواق هق فوجی مو نی، توء نینیق یی بیاس  
 فوجی نبی ۲ فلسو، زمان دولو، سرورف تو جوگ.

### کیت کنا کاسیه کا سترو ۲ کیت کاتیق

- لفس تو عیسی کات لاکي: اکو رویت کا فواق مو هق 27  
 نق دغر فعاجران کو، کیت کنا کاسیه کا سترو ۲ کیت کاتیق،  
 یاءیت بوات بایک کا اورغ ۲ هق بنچی کا کیت.  
 اورغ هق سومغه ماکی کا کیت فون، کیت کنا بالس دغن مینتاء 28  
 دعا، بری توهن تورون رحمة اتس دی.  
 کالو سیاف ماری تمغر فیفی کیت سکالی، کنا صبر، ولو یی 29  
 نق تمغر سکالی لاکي فون. کالو سیاف ار کواس بولییه امبیق  
 باجو جوبه کیت، کیت کنا بالس دغن چابوت باجو کمیجا بری

- 30 کا دي کاتيقي! سیاڦ ماري مينتاء دغن کيت فون، بريله کا دي.  
کالو دي ماري امبيق بارغ ۲ کيت فون، بنرله، جاغن سوروه  
هنتر کليق.
- 31 معنائ، کيت کنا بوات کا اورغ لاءين، هق کيت برکن بري دي  
بوات کا کيت.
- 32 کران ايغته! کالو کيت کاسيه کا اورغ هق کاسيه کا کيت ساج،  
باءاف کيت کات توهن نق تورون رحمة فيسيد اتس کيت؟  
اورغ جاهت فون تاهو جوگ، کاسيه ماچم ني!
- 33 فس کالو کيت بوات باءيك کا اورغ هق بوات باءيك کا کيت ساج  
باءاف کيت کات توهن نق تورون رحمة اتس کيت؟ کران اورغ  
جاهت تاهو جوگ، بوات باءيك ماچم ني!
- 34 فس کالو کيت بري فينجم کا اورغ هق هارف کات بوليه هنتر  
کليق ساج، بقاءاف کيت کات توهن نق تورون رحمة اتس کيت؟  
اورغ جاهت فون بري فينجم ماچم تو، سام سنديري، دغن  
تاهو کات دي نق هنتر کليق.
- 35 جاغن کيت بوات سکت تو ساج! کيت کنا کاسيه کا سترو ۲  
کاتيقي، بوات باءيك کا دي جوگ. کيت کنا بري فينجم کا اورغ  
دغن تاءهارف نق بوليه کليق اف ۲، بارو کيت نق بوليه فهلا  
بسر. بارو کيت بوليه تاهو کات کيت جادي انق توهن، هق  
مهاتيغکي. کران توهن بوات باءيك کا سموا اورغ، جاهت اتوا  
باءيك فون، ولو فواق تو تاءايغت کا رحمة توهن سکاڦي فون.
- 36 سابيت تو، ماريله کيت کسياغ بلس کا سموا اورغ، ايکوت  
تالان توهن باف کيت، هق کسياغ بلس تو.

---

کيت تريما سکت سقدر کيت بري کا اورغ لاءين

---

- 37 جاغن مو کرت سين اتس اورغ کات ساله سعمور. تاکوت  
توهن نق کرت سين اتس مو بالس تو جوگ. کالو مو تاءحکوم



ساله كا اورغ سعمور، توهن فون تاء حكوم ساله كغد مو جوگ.  
 مو كنا معاف كا اورغ هق بوات ساله كغد مو، فس توهن نق  
 امفون كسلاهن مو جوگ.

38 بريله كا اورغ لائين، فس توهن فون نق بري كغد مو. كالو مو  
 بري بايق كا اورغ دغن موره هاتي، توهن نق بري كغد مو بايق  
 لاكي، هيغك سمفي تاء اد بكس نق بوبوه. تافي ايغته! ستارا  
 مان مو بري كا اورغ لائين، ستارا تو جوگ، توهن نق بري كغد  
 مو.

### اورغ بوت تاءليه فيمغن سام بوت

39 لفس تو عيسى رويت دغن عبارة كات: اورغ بوت نق فيمغن  
 اورغ بوت تاءليه. كالو بوات بالس تو، نق جاتوه فاريت كدوا!  
 40 انق مريد تاءليه تيغكي فد توء كورو يي. تافي انق مريد هق  
 مجاجي هابيس ده، سماو هق توء كورو اجر كا يي، بيلا يي  
 توبيت ده، يي بوليه بوات سروف توء كورو يي.

### كسلاهن مو سنديري، كنا تيغوق دولو

41 فس عيسى فاكلي عبارة سا لاكي كات: باءاف مو بوليه نمفق  
 دبو سيكيت دالم مات ساءين؟ تافي دالم مات مو سنديري،  
 ستوغكول كايو بسر فون مو تاء كابر!  
 42 باءاف مو براني كات كا ساءين مو: هي كاون! اكو نق تولوغ  
 مو بواغ توبيت سمفه دالم مات مو! تافي توغكول كايو بسر تو،  
 دوق اد لاكي دالم مات مو سنديري. هي اورغ بودوه هق تيغو  
 ديري! باءيك مو بواغ كايو دالم مات مو سنديري دولو بري چره،  
 بارو بوليه تولوغ بواغ سمفه دالم مات ساءين مو تو.

## هاتي موليق كنا توبيت بواه هق موليق

- 43 فوهون هق سوبور، تاء توبيت بواه هق كوفيه . فس فوهون هق بوروق دالم تاء توبيت بواه هق موليق .
- 44 بيلا كيت كليہ بواه، كيت كئل بالس مان فوهون حي . اورغ تاء كي امبيق بواه ارا فوهون بردوري، فس اورغ تاء كي امبيق بواه جابيت دالم رمفوت لالغ .
- 45 سروف تو جوگ، اورغ هاتي موليق نق توبيت بارغ هق موليق، درفد سموا بارغ موليق هق دوق تاروه دالم هاتي . تافي اورغ هاتي تاء موليق، دي نق توبيت بارغ هق تاء موليق درفد سموا بارغ تاء موليق هق دوق ار دالم هاتي . اف ۲ هق دوق فنوه دالم هاتي ماء نسي، مستي كنا كلوار دالم كيچيفن دي .

## دوا اورغ هق بوات رومه

- 46 فس عيسى فاکي عبارة سا لاکي کات: باء اف مو فغکيل اکو توانکو! توانکو! تافي مو تاء بوات توروت فرکتان هق اکو سوروه؟ اورغ هق ماري دغر فغاجران کو، فس بوات توروت، دي سروف دغن اورغ نق بوات رومه . دي گالي بري دالم سهيغ 48 بوليہ لتق فلافيق رومه دي اتس باتو . بيلا به ماري، اير نق تيکم فلافيق فون تاء ليہ، سبب توان رومه بوات بري کوکوه .
- 49 تافي اورغ هق ماري دغر فغاجران کو، فس دي مالس نق بوات توروت، دي سروف دغن اورغ نق بوات رومه جوگ، عيسى کات . تافي دي بوات اتس تانه سلالو، تاء گالي . بيلا به ماري، اير تيکم، رومه دي فون تراليق سلالو . فس سوسهلہ، رومه هق تراليق بالس تو!

---

 عيسی بري سیار بوق نای روي بغسا روم
 

---

باب 7

- 2-1 بیلا عیسو سوده رويت سموا فرکارا ني کا اورغ رامی ، دي کلیق کا کمفوغ کفرناحوم فول . دسیتو اد سئورغ نای روي عسکر روم . فس اد بوق جنتن کرج درومه دي ، هق کاسیه سوغکوه . بوق تو ساکیت برت ، دکت نق ماتي .
- 3 بیلا نای روي دغر خبر چارا حال عیسو ، دي هنتر کتوا اورغ یهوني ، دوا تیگ امفت اورغ ، کي اجق عیسو ماري کا رومه دي ، نق بري عیسو تولوغ . بوق تو .
- 4 فواق ني فون ماري کا تمفت عیسو ، اجق دي دغن سوغکوه ۲ هاتي کات : سوغ فاتوت تولوغله ، نای روي ني .
- 5 سبب دي کاسیه کا اورغ بغسا کیت سوغکوه . مسجد فون دي بوات جوگ انتوق کیت !
- 6 عیسو فون توبیت کي سکالي دغن فواق کتوا سائي . سمفي دتغه جالن ، نای روي فون هنتر سائين ۲ دي نق تمو دغن عیسو دسیتو ، فس کاتاله سروف نای روي فسن کا دي کات : توان تاء سه گادوهله کي کا رومه نای روي ! دي کات تاء سوغ فاتوت نق سوروه توان ماسوق دالم رومه دي .
- 7 فس ، دي سنديري فون براس تافان ماري مینتاء اف دغن توان ني . سابیت تو دي کات ، هق فان ، توان کیچیق سفاته دسيني فون ، بري بوق تو سیار .
- 8 کران ، نای روي کات ، دي سنديري کنا دوق باوه فرینته اورغ جوگ . فس اد جوگ ، اورغ دوق باوه فرینته دي . دي سوروه کا سئورغ سفاته . سوروه اورغ تو کي ، دي کي ، سوروه اورغ ني ماري ، دي ماري . بوق ۲ درومه فون ، بیلا نای روي سوروه بوات اف ۲ ، دي فون بوات بلاک !
- 9 بیلا عیسو دغر هق نای روي فسن ني ، دي فون براس حیران

- فاليڻ ڪات ڪا اورڻ رامي هق توروت بلاڻڻ ٻي: سوڳو، دالم  
سمو اورڻ اسراييل فون، اڪو تاءِ بياس تمو اورڻ هق. فرچاي  
سرو ف ناهي روي ني، هق بوڪن بڻسا ڪيت!  
10 فس، فواق تو ڪليڪ ڪا رومه ناهي روي، تيغوق بودق تو سيارده.

### عيسيٰ بري هيڊوف ڪليڪ اورڻ ماتي

- 11 فس تو تاءِ لام، عيسيٰ ڪي ڪا ڪمفوغ نام ناهين. صحابه ۲  
ٻي دغن اورڻ رامي بايق اورڻ، توروت ڪي سڪالي دغن ٻي.  
12 بيلا عيسيٰ نق ماسوق فينتو ڪرين ناهين تو، يتولن دغن اورڻ  
اوسوڻ مائت نق ڪي تانم. مق اورڻ ماتي ار انق سئورڻ ني ساج،  
فس ٻي دوق بوجڻ، توءِ لاکي تاءِ ار. فس، ار بايق اورڻ دالم  
ڪمفوغ تو، هق توروت مائت ڪي ڪا قبور سڪالي دغن مق ٻي.  
13 بيلا عيسيٰ تيغوق مق اورڻ ماتي ساهي، ٻي براس ڪسيغ  
بلس، فس ڪات ڪا ٻي: جاڻن ترياقله، ڪاهان!  
14 عيسيٰ فون ماسوق دڪت، لتق تاڻن اتس ڪرڻ اورڻ ماتي. اورڻ  
مغوسوڻ فون برهنتي. فس عيسيٰ ڪات ڪا اورڻ ماتي: هي اديق!  
15 باڻونله! اورڻ ماتي فون، باڻون مپاتق ڪيچيق سلالو، فس  
عيسيٰ بري ٻي ڪليڪ ڪا مق ٻي.  
16 سمو اورڻ هق دوق سييتو فون، مفاڪو ڪواس توهن دغن  
تاڪوت. ٻي ڪات: توهن بري تيمبول ماري نبي هق ڪواس بسر  
انتوق فواق ڪيت. تنتو نق بري بڻسا ڪيت سلامت سوڳو!  
17 خبر ڪجادين ني ڪي سرات تمفت دالم چغواد يهوديه، فس سمفي  
ڪا سمو تمفت دڪليواسن نڪري تو.

### انق مريد نبي يحيٰ ماري تان عيسيٰ

- 18 فد ماس تو، انق مريد نبي يحيٰ ڪي رويت ڪا يحيٰ سمو  
فرڪارا هق عيسيٰ دوق بوات تو. فس يحيٰ فغڪيل انق مريد

- 19 دوا اورغ ماري کا تمفت دي، نق هنتر دي کي کيچيق دغن عيسى. دي سوروه تان عيسى لاگو ني: هق توان کيت يحيا رويت کات نق ماري ماس کوء دافن، جيلا توان ني که؟ اتوا کنا ننتي هق لائين لاگي؟ بيلا سمغي کا تمفت عيسى دي کات: توان کيت يحيا هق بري تريما روکون تو، دي سوروه کيت ماري تان توان، کات: توان ني که، هق نق ماري ماس کوء دافن؟ اتوا کيت کنا ننتي هق لائين لاگي؟
- 20 تکه تو، عيسى دوق بري سيار بايق اورغ هق فپاکيت ماسيخ ۲. اورغ ماسوق هنتو، دي همبت هنتو توبيت، فس اورغ بوت بايق اورغ فون، دي بري نمفق جوگ.
- 21 سبب تو، دي جواب کا دوا اورغ هق ماري ساءني، کات: مو کليق رويته کا يحيا، فرکارا ۲ هق مو تيغوق هق مو دغر، دسيني، کات:
- اورغ مات بوت بوليه چليق، اورغ برجالن کيچوق، بوليه برجالن بتول، اورغ فپاکيت بادم، کوليت دي ليچين ده، اورغ تليغا تولي بوليه دغر ده، اورغ ۲ ماتي فون هيذوف کليق سمولا، فس خبريخ بائک درفد توهن کي سمفي کا اورغ هق سسق!
- 22 سوغکوه، براونتوغله اورغ هق تاءسک هاتي چارا حال اکو، عيسى کات.

### عيسى رويت چارا حال نبي يحيا

- 24 بيلا انق مرید يحيا ساءني کليق ده، عيسى فالينغ کيچيق دغن اورغ رامي چارا حال يحيا کات: بيلا مو کي تمو دغن يحيا تکه دي دوق دفاغ فاسير دولو، مو هارف نق تمو دغن اورغ لاگو مان؟ اورغ سروف سلاءي رمفوت دوق سيوف داغين که، هق ليوت کوء تو، ليوت کوء ني؟ نق! دي بوکن بالس تو.

- 25 اتوا مو هارف نق برتمودغن اورغ هق فكاين سرب موليق كه؟  
 بق! اورغ سق فاكلي بالس تو، هق ار سرب سروبي، مو نق  
 تمو دالم استان راج، بوكن دفاغ فاسير!
- 26 رويته! عيسى كات، مو هارف نق تمو دغن اورغ لاكو مان؟  
 تنتو سئورغ نبي، بوكن؟ ها سوغكوه! فس، دي هق مو تمو  
 دسيتو، فريغكت دي تيغكي فد نبي لاكي.
- 27 كران يحييا توله، اورغ هق ار سبوت دالم كتاب نبي ۲ دولو،  
 كات:

اينيله فسوروه كو، كات توهن. اكو هنتر دي كي  
 دولو فد مو، نق سيمفن جالن انتوق مو.

- 28 فس عيسى كات: ايغته! تاء ار سئورغ نبي تيمبول ماري دالم  
 فواق مائسي، هق تيغكي فد نبي يحييا تو. تافي اورغ هق  
 فريغكت رنده سكاللي، هق بوليه ماسوق دوق باوه فرينته توهن  
 لاني، دي تريما فريغكت تيغكي فد يحييا لاكي.

نبي ماري بالسر ۲ مان فون بايق اورغ تاء تريما

- 29 دالم فواق هق سوک دغر فعاجران عيسى، بايق اورغ هق  
 تاء ار علمو، دغن اورغ هق كرج كوتيف چوكي. فواق ني توروت  
 جالن هق توهن لتق ده، نق بري مائسي بوليه بائيك دغن  
 دي. فس سابيت تو، فواق ني توبه، تريما روكون مندي بفتيزما  
 دغن يحييا.
- 30 تافي فواق فريسي دغن گورو ۲ تورات، تاء سير توروت جالن  
 هق توهن سيف ده انتوق دي، فس دي تاء سير توبه تريما  
 روكون مندي دغن يحييا تو.
- 31 فس عيسى كات: ايه! اكو نق بنديغ دغن كاف، اورغ هق دوق  
 ار ماس لاني؟ سسوغكوهن، دي سروف دغن بوق ۲ هق دوق

- 32 مٺين رکي. اڌ ساتو فواق هق اجق فواق لائين کات: کيت مٺين سرونن نق بري سوک ۲ سروف کرج منيکاح، تافي فواق مو تٺ سير مناري! کيت پاپي لاگو ۲ بلس فول، سروف کرج اورغ ماتي، تافي فواق مو تٺ سير ترياق!
- 33 نبي يحيي ماري فواس، دغن تٺ ماکن تٺ مينوم اير بواه جابيت سکالي، فس سموا اورغ کات: ري ماسوق هنتو، جاري گيلا!
- 34 اکو مٺ نسي هق تورون دشرگ ني فون، ماکن بلاک، فس سموا اورغ کات: تيغوقله! ري ماکن لوبا! ماکن ارق فون جوگ!
- تيغوقله، سٺين ۲ ري اورغ هق کوتيف چوڪي، دغن اورغ هق ترهينا سموا!
- 35 بلرله ري کيچيق بالس تو، عيسو کات. تافي اورغ هق تريما ده فرکارا ني، بوليہ نمفق کات توهن تٺ بودوه. هق ري بوات تو، موليق بلاک!

### اورغ بتينا امبيق رمبوت سافوس کاکي عيسو

- 36 اڌ سٺورغ فريسي، اجق عيسو کي ماکن جاموان درومه ري. عيسو فون کي کا رومه ري، فس دوق ماکن دسيتو.
- 37 اڌ ساتو اورغ بتينا جاهت، دوق دالم بندر تو. بيلا ري دشر کات عيسو دوق ماکن درومه اورغ فريسي سٺني، ري امبيق جبول ميپق واغي، هق هرگ مهل، باوا کي کا تمفت عيسو دوق ماکن تو.
- 38 ري ماسوق کوٺ بلاکغ عيسو، کي دوق دکاڪي ري، فس دوق مناغيس هيغک اير مات منيليه، بري کاکي عيسو باسه هابيس. اورغ بتينا تو فون، امبيق رمبوت سافوس کاکي عيسو، نق بري کريغ. فس ري دوق کوچوف کاکي عيسو بلغ ۲ چواه ميپق واغي کاتيق اتس کاکي.
- 39 بيلا اورغ فريسي، هق اجق عيسو کي کا رومه سٺني، تيغوق

- 40 هق اورغ بتينا بوات تو، دي دوق فيكير دالم هاتي کات: ايه!  
کالوعيسى جاني نبي سوغکوه، دي نق تاهو اورغ بتينا هق دوق  
فکځ کاکي دي تو، اورغ بالس مان، سبب دي اورغ بتينا جاهت!  
تافي عيسى فالين کيچيق دغن توان رومه، کات: هي صيمون!  
ار ساتو فرکارا اکو نق رويت کعد مو. نق رويت کاف، توان  
گورو؟ صيمون کات.
- 41 عيسى فون جواب دغن عبارة کات: ار دوا اورغ براوتځ دويت  
اورغ کاي، سئورغ ليم رييو، سئورغ لاکي ليم راتوس. کدوا  
اورغ تو تاءليه باير کليق بلاک.
- 42 تافي اورغ کاي ساءني بري لفس اوتځ کا دوا اورغ تو، سروف.  
دالم دوا اورغ ني، هق مان نق کاسيه کا اورغ کاي لبيه؟
- 43 صيمون جواب: اورغ هق براوتځ بايق، نمفق نق کاسيه لبيه.  
سوغکوه، عيسى کات.
- 44 فس دي تنجوق کا اورغ بتينا کات: مو تيغوق کا دق، هق اورغ  
بتينا ني دوق بوات؟ بيلا اکو سمفي نق ماسوق رومه مو، تاءار  
سياف بري اير نق باسوه کاکي، تافي اورغ بتينا ني باسوه  
کاکي کو دغن اير مات، فس سافوس دغن رمبوت دي!
- 45 مو تاءتوبيت سمبوت اکو دغن کوچوف ساءني، تافي تکه اکو  
دوق سيني، اورغ بتينا ني دوق کوچوف کاکي کو تاءفوتوس ٢.
- 46 مييق واغي نق بوه کفلا، مو تاءبري سيکيت هابوق، تافي اورغ  
بتينا ني دوق چواه مييق واغي دي اتس کاکي کو.
- 47 سابيت توله، اکو نق بري مو تاهو، صيمون، کات، ستارا هق  
دي تنجوق کاسيه کا اکو ني، جادي تندا کات، ولو دوسا ٢  
دي بايق فون، تافي دي بوليه امفون ده، سموا! تافي اورغ  
هق کاسيه سيکيت، دي اورغ هق بوليه امفون سيکيت جوگ!
- 48 فس، عيسى کات کا اورغ بتينا فول: دوسا مو سوده امفون ده.
- 49 هاوا دغر بالس ني، اورغ دوق ماکن ناسي سکالي، تان سام



سنديري کات: سياف دي اورغ ني، کيچيق براني کات دي بوليه  
امفون دوسا؟

50 تافي عيسى کات کا اورغ بتينا سکالي لاگي: سابيت مو فرچاي  
سوځکوه، مو بوليه سلامت. مو برجالن کيله، دغن سلامت!

### اورغ ۲ بتينا هق تورو عيسى کي

باب 8

1 تاءلام فول، عيسى برجالن کوسنر کوء کدف ۲ کمفوغ، کچيک

بسر، نق سرو خبر کات: توهن نق ماري امبيق فرينته اتس  
مائسي سمولا. صحابة دوا بلس اورغ تو فون تورو کي سکالي.

2 فس ار ساتو فواق اورغ بتينا، اورغ هق عيسى بياس تولوغ

بري توبيت هنتو، اتوا بري هيلغ فپاکيت. نام دي مريم مقدالا  
هق بياس بري توبيت هنتو توجهه ايكور، فس يوحنه، بيني

خوصر، هق کرج دالم کوت راج هيروود، فس اورغ نام صوزنه،  
3 دغن اورغ بتينا بايق اورغ لاگي، هق دوق سارا فواق عيسى

سممور.

### عبارة اورغ تابور بنيه فادي

4 ار اورغ رامي ماري چاري عيسى دري سرات تمفت دالم نکري.

بيلا سموا اورغ ني ماري برهيمفون ده، عيسى مفاجر دي دغن  
فاکي عبارة دالم چريتا ني:

5 ار سئورغ کي تابور بنيه فادي. بلغ ۲ دي تابور تو، ار هق

جاتوه تغه جالن، کنا جيچق کاتيک ماکن دبورغ کاتيک، هيغک  
هابيس، بنيه تو.

6 فس ار بنيه هق جاتوه اتس تانه هق ار باتو باليق باوه. بيلا

تومبوه نائيک ده، کچوت سالالو، سبب تانه تو کريغ تاءار اير.  
7 فس ار فول بنيه هق جاتوه دالم دوري. فوهون دوري فون،

تومبوه نائيک سکالي دغن تونس، کاروت تونس، نق توبيت بواه

- 8 تاءليه. تافي، ار بنیه هق جاتوه دتانه سجوق. بنیه نیله  
تومبوه ناءیک مولیق، بولیه حاصلن سراتوس کالی گندا.  
بیلا سوده رویت ده چریتا نی، عیسی فون کات کا اورغ رامی  
تو: اورغ هق ار تللیغا نق دغر، دغرله!  
9 لفس فد تو، مرید ۲ عیسی تان کات: کیت نق فهم بالس مان،  
عبارة چریتا نی؟  
10 عیسی جواب کات: توهن بری ده کا فواق مو رهسیا چارا حال  
فرینته دی اتس دنیا، تافي انتوق اورغ رامی توهن نق رویت  
دغن عبارة ساج. بالس توله، عیسی کات، هق اورغ رامی تو  
تیغوق، دی تاءفهم، فس هق یی دغر فون تاءرتی.

### عیسی هوری عبارة اورغ منابور

- 11 اینیله معنا عبارة، دالم چریتا هق تابور فای ساءنی،  
عیسی کات. بنیه فای بندیغ سرور فرکتان توهن.  
12 تانه تغه جالن هق بنیه جاتوه تو، جادی سرور اورغ هق  
دغر فرکتان توهن، تافي هییلیس ماری رمفس فرکتان تو  
دالم هاتی دی، تاءسیر بری اورغ تو فرچای بولیه سلامت.  
13 تانه هق باتو بالیق باوه بنیه جاتوه تو، جادی سرور اورغ  
هق تریما فرکتان توهن دغن سوک هاتی، تافي تاءلکت. دی  
فرچای سبنتر، تافي، با کما فنچوبان اف ۲، یی فون هوندور  
تاءسیر توروت.  
14 تمفت فوهون بردوری هق بنیه جاتوه تو، جادی سرور اورغ  
هق تریما فرکتان توهن، تافي دی دوق بیمیغ کا باقی فرکارا.  
یی نق ۲ کا دویت اتوا کسوکان اتس دنیا. سموا فرکارا نی فون  
دوق کهور ۲ بسر، سهیغک بری کاروت فرکتان توهن، فس  
بواه یی تو همغا ساج.

- 15 فس، ار تانه موليق هق بنيه جاتوه تو، جاني سروف اورغ هق  
دغر فركتان توهن، فس فگغ تاروه، ننتي نق توروت سمعمور  
سمهگغ هاتي دي كههور ۲ توبيت بواه، سروف فاي توبيت  
حاصلن موليق سائي.

### عبارة فليتا تودوغ دغن فاسو

- 16 فس عيسى فاکي عبارة سا لاکي کات: تاءد سياف فاسغ  
فليتا تودوغ دغن فاسو، اتوا کي لتق باوه کاتيل، نق! تنتو  
دي لتق رتمفت تيغکي، نق بري چره اورغ ماسوق دالم رومه.  
17 تنتوله اف ۲ هق دوق سوسوف، لام ۲ بوليه نمفق کا اورغ جوگ.  
فس اف ۲ هق دوق تودوغ، لام ۲ نق کا امبيق توبيت کاتمفت  
چره، بري سموا اورغ بوليه نمفق.  
18 سبب تو، عيسى کات، مو کا فرهاتي دغر موليق ۲، کران اورغ  
هق تريما ده سيکيت ۲، توهن نق تمبه لبیه لاکي، تافي اورغ  
هق تاءسير تريما اف سکارا، توهن نق امبيق هابيس سموا  
هق دي ار.

### مق دغن ادیق ۲ عيسى

- 19 فد ماس تو، مق عيسى دغن ادیق برادیق دي ماري کاتمفت  
عيسى تافي نق ماسوق تاءليه، کران اورغ دوق سسق ترق.  
20 فس اورغ ماري رويت کا عيسى کات: مق توان دغن ادیق ۲ دوق  
ننتي لوار، نق کيچيق دغن توان!  
21 تافي عيسى کات کا اورغ رامي تو: سسوغگوهث، اورغ مان هق  
دغر فرکتان توهن، فس بوات توروت گاتيق، اورغ توله هق  
کا دغن اکو، سروف مق دغن ادیق برادیق.

### عيسى لارغ ريپوت

- 22 فد ساتو هاري، عيسى ناءيك فراهو دغن صحابة ۲ دي.
- ماريله كيت جمرغ لاءوت ني! عيسى كات. فواق دي فون فاكٽ كي.
- 23 تنه دوق كي تو، عيسى تيدور جندرا. تيبيا ۲ اغين ريپوت قواۋه. اير ماسوق دالم فراهو، دكت نق فنوه. جاني بهيا بسر كا فواق دي.
- 24 فواق صحابة كي گرغ عيسى كات: توان گورو! توان گورو! ماتيله كيت! عيسى فون باغون، لارغ ريپوت دغن اومبق بري برادو.
- فس دي برادو سلالو. اغين ريپوت فون سيدغ هابيس.
- 25 لفس تو، عيسى فالېغ كات كا صحابة ۲: ايمان مو، فس، كان هابيس؟ فواق صحابة توفون تاكوت ساغت. دي براس حيران، فس دوق تان سام سنديري: ايه! توان گورو كيت اورغ لاكو مان، بوليه سوروه اغين دغن اومبق برادو، ايكوت فرينته دي؟

### عيسى بري هيلغ، اورغ ماسوق هنتو

- 26 لفس تو، دي بلاير كي سمفي كا تمفت اورغ گراسين، هق دوق باليق سان لاءوت دغن چغوار كاليل.
- 27 تنه عيسى نق تورون كا دارت، اد اورغ ماري تمو دغن دي. اورغ ني ماري دبندر باليق تو. دي ماسوق هنتو، دوق تلنج تاءفاكي اف سكارا، فس تاءسير دوق درومه، تافي كي دوق دالم گوا۲، تمفت اورغ بوات قبور.
- 28 بيلا دي نمفق عيسى، دي جریت، فس سجدو دافن عيسى، كات دغن سوارا درس: هي عيسى، انق توهن هق يغ مهاتيغكي! مو نق بوات گلن دغن اكو؟ اكو مينتاء، جاغن مو بوات سيقساله كا اكو! هنتوكات بالس تو، سبب عيسى سوروه دي توبيت ده 29 سائي، دالم توبوه اورغ تو. ماس دولو، هنتو فقسا اورغ ني، بوات بايق فركارا ده. بيلا اورغ تاهن دي، بوه رنتي دكاكي

- تاغن فون، دي بوليه بري فوتوس، فس هنتو باوا دي کي دوق تمفت اورغ تاءار.
- 30 لاني عيسى تان دي: مو نام اف؟ نام کو رامي! دي کات بالس تو، سبب هنتو بايق ايکور دوق دالم توبوه دي.
- 31 هنتو ۲ تو فون مینتاء کا عيسى دغن سوغکوه ۲ هاتي، تاءسير بري همبت جاتوه رتمفت دالم تاءار فنتت تو.
- 32 جادي، رسيټو، ار سکاون بابي بايق ايکور، دوق چاري ماکن رتيغ بوکيت. فواق هنتو فون مینتاء عيسى بري دي ماسوق دالم توبوه بابي ۲ تو. عيسى فون بنر بري.
- 33 فس، هنتو توبيت دالم توبوه اورغ تو، کي ماسوق دالم توبوه بابي فول. سموا بابي تو فون لاري کچيک کفلا ۲، کي ترجون اتس توبير بوکيت، جاتوه دالم لاءوت، لمس ممفوس هابيس.
- 34 اورغ ۲ هق دوق جاگ کاون بابي تو، نمفق کجادين ني، فس، لاري کي رويت کا اورغ دالم کدي، فس کي رويت کا اورغ ردارت فول، بري سموا اورغ فاکت ماري نق تيغوق فرکارا ني. بيلا دي
- 35 سمفي کا تمفت عيسى، دي تيغوق اورغ ماسوق هنتو سائي، دوق ديام، دکت کا کي عيسى. کائين باجو فون دي فاکي، اوتق فون موليق سرورف سديا. فس سموا اورغ هق ماري تو، براس تاکوت سوغکوه.
- 36 اورغ هق تيغوق ده تو، رويت کا اورغ هق بارو سمفي، کات بالس مان اورغ ماسوق هنتو تو سيار.
- 37 لفس تو، سموا اورغ هق دوق باليق کراسين تو، فاکت سوروه عيسى، توبيت کي کوء لائين، کران تاکوت سوغکوه کا دي.
- 38 عيسى فون نائيک فراهو نق کي. فس، اورغ هق ماسوق هنتو سائي، مینتاء دغن عيسى بري دي کي سکالي، تافي عيسى کات کا دي: مو کنا کليقله کا رومه مو، کي رويت کا سفوفو سفويغ، بري تاهو کا دي بالس مان توهن قولوغ مو! اورغ ماسوق هنتو

فون ګي رويت رات ۲ دالم بندر، اف هق عيسى بوات تولوغ دي.

### انق ياءير دوق ساکيت

40 بيلا عيسى جمرغ لاءوت کليق، اورغ رامې هق ننټي دي کليق تو، توبيت ماري سمبوت دي.

41 اد سئورغ کتوا مسجد اورغ يېهوي، نام ياءير، ماري سجدو

42 دافن عيسى، مينتاء عيسى ګي کا رومه دي، کران انق بتينا دي

عمور دوا بلس تاهون، ساکيت تروق دکت نق ماتي، فس دي

فون اد انق سئورغ تو ساج. تغه ۲ عيسى دوق برجالن ګي

تو، اورغ رامې برسسق ترق دوق تمفوه مواکو سعمور.

### اورغ بتينا ماري جامه باجو جوبه عيسى

43 اد سئورغ اورغ بتينا، هق ساکيت تروق کلوار داره سعمور

دوا بلس تاهون ماري ده. تاءاد سياف بوليه براوبت دي بري

44 هيلغ. اورغ بتينا ني توروټ ماري کوټ بلاکغ عيسى، هولور تاغن

جامه بيراي باجو جوبه عيسى. داره فون برادو سلالو.

45 فس عيسى تان: سياف جامه اکو ساءني؟ بيلا تاءاد سياف

مفاکو، سئورغ صحابه عيسى هق نام فيتروس کات: ايه، توان

ګورو! اورغ دوق سسق ترق ني، فس تمفوه توان ګورو سعمور!

46 تافي عيسى کات: بق! اد سئورغ هق کهندق نق جامه اکو،

سبب اکو براس کات کواس توبيت دالم توبوه کو!

47 بيلا اورغ بتينا نمفق کات دي تاءليه سوسوف ده، دي ماسوق

سجدو فد عيسى دغن کتر کنالغ، فس مفاکو دافن اورغ رامې

تو، کات سبب اف دي نق جامه باجو عيسى. فس دي رويت

بالس مان فپاکيت دي بوليه هيلغ سلالو.

48 عيسى کات: تاءاف ميټ! کران مو فرچاي، مو بوليه سيار ده!

کليقله دغن سلامت!

### انق ياءير بوليه هيدوف كليق

- 49 تکه عيسى دوق کات بلس تو، اد اورغ باوا خبر ماري درومه ياءير، کتوا مسجد سائي. اورغ ني رويت کات: انق توان ماتي ده. تاهه بري توان کورو کادوه کيله!
- 50 تافي عيسى دغر فرکتان ني، فس کات کا ياءير: جاغن تا کوتله! مو فرچاي، سوده، فس انق مو نق سيار سمولا!
- 51 بيلا سمفي درومه ياءير تو، عيسى لارغ، تاهير بري سياف ماسوق ملينکن تيگ اورغ صحابه دي، نام فيتروس، يحيا دغن يعقوب، سکالي دغن ايبو باف بوق بتينا تو.
- 52 اورغ حق اد درومه تو دوق ترياق تاغيس سما، کران بوق تو ماتي، تافي عيسى کات: مو تاهه دوق ترياق تاغيس له! دي تاهه ماتي، دي دوق تيدور ساج!
- 53 سما اورغ تو فون فاكت سوک مغنجيغ کا عيسى، سبب فواق دي تاهو کات بوق تو ماتي سوغکوه.
- 54 لفس تو، عيسى ماسوق دالم رومه، فکغ تاغن بوق تو، کات: ميقي، هي ميقي! باغونله ميقي!
- 55 فس روح فون ماسوق كليق سمولا دالم توبوه بوق بتينا تو. دي فون باغون ساللو، فس عيسى سوروه اورغ بري ماکن کا دي.
- 56 ايبو باف بوق ني، براس حيران، تافي عيسى لارغ دي، تاهه سير بري رويت کا سياف حال ني.

### باب 9 عيسى بري صحابه دوا بلس اورغ کي باوا تيته دي

- 1 عيسى فغکيل صحابه دوا بلس اورغ تو ماري ماسوق دکت، فس سوروه دي توبيت کي باوا تيته عيسى سنديري، دغن کواس بوليه همبت هنتو توبيت، اتوا بري سيار سما فپاکيت کاتيقي.
- 2 فس عيسى سوروه فواق ني توبيت کي رويت خبر کات، سمفي

- ده ماس توهن نق ماري امبيق فرينته اتس مائسي، فس ري  
 سوروه فواق تو بري هيلغ سماو فپاکيت اورغ.
- 3 عيسي فسن کا دي کات: مونق کي ني، جاغن باوا، اف سکارا  
 فون، سروف توغکت، کندي هق نق بوات مينتا، بکل، دويت  
 اتوا کائين فکايين نق ساليين فون، تاءسه باوا، جوگ.
- 4 تمفت مان اورغ سمبوت مو، مو دودوقله درومه اورغ تو، هيغگ  
 سمفي مونق تيغگل تمفت تو فول.
- 5 تمفت مان اورغ تاءسير سمبوت مو، تيغگلله سلالو، تمفت تو.  
 فس مونکنا کلبس دبو تانه دکاکي مو، جادي تندا کا فواق تو  
 کات فواق تو ساله.
- 6 صحابه ۲ عيسي فون توبيت کي، فس برجالن کو، دالم سماو  
 کمفوغ، بلغ ۲ رويت خبر يغ بائیک تو، بلغ ۲ بري سيار فپاکيت  
 اورغ.

### راج هيرو دغر چارا حال عيسي

- 7 هيرو هق جادي راج دالم چغواد کاليل ماس تو، بيلا ري  
 دغر سماو فرکارا هق عيسي دوق بوات، ري براس کليرو، فايه  
 نق ارتي. سبب اورغ کات: عيسي نيله يحييا هق بري روکون  
 مندي تو، هق هيديوف کليق سمولا فول!
- 8 تافي اورغ لائين کات: دق! دي نبي الياس هق تيمبول ماري  
 سمولا! فس، ار جوگ، اورغ کات: عيسي جايي نبي لائين هق  
 دولو، هق هيديوف کليق سمولا.
- 9 فس، هيرو سنديري کات: ايه! اکو سوروه اورغ فنچوغ کفلا  
 يحييا ده، فس سياف فول هق دوق بوات سماو فرکارا ني؟ هيرو  
 فون دوق فيسه چاري جالن نق برتمو دغن عيسي.



### عیسی بری ماکن کا لیم ریپو اورغ

- 10 بیلا صحابة ۲ عیسی کلیق ، دی رویت کا عیسی سمو  
فرکارا هق دی بوات. فس، عیسی باوا فواق دی کی کا تمفت  
نم بیت صائیدا، دغن تا رویت کا سیاف.
- 11 تافی باپق اورغ تاهو جوگ، فس فاکت نق توروت دی کی. بیلا  
تمو، عیسی فون سمبوت دی، فس مغاجر دی چارا حال فرینته  
توهن اتس ما نسی. فس، اورغ مان ۲ هق نق بری عیسی تولوغ،  
دی فون تولوغ بلاک، بری سیار سمو فپاکیت.
- 12 دکت متھاری نق جاتوه، صحابة دوا بلس تو ماری سام عیسی  
کات: باءیک توان سوروه اورغ رامی نی کی چاری تمفت ماکن  
نق تیدور، دالم کمفوغ ۲ دکت نی. سبب سینی رومه تا اد!  
13 تافی عیسی کات: موله بری ماکن کا دی! صحابة جواب کات:  
کیت اد روتی لیم بوتیر، ایکن دوا ایکور ساج! توان نق  
سوروه کیت کی بلی که، نق بری ماکن اورغ بریپو ۲ تو؟
- 14 کران اورغ هق دوق اد تو، لبیه کورغ لیم ریپو اورغ. عیسی  
فون کات کا صحابة: سوروه سمو اورغ دودوقله، بری جادی  
15 ستومفوق ۲، ستومفوق لیم فولوه اورغ. صحابة ۲ فون بوات هق  
عیسی سوروه، فس سمو اورغ تو دودوق بلاک.
- 16 فس، عیسی امبیق روتی لیم توغکول دغن ایکن دوا ایکور تو  
لغکق ناءیک کا لاغیت اوچف تریم کاسیه کا توهن، فس  
چوبیق روتی دغن ایکن تو، کهور ۲ بری کا صحابة، سوروه  
دی بهاگی کا اورغ رامی تو.
- 17 سمو اورغ رامی تو ماکن کیغ بلاک. فس هق لبیه اورغ ماکن  
تو، فواق صحابة ۲ عیسی امبیق فرهیمفون ۲، بوبوه دالم  
باکول، بولیه دوا بلس باکول فنوه.

### عيسى جادي اورغ فريښت ستارا مان؟

- 18 فد ساتو ماس، عيسى دوق برعنا سئورغ، فواق صحابه ۲  
 دي فون اد جوگ، فس عيسى تان دي: اورغ رامي کات بالس مان  
 چارا حال اکو؟ اکو جادي فريښت مان؟
- 19 صحابه ۲ فون جواب: اد اورغ هق کات توان ني جادي يحياء،  
 هق بري اورغ تريما روکون مندي تو. فس اد جوگ، هق کات  
 توان جادي نبي الياس، هق هيديوف کليق سمولا. فس اد لاکي  
 هق کات، توان نبي سئورغ لاکي، دالم نبي ۲ بولو تو.
- 20 عيسى تان فول: فواق مو سنديري فون، مونق کات بالس مان؟  
 اکو جادي اورغ فريښت مان؟ صحابه دي هق نام فيتروس جواب  
 کات: توان جادي المسيح هق توهن جنجي تو!
- 21 فس، عيسى فسن کا سموا صحابه ۲ دي کات: مو جاغن رويت  
 کا سياف ۲ ديه!

### عيسى رويت حال سيقسا دي کوء دافن

- 22 لالو عيسى هوري تمبه لاکي کات: اکو مائيسي هق تورون  
 دشرگ ني، مستي کنا تريما سيقسا هق تروق. کتوا ۲ اورغ  
 يهوي کيت، دغن امام ۲ بسر، سکالي دغن کورو ۲ تورات،  
 سموان نق فاکت جبيه کا اکو. لفس تو، اکو نق کنا بونوه،  
 فس دالم تيگ هاري، توهن نق بري اکو هيديوف کليق سمولا.
- 23 لفس تو، عيسى مفاجر کا سموا مريد ۲ دي کات: سياف ۲ نق  
 تورو کي سکالي دغن اکو، اورغ تو کنا ترلوف راءيب کا ديري  
 دي گنف ۲ هاري، امبيق فاکي کايو امت چابغ هق ترهينا تو،  
 تورو اکو کي.
- 24 کران سياف ۲ دوق ترايغت کا ديري دي نق بري سلامت، اخير  
 پاوا دي نق روکي. تافي سياف ۲ جوغ سره پاوا دي، کران

- 25 ښو کاسيه کا اکو، تننو ښو نق بوليه سلامت پاوا ښو راخيره.  
کران اف فایده کا اورغ هق بوليه لاب سرب سروبي دنيا تافي  
سود سکالي، پاوا ښو سنديري کنا روکي هابيس؟ تاهه فایده  
سيکيت هابوق!
- 26 کالو اد اورغ مالو مفاکو کا اکو، اتوا فغاگران کو، عيسی کات،  
ننتي، بيلا اکو مائسي هق تورون دشرک ښو نق ماري کا دنيا  
فول، اکوفون نق مالو مفاکو کا اورغ تو جوگ! ياءيت فد ماس  
اکو نق ماري دغن کمليان کو، فس دغن کمليان باف کو، سکالي  
دغن ملائیکه ۲ هق سوچي کاتيقي.
- 27 تافي ايغته! عيسی کات، دالم رامي ۲ دسيني، اد سفواق هق  
تغه دوق اد لاگي اتس دنيا. بلوم فد ښو ماتي، ښو نق بوليه  
نمفق توهن لتق فرينته ښو دغن سمفرن، دالم هاتي مائسي.
- 
- روف عيسی براوبه بري نمفق کمليان ښو
- 
- 28 لفس فد هاري عيسی رويت سموا فرکارا ښو، لافن هاري فول،  
عيسی باوا، صحابه تيگ اورغ کي نايک اتس ساتو بوکيت،  
نق برعا. نام صحابه تو، فيتروس، يحييا دغن يعقوب. فس
- 29 تغه عيسی دوق برعا تو، تيبا ۲ روف ښو براوبه، کائين  
فکايين ښو جادي فوتيه جلفق، سرووف چهيا هق چره چراچ.
- 30 تيبا ۲ اد دوا اورغ لاگي، دوق برکيچيق دغن عيسی، ياءيت ښي  
موسی دغن ښي الياس.
- 31 روف ښو فون برسینر جوگ، دغن کمليان هق توهن. ښي دوا  
اورغ تو دوق کيچيق چارا حال عيسی، کات تاهه لام ده عيسی نق  
ماتي دکوت جروسليم. بالس تو نق بري سمفرن توجوان توهن.
- 32 تکه عيسی دوق برکيچيق دغن ښي دوا اورغ تو، فيتروس دغن  
سائين ۲ ښو دوق مغنتوق، فس بيلا ښو جاگ تيدور، بارو ښو  
نمفق کمليان عيسی دغن دوا اورغ ښي سائي.

- 33 بيللا فييتروس تيغوق نبي سائي نق هوندوركي، بي فغكيل عيسى كات: هي توانكو! موليقله كيت دوق دسيني! كيت نق بوات بغسل تيگ تمفت، انتوق توانكو سا، انتوق نبي موسي سا، فس انتوق نبي الياس سا. سسوغكوهن فييتروس كيچيچ بالس تو، دي تاء تاهو اف مقصود هق دي كات تو.
- 34 تغه فييتروس دوق كيچيچ فون، ار اون ماري مليندوغ تمفت دي دوق تو. فواق صحابة فون براس تاكوت، دوق دالم اون تو.
- 35 تيبا ۲، بويي سوارا دالم اون كات:
- اينيله انق كو، هق اكو فيليه ده. مو كنا بغرله كا دي!
- 36 بيللا سود سوارا تو، فواق صحابة نمفق عيسى دوق سئورغ دي فول. لفس تو، صحابة تيگ اورغ ني دوق ديام، تاء رويت كا سياف، كجادين هق دي نمفق هاري تو.

### عيسى همبت هنتو توبيت د بوق

- 37 فاكي ايسوق، بيللا عيسى تورون دبوكت دغن صحابة ۲ تو، اورغ رامي توبيت ماري سموت دي.
- 38 ار سئورغ دالم فواق ني فغكيل عيسى دغن سوارا درس مينتاء تولوغ: توان گورو! دي كات، ماريله تيغوق انق امب! ار سئورغ ني ساج، فس لاني دي ماسوق هنتو!
- 39 تكه دي ماسوق هنتو، بوات بري دي جريت سوارا درس، گلفر ۲، مولوت يويه، فس هنتو بوات سيقسا كا دي سمفي
- 40 هابيس ريغ، بارو توبيت. امب ماري مينتاء مريد ۲ توان گورو تولوغ همبت هنتو توبيت، تافي دي نق همبت تاءليه!
- 41 عيسى فون كات كا اورغ رامي تو: ايه! فواق مو كورغ فرچاي ساغت! تنتو مو تاءليه بوات هق كنا! لام مان لاكي اكو كنا دوق سكاللي دغن مو، كنا صبر دغن مو؟ فس، دي فالبيغ تاڄ چي بوق تو: مان انق مو؟ باوا دي ماري سيني!

- 42 تغه اورغ باوا<sup>۹</sup> بودق ماري کا عيسی، هنتو بوات بري بودق تو ربه گلغرم<sup>۲</sup> دتانه، تافي عيسی لارغ هنتو، بري دي دوق ديام. بيللا سيار موليق ده، عيسی بري بودق تو کليق کا چي<sup>۱</sup> دي.
- 43 سموا اورغ دسيتو فون براس حيران، بيللا دي نمفق کواس توهن، بسر گيتو لالو.

### عيسی رويت فول حال کماتين دي

- اورغ رات<sup>۲</sup> تمغت براس حيران تيغوق فرکارا هق عيسی دوق بوات. فد ماس تو جوگ، عيسی رويت کا فواق صحابة دي بالس ني: مو دغرله هق اکو نق رويت ني. تءلام لاگي اکو مءنسي هق تورون دشرگ ني، نق کنا سره کا تاغن مءنسي.
- 44 تافي فواق صحابة تاءرتي لاگي، معنا هق عيسی رويت تو، سبب عيسی سوسوف لاگي کا دي، تاءبري فهم سلالو. فس تاءاد سياف براني نق تان عيسی: اف معنا تو؟
- 45

### اورغ مان فريغتک تيغکي؟

- 46 صحابة<sup>۲</sup> عيسی دوق بحس سام سنديري نق تاهو اورغ مان دالم فواق دي فريغتک تيغکي.
- 47 عيسی تاهو ده فيکيران دي. دي امبيق بودق ماري، سوروه برديري دکت دي. فس عيسی کات کا صحابة<sup>۲</sup> دي:
- 48 کالو مو سمبوت اورغ رنده سروف بودق ني، کران اکو، سروف مو سمبوت اکو ده. فس، سياف دي سمبوت اکو، سروف سمبوت ده توهن، هق سوروه اکو ماري ني! سبب اورغ هق بري ديري دي رنده سکالي دالم فواق مو، دiale هق فريغتک تيغکي سکالي.

---

تاء لاون دغن مو، سروف دوق سبله مو

---

- 49 يحييا رويت كا عيسى: توان گورو! كيت تمو سئورغ، دوق همبت هنتو توبيت دغن فاكي نام توان. تافي كيت لارغ دي، سوروه برادو، سبب دي تاء جاني فواق كيت!
- 50 تافي عيسى كات كا يحييا دغن صحابة ۲ سموا تو: جاغن مو لارغ له! كالو دي تاء لاون دغن مو، سروف دي دوق سبله مو.

---

كمفوغ اورغ سماريا تاء سير بري عيسى ماسوق

---

- 51 بيلا دكت نق سمفي ده، ماس عيسى كنا ناء يك كليق كا شرگ، دي فون فاليج هادف كو كوت جروسليم، دغن نيات هاتي نق كي.
- 52 ار دوا اورغ هق عيسى هنترگي دولو. فواق ني كي سمفي ساتو كمفوغ دالم نكري سماريا، برهنتي سيتو نق سيف تمفت بري فواق عيسى دودوق سملامن.
- 53 تافي اورغ دوق كمفوغ سماريا تو، تاء سير بري فواق عيسى ماسوق، كران دي تاهو كات، فواق تو اورغ يهودي هق نق كي كا كوت جروسليم.
- 54 بيلا صحابة عيسى نام يعقوب دغن يحييا دغر حال كمفوغ سماريا ساءني، دي فون كات كا عيسى: هي توانكو! توان نق كا بق، كالو كيت مينتاء افي دشرگ تورون اتس اورغ كمفوغ تو؟
- 55 تافي عيسى لارغ دي، تاء سير بري كيچيق بالس تو.
- 56 فس، دي كي كا كمفوغ لاءين فول.

---

اورغ ۲ هق نق توروت عيسى

---

- 57 تغه عيسى دوق برجالن دغن فواق دي تو، ار سئورغ ماري كيچيق دغن عيسى كات: توان گورو نق كي كا مان ۲ فون،

- امب نق توروت کي بلاک!
- 58 عیسی فون جواب دغن عبارة: انجیغ سریگالا اد لوبغ دي، بوروغ اد سارغ دي، تافي اكو مائسي هق تورون دشرگ ني، تاءار تمفت بولیه تیدور امبیق ریغ!
- 59 اد سئورغ لاگي، هق عیسی سوروه توروت دي کي. تافي اورغ تو کات: توانکو، امب نق تیغل دلو دیه، کلیق کي دوق دغن ایه، هیغگ سمغي دي ماتي سیمن سیف ده، بارو امب ماري فول نق توروت توان.
- 60 تافي عیسی کات کا اورغ ني: بلر اورغ ماتي تشکوغ سام ۲ سندیري! موله کنا کي رويت خبر کا اورغ کات: توهن نق ماري امبیق فرینته دي دهاتي مائسي.
- 61 فس اد سئورغ لاگي ماري کات کا عیسی: امب جنجي ده، نق توروت توانکو، تافي امب نق مینتاء کلیق دلو، نق اوچف سلامت تیغل کا ادیق برادیق دکمفوغ، بارو نق توروت توان.
- 62 تافي عیسی جواب کا اورغ ني: میسل کات اورغ دوق برگالا، فس دي فالیغ تیغوق کو، بلاکغ سعمور. اورغ سروف تو تاء سوغ نق دوق دالم فرینته توهن، کرج کا دي.

### باب 10 عیسی هنتر کي مرید دي توجوه فولوه دوا اورغ

- 1 لفس فد تو، عیسی فیلیه مرید ۲ دي توجوه فولوه دوا اورغ، نق هنتر دي کي دوا اورغ، دوا اورغ، کا سماو تمفت عیسی نق کي.
- 2 عیسی فسن فواق ني کات: اورغ نگري ني دوق ننتي، میسل سروف فادي دوق ماسق دبنده، بايق، تاءان نق کتم. فواق مو فون کنا برعا کا توان فادي، مینتاء دي سوروه اورغ کي مغم!
- 3 فواق مو فون گيله، عیسی کات، اكو هنتر مو کي سروف بیرغ دوق کفوغ دانجیغ.

- 4 مو تاهه باوا، بيگ دويت، اتوا گالس، اتوا کاسوت نق بوات  
ساليں فون، فس جاغن برهنتي کيچيق تغه جالن!
- 5 رومه مان مو نق برهنتي، مو بري سلام کا توان رومه دولو،  
کات: امب مينتاه سلامتله، اتس فواق رومه مو ني!
- 6 کالو توان رومه ستوجو دغن هق مو دوق اوچف تو، بلرله!  
سلام مو دوق اتس دي. کالو توان رومه تاهستوجو، بلرله!  
سلام مو نق کليق فد مو سمولا.
- 7 فس دودوقله درومه هق سمبوت مو تو. مو بوليه ماکن درومه  
تو دغن تاهالو، کران سوغ فاتوت اورغ بوات کرج نق ماکن اوفه.  
فس تکه دوق سييتو، مو جاغن براليه دوق رومه تو، رومه ني.
- 8 کمفوغ مان هق بري مو ماسوق بالس ني، مو بوليه ماکنله سموا  
9 هق دي بري. فس مو کنا تولوغ بري سيار اورغ ساکيت سييتو،  
بلغ ۲ رويت خبر کات: دکت ده، ماس توهن نق تورون امبيق  
فرينته دي اتس فواق مو!
- 10 تافي، عيسي کات، کالو مو ماسوق دالم کمفوغ اورغ تاهسير  
تريما، مو کيله جالن بسر، تمفت اورغ رامي، رويت کا دي:
- 11 دبو تانه کمفوغ مو هق دوق لکت دکاکي اکو، نق کلبس بري  
کليق هابيس. فس ايغتهله! تاهلام ده، توهن نق تورون فرينته  
دي اتس فواق مو جوگ!
- 12 فس عيسي رويت کا مريد ۲ دي لاگي: فد هاري قيامه، توهن نق  
تنجوق کسياغ بلس لبيه بسر، کا اورغ نگري صودوم هق جاهت  
سکالي، فد اورغ دکمفوغ هق تاهسمبوت مو تو!

### بندر ۲ هق تاهسير فرچاي

- 13 فس عيسي کات لاگي: هي اورغ خورازين! هي اورغ بيت  
صاهيدا! نق تروق سوغگووه، فواق ۲ مو! کالو اورغ دبندر صور،  
دغن بندر صيدون هق فونه ده تو، اد فلواغ دولو بوليه تيغوق



- فرکارا ۲ فلیق هق اکو دوق بوات دغن کواس توهن ، دالم بندر ۲  
فواق مو ، تنتو دي توبه لام ده ، فس فاكي کائین کاسر دغن  
بویه هابو اتس کفلا ، جاني تنداکات دي سسل کران دوسا دي.  
14 فد هاري قیامة ، عیسی کات ، توهن نق تنجوق کسیاغ بلس  
لبیه بسر ، کا اورغ ۲ بندر صور دغن بندر صیدون تو ، فد دي  
نق تنجوق کا فواق مو ، اورغ خورازین دغن اورغ بیت صاید!  
15 فس فواق مو هق بندر کفرناحوم فول ، عیسی کات . مو نق  
اغکیت دیری مو بري سمفي کا لاغیت که ؟ ننتي تیغوقله ! تمفت  
مو نق جاتوه دنراک!  
16 فس عیسی کات لاکي کا مرید ۲ دي : سیاف ۲ نق دغر فرکتان مو ،  
سروف دي دغر فرکتان اکو جوگ . سیاف ۲ تاسیر دغر فرکتان  
مو ، سروف دي تاسیر دغر فرکتان اکو جوگ . سیاف هق تاء  
سیر تریما اکو فون ، سروف اورغ تو تاسیر تریما دي هق  
سوروه اکو ماري کا دنیا .

### مرید ۲ توجوه فولوه دوا فون کلیق ده

- 17 تاءلام ، مرید توجوه فولوه دوا اورغ تو ، کلیق ده دغن سوک  
هاتي ، کات کا عیسی : هي توانکو ! سمفي کا هنتو شیطن فون  
کنا توروت فرینته فواق کیت ، تکه کیت همبت دغن سبوت نام  
توانکو!  
18 عیسی فون کات کا دي : اکو نمفق کفلا هیلیس جاتوه تورون  
19 دلاغیت سروف کیلت . سوغکوه اکو بري کواس کا فواق مو کاتیق .  
کالو مو جیجق اولر اتوا جغکیغ فون ، تاءاف . کواس مو لبیه  
فد کواس شیطان ، هق جاني سترو مو . فس تاءاف سکارا ،  
هق بولیه خیانة کفد مو .  
20 تافي جاغن مو بسر هاتي سبب فواق هنتو شیطان کنا توروت

فرينته مو، نق! مو کنا بسر هاتي سبب نام مو دوق توليس  
ده دالم بنچي د شرگ.

### روح توهن بري عیسی براس سوک هاتي

- 21 فد ماس تو جوگ، روح توهن بري عیسی براس سوک هاتي  
سوځکوه. يي کات: يا توهن، باف کو، هق دوق فرينته اتس  
لاغيت اتوا ربومي فون! اکو اوچف تريما کاسيه، کران فرکارا  
هق توهن سوسوف درفد اورغ هق مجاجي تيغکي، لاني بوک  
ده، بري تاهو کا اورغ فريغکت رنده هق تاءاد علمو.
- 22 يا باف! بالس نيله هق باف برکنن نق بوات!  
فس عیسی کات لاگي: باف کو سوده بري سموا فرکارا کا اکو، نق  
فرينته. تاءاد سیاف بوليه تاهو حال انق یغ ساتو سوځکوه،  
ملینکن باف ساج، فس تاءاد سیاف بوليه تاهو حال توهن  
باف، ملینکن انق یغ ساتو، سکالي دغن اورغ مان ۲ هق انق  
یغ ساتو تو اد حاجت نق بري کتل دغن توهن باف.
- 23 فس عیسی فالیغ کيچیق دغن فواق صحابه يي، تاءاد بري اورغ  
لائین دغر، کات: فواق مو براونتوغ سوځکوه، کران مو بوليه
- 24 تيغوق سموا فرکارا ني! سبب بايق اورغ، نبي ۲ دغن راج ۲  
فون، براس نق تيغوق نق دغر، فرکارا هق فواق مو دوق  
تيغوق دوق دغر، ماس لاني، تافي يي تاءاد فلواغ سروف مو.

### حکوم هق مستحق سکالي، حکوم کاسيه

- 25 اد سئورغ کورو کتاب تورات، ماري نق چاري هيده، بري  
عیسی کيچیق ساله. توان کورو! يي تان، امب کنا بوات  
لاگو مان نق بوليه هيديوف هق ککل؟
- 26 عیسی فون تان کورو تورات کليق کات: کتاب تورات رویت لاگو

27 مان؟ گورو نق تفسیر بالس مان؟ گورو تورات فون باچ دوا  
ایات بری دغر:

مو کنا کاسیله کا رپی، توهن مو، دغن سفنوه هاتي،  
دغن سفنوه راس، دغن سفنوه کواس، فس دغن سفنوه  
فیکیران مو. فس، مو کنا کاسیله سام ۲ مائسي،  
سروف مو کاسیه کا ډیری مو سندیري.

28 کالو بالس تو، عیسی کات، بواتله تورتوت حکوم تو، فس گورو  
نق بولیله هیدوف حق ککل.

29 تافي گورو سائي نق بتول کا ډيري يي. يي فون تاش عیسی  
قول: تافي اورغ مان حق امب کنا کات جايي سام ۲ مائسي دغن  
امب ني؟ عیسی فون جواب دغن عبارة دالم چریتا ني:

چریتا اورغ سماریا حق کاسیه سوغکو

30 ساتو اورغ کنا توبیت رکوت جروسلم برجالن کي کا بندر  
جریکو، عیسی کات. تغه جالن، يي کنا سامون. فکاین يي  
رمفس هابیس، فواق فپامون گودم يي رکت نق ماتي، فس  
تیگل کي.

31 لفس تو، اد سئورغ امام یهوي برجالن ماري کوء تو. تیبا ۲،  
نمفق اورغ حق کنا گودم سائي. توء امام فون قیاس کي کوء  
تفي، تیگل يي کي.

32 لفس تو فول، سئورغ لیوی ماري کوء جالن تو. تیبا ۲ نمفق  
اورغ تو، فس يي فون قیاس کي کوء تفي، تیگل کي جوگ.

33 تافي اد سئورغ لاکی، اورغ بغسا سماریا، ماري کوء تو جوگ.  
بیلا يي نمفق اورغ کنا گودم سائي تو، يي براس کسیاغ بلس.

34 يي فون ماسوق رکت، امبیق میق چمفور ایر بواه جابیت،  
بوات اوبت بوبوه دتمفت لوک اورغ تو. بیلا باروت ده لوک،

- 35 ڊي فون موات اورغ ساڪيت اتس ڪودا ڊي، هيريت ڪي سمفي تمفت اد رومه سيوا.
- 36 ڊي دوق بلا اورغ ساڪيت سييتو، سمفي فاڪي ايسوق، فس چابوت دويت امفت فولوه ڪوف، بري ڪا توان رومه، سوروه ڊي بالس ني: تولوغ بلا اورغ ني ڊيه! ڪالو تاءچوڪوف دويت امب بري ني، ننتي نق ماري باير سمولا!
- 37 بيلا عيسيٰ رويت سوده، چريتا ني، ڊي فالبيغ تان ڪا ڪورو تورات فول: دالم تيگ اورغ سائي، اورغ مان هق بوات سروف سام ۲ ماءنسي دغن اورغ هق ڪنا سامون تو؟ ڪورو تورات فون جواب: اورغ ڪسياغ بلس ڪا ڊي، جيلا! عيسيٰ ڪات: ڪالو بالس تو، مو ڪيله، بوات سروف ڊي!

### عيسيٰ ڪي ڪا رومه اورغ دوا برانيق

- 38 تڪه ۲ عيسيٰ دوق برجالن دغن صحابه ۲ ڊي، ڊي ڪي سمفي ساتو ڪمفوغ، فس اورغ بتينا نام مرت اجق عيسيٰ نايڪ ڪا رومه ڊي.
- 39 مرت اد اديق نام مريم. ڊي دوق فرهاتي دڪاڪي عيسيٰ، نق دغر فغاجران ڊي.
- 40 تافي مرت ڪادوه ساغت دغن ڪرج ڪوءدافور. فس ڊي توبيت دافور ڪي تمفت عيسيٰ، ڪات: هي توان! توان تاءتيغوق ڪه؟ اديق امب دوق لق امب ڪرج سئورغ ڪوءدافور! سوروه ڊي ماري تولوغ ڪاتيقله!
- 41 عيسيٰ فون جواب ڪا ڊي: مرت، مرت! باءاف مو ڪادوه ساغت،
- 42 بيمبغ بايق فرڪارا؟ مو تاءتاهوڪه، ڪرج مان هق لبيه مستحق؟ هق تو مريم فيليه ده. فس سبب تو، تاءاد اورغ بوليه امبيق هق ڊي فيليه ده تو.

## عيسى اجر جالن برعنا

## باب 11

- 1 عيسى دوق برعنا دساتو تمفت. لفس برعنا ده، ار سئورغ صحابة ماري كات كا ري: هي توان گورو! تولوغ اجر كيت گاتيقي، بري بوليه مينتاء دعا سروف نبي يحيا اجر مريد ري!
- 2 عيسى فون اجر ري بالس ني: بيلا مو مينتاء دعا توروتله هق ني! يا باف كو،  
بريله سموا اورغ سجود جرمة كغد نام باف تو.  
بري سمفيله ماس، هق باف نق امبيق فرينته بري سمفرن،  
3 دالم دنيا. بريله مكانن كا فواق اكو گاتيقي، چوكوف انتوق كنف هاري.
- 4 امفونله سموا كسلاهن فواق اكو ني، كران اكو معاف ده كا سموا اورغ هق بوات ساله كا اكو.  
فس، جاغن باف بري فواق اكو كنا فنچوبائن  
هق برت ساغت. امين.
- 5 لفس تو، عيسى رويت ساتو چريتا كات:
- 6 ميسل كات مو ار سائين، فس فوكول دوا بلس تشه مالم، مو كي كا رومه سائين تو، فشكيل ري: هي كاون كو! نق براوتغ برس تيگ چوفق ريه، نق تانق بري ماكن كا اورغ ماري جائوه، بارو سمفي!
- 7 فس، ميسل سائين مو دوق جواب دالم رومه كات: مو جاغن بوسن كق! اكو كاتوف فينتو ده، اورغ دالم رومه دوق تيدور بلاك. اكو فايه نق باغون امبيق برس بري كا مو!
- 8 نق جاني بالس مان فول؟ عيسى تان. سوغكوه، بوكن سائين مو نق باغون بري اف ۲ كغد مو سبب مو جادي سائين ري. تافي، سبب مو دوق تبليغ مينتاء، تنتو ري نق بري هق مو كهندق تو.

- 9 بالس توله ، اكو فسن كا فواق مو ، عيسى كات ،  
تبېغ مینتاء له دغن توهن ، بارو توهن نق بري .  
چارېله درفد توهن ، بارو مو نق برتمو .  
فغکيلله کات نق ماسوق ، بارو توهن نق بوک ساتو فینتو  
انتوق مو .
- 10 کران سیاف دوق مینتاء ، کا اورغ توله توهن نق بري ،  
سیاف دوق چاري فون ، اورغ توله نق برتمو ،  
فس ، کا اورغ هق فغکيل نق ماسوق فون ، توهن نق بوک  
فینتو تو .
- 11 فواق مو هق جادي اييو باف فون ، عيسى کات ، کالو انق ماري  
12 مینتاء ايکن اتوا تلور ، مو نق ايکت اولر اتوا جغکيغ که بري  
کا انق مو تو؟ بق !
- 13 سوغکوه فون فواق مو فراغي جاهت ، تافي مو تاهو بري بارغ ۲  
هق موليق کا انق ۲ مو . کالو کيتو ، لبیه ۲ لاگي توهن باف  
مو دشرگ فون ، نق بري روح سوچي هق دي ، کا اورغ هق  
تبېغ مینتاء دغن دي .

### کواس عيسى دغن کواس هييليس

- 14 فد ساتو هاري ، عيسى دوق تولوغ اورغ هق ماسوق هنتو  
جادي بيسو . با همبت هنتو توبيت ، اورغ تو فون بوليه کيچيق  
سلالو . اورغ رامي تيغوق حيران .
- 15 تافي ار اورغ هق کات : تنتو دي امبيق کواس دبعيل زبول ،  
کفلا هييليس تو ، بوليه همبت هنتو توبيت بالس ني !
- 16 ار جوگ اورغ ماري سويي عيسى ، سوروه دي بوات فرکارا فليق ،  
نق تاهو دي ماري دشرگ کا بق .
- 17 تافي عيسى تاهو توجوان اورغ تو ، فس فاکي عبارة کات کا دي :  
کالو ساتو نگرې فچه بله جادي فواق ۲ هق لاون سام سنديري ،

- تنتو نڱري تو تاهن لام . اورغ دالم سبواه رومه فون ، کالو ري  
فچه بله ، تنتو تاهن لام نق جادي هنجور .
- 18 فرينته کفلا هيليس فون تاهن لائين فد ني ، عيسى کات . کالو  
فواق ري دوق برلاون سام سنديري ، نق تاهن لام بالس مان ؟  
تاهن ليه ! فواق مو کات اکو امبيق کواس دبعيل زبول ، کفلا  
هيليس تو ، بوليه همت هنتو توبيت .
- 19 کالو کيتو ، عيسى کات ، اورغ دالم فواق مو هق فندي همت  
هنتو توبيت ، ري امبيق کواس ري دمان ؟ تان ديه ! تنتو  
جوافن ري نق بري تاهو ، هق مو ادو کا اکو ني ، بوهوځ .
- 20 جادي دغن کواس توهن ، اکو بوليه همت توبيت هنتو ۲۰ .  
فس ، هق ني جادي تندا چرف کات ، توهن تورون ده اتس  
فواق مو ، نق امبيق فرينته ري .
- 21 فس ميسل لاکي ، عيسى کات . توان رومه ار سنجات چوکوف  
لغکف نق جاځ رومه ري . تکه تو ، بارغ ري دوق موليق .
- 22 تافي ، کالو هق کواس لبيه ماري نق لاون دغن ري ، ري نق  
هاله کا اورغ تو ، فس اورغ تو نق امبيق سموا سنجات ، هق  
بياس فاکي بوات جاځ رومه ، نق بهاکي کا فواق ري فول .
- 23 سياف تاهن سیر دوق سبله اکو ، عيسى کات ، سروف ري لاون  
دغن اکو . فس سياف تاهن سیر تولوغ اکو بري جادي سفواق ،  
تنتوله ري نق بري فواق تو فچه بله .

---

هنتو کنا همت توبيت ، ننتي نق ماسوق فول

---

- 24 فس عيسى مغاجر لاکي دغن عبارة ، کات : هنتو هق کنا  
همبت توبيت دتوبوه اورغ ، ري نق برجالن کي ماري دالم  
فادغ ، دوق چاري تمفت نق دودوق . کالو چاري تاهن مو ، هنتو  
نق کات : ها ! اکو نق کليق دوق تمفت سديا تو !

- 25 فس سمفي کا تمفت سدیا تو، تیغوق تمفت تو دوق چوچی  
برسیه ده.
- 26 فس هنتو سائي، يي کي چاري ساءين ۲ يي، توجوه ايکور هق  
بيغکیغ فد يي لاگي، اجق يي ماري دوق سکالي دالم تمفت  
سدیا تو، نق جاني رومه يي. تنتوله، کاءدان اورغ تو نق  
تروق لبیه فد دولو، عیسی کات.

### اورغ هق براونتوغ سوغکوه

- 27 تکه عیسی دوق مفاجر اورغ رامي تو، اد اورغ بتینا سئورغ  
توبیت سوارا درس کات: براونتوغله اورغ هق جادي مق توان  
هق بولیه بري ماکن فیق کا توان تو!
- 28 عیسی کات کا يي: تافي براونتوغ لاگي، اورغ هق نغر فرکتان  
توهن، بوات تورو!

### تندا هق نبي یونس

- 29 اورغ رامي دسیتو، سموا دوق بریوت نق ماسوق جامه  
عیسی. فس عیسی کات: اورغ ماس لاني، هاتي تاءمولیق  
سوغکوه، سبب دوق چاري نق تیغوق فرکارا فلیق سمات تافي  
توهن تاءبري تندا مان ۲ فون کا يي، ملینکن تندا هق نبي  
یونس ساج.
- 30 کران اکو، مائسي هق تورون دشرگ ني، عیسی کات، نق  
بري جادي تندا کا اورغ ماس لاني، سروف هق نبي یونس  
بري کا اورغ نینیویه، ماس دولو.
- 31 فس بیلا سمفي هاري هق توهن نق کرت سین اتس مائسي،  
راج بتینا هق ماري دنکري بالیق هولو، ماس دولو تو، يي  
نق بریری ادو فواق مو، کات ساله، سبب يي برجالن ماري



جاءوه دسیریت دنیا ، نق دغر نصیحة هق توهن بری فندی  
کا نیی سلیمان تو . فس ، اکو نق بری مو تاهو کات ، دسینی  
لانی ، اد هق بسرفد نیی سلیمان لاکي ، تافی فواق مو تاء  
سیر دغر ، عیسی کات .

32 فس ، بیلا سمفی هاری هق نق کرت سین تو ، اورغ هق دوق  
دالم نگرې نینیویه تو فون ، نق بریری ادو فواق مو جوگ ،  
کران بیلا ری دغر خبر هق نیی یونس باواء ماری کا ری تو ،  
ری بالیق هاتی تیغگل دوسا ۲ ری . فس لانی دسینی ،  
اد هق بسرفد نیی یونس لاکي ، تافی فواق مو تاء سیر دغر ،  
عیسی کات .

### مات کیت سروف چهیا فلیتا انتوق توبوه

33 فس عیسی مغاجر لاکي دغن فاکی عبارة کات : اورغ هق  
چوچوه فلیتا ، تاءاد سیاف نق کي سوسوف اتوا فرغکوف  
دغن فاسو ، بق ! ری چوچوه فلیتا ، کي لتق دتمفت تیغکي  
نق بری چره اورغ هق ماسوق دالم رومه .

34 مات مو فون ، بولییه بندیغ کات سروف فلیتا انتوق توبوه مو  
جوگ ، عیسی کات . بیلا مات نمفق چرف ، چهیا بولییه ماسوق  
بری چره دالم سموا توبوه . تافی بیلا مات چدرا تاء نمفق ،  
جانی گلف هابیس دالم توبوه .

35 سابیت توله ، مو کنا جاگ بری مولیق ۲ ، عیسی کات . جاغن  
بری چهیا مو گلف فول !

36 کالو چهیا تو سولوه رات دالم توبوه ، تاءاد سیکیٹ هابوق ،  
تمفت گلف . نق جانی چره هابیس ، سروف مو دوق باوه  
فلیتا ، هق سولوه اتس مو چره چراچ .

### عيسى حڪوم ساله اتس فواق فريسي

- 37 بيلا عيسى سوده مفاجر تو، سئورڻ ڊالم فواق فريسي اجق  
عيسى کي ماکن ناسي ڊرومه ڊي. عيسى فون کي، ڊوبوق ڊتمفت  
نق ماکن ناسي.
- 38 تافي اورڻ فريسي سائي تيغوق براس فليق، سبب بلوم نق  
ماکن ناسي، عيسى تاء باسوه تاغن، ايكوت اتوران اوکلم يهوي.
- 39 عيسى کات کا ڊي: سوغکوه فواق فريسي مو سوگ بوات چوچي  
باليق لوار، سروف باسوه مڱوق فيگن مو، تافي باليق ڊالم  
فنهو چمر فيورورڻ، نغن بارڻ هق مو سامون ڊاورڻ نغن هاتي  
جاهت مو!
- 40 فواق مو بودوه! مو تاء ارتي که، توهن هق منجاديکن سموا.  
باليق ڊالم اتوا باليق لوار فون، ڊي تاهو بلاک.
- 41 مولي ق لاگي مو امبيق بارڻ مکنن هق ڊالم مڱوق فيگن  
تو، صدقه کا اورڻ مسکين، بارو سموا فرکاکس تو چوچي نق  
فاکي انتوق فواق مو.
- 42 هي فواق فريسي، عيسى کات، نق تروق سوغکوه اتس فواق مو!  
مو بوات نغن هالوس هالوسي، بري کا توهن سکيان ڊالم  
سفولوه، فرکاکس ۲ کولي، سروف سلاسيه، بوغا چکيه، کايو  
جينتن مانيس. تافي هق مستحق ڊالم حڪوم تورات، سروف  
بوات هق عادل، اتوا کاسيه کا توهن، مو تيغگل تاء بوات.  
جادي فرکارا ۲ ني هق مستحق مو بوات، بوکن کات تاء بري  
بوات، بق، هق لائين تو.
- 43 نق تروق سوغکوه اتس فواق مو، عيسى کات، سبب مو سوک  
ڊوق اتس کريسي هق فيسيد ڊالم مسجد مو. مو سوک چالن  
ڊالم کڊي، نق بري اورڻ حرمة سعمور.
- 44 نق تروق سوغکوه اتس فواق مو! سسوغکوهن، مو سروف قبور

هق تاء اڊ نيشان ، هق اورغ نق لالو کي ماري ، تاء تاهو کات يي  
دوق جيچق اتس بارغ بوسوق دالم قبور .

### فواق گورو ۲ تورات نق کنا حکوم جوگ

- 45 فس سئورغ گورو تورات کات کا عيسى: هي گورو! گورو کات  
بالس تو، نق بري فواق گورو تورات کيت کچيک هاتي کاتيقي!  
46 عيسى جواب کا يي: فواق مو سروف تو جوگ! نق تروق  
سوڱوه اتس فواق گورو مو، سبب مو سوروه اورغ فيکول بارغ  
برت ۲، تافي سفونتوغ جاري فون مو تاء هولور، نق تولوغ يي.  
47 نق تروق سوڱوه اتس فواق مو! سبب مو تمبون نق بوات  
فوسو اتس قبور نبي ۲، هق توءنينيق مو سنديري بياس بونوه  
48 دولو. دغن بوات بالس تو، سروف مو برکن نق بري ايغت،  
کا فرکارا هق توءنينيق مو بوات تو. کران توءنينيق مو بونوه  
نبي، فس فواق مو بوات تمفت نق بري ايغت کا يي فول!  
49 توهن هق تاهو بلاک، يي رويت ده دالم کتاب ۲ دولو، کات  
نق جايي بالس نبي. توهن کات: اکو نق هنتر نبي ۲ کا فواق  
تو، جايي فسوروه کو. تافي نبي ۲ تو، فواق تو امبيق بونوه  
ستغه، امبيق بوات پاڻ ستغه.  
50 فواق مو هق اڊ ماس لاني فون، عيسى کات، نق جاتوه باوه  
حکوم توهن بالس تو جوگ. سبب جق ددنيا نبي جايي، اڊ  
51 بونوه نبي ۲، امبيق دماس هابيل، انق توءام تو، سمفي  
کا نبي زکريا، هق اورغ بونوه دالم تمفت سوچي، تکه يي  
دوق دتغه تمفت سمبه قربان دغن تمفت هق سوچي سکالي.  
اکو رويت کا فواق مو هق دوق اڊ ماس لاني، عيسى کات،  
مو نق جاتوه باوه حکوم توهن سروف فواق تو جوگ.  
52 فس، تروق سوڱوه اتس فواق مو هق جايي گورو ۲ تورات،  
سبب مو فکغ انق کونچي هق تمفت تاروه سما علمو ددرد

توهن، تافي مو سنديري تاء بوك ماسوق، فس اورغ لائين فون  
مو تاء بري ماسوق جوگ.

53 سور رويت فرکارا ۲ ني، عیسی تیغل کي. بلغ ۲ يي توبیت  
تو، گورو ۲ تورات دغن فواق فریسی دوق تشکیغ دغن يي،  
موریه ساغت، نق لاون بحس بايق فرکارا لاکي.

54 لفس تو، فواق ني دوق ننتي دغر کیچیفن عیسی سعمور،  
نق بري بولیہ بوکو کات عیسی ساله.

### باب 12 هاتي هق تاءمولیق تاءلیه سوسوف سعمور

1 تنه عیسی دوق برجالن تو، اورغ رامي دوق برسسق ترق

نق ماسوق دکت عیسی، هیغک سمفي جیجق مو اکو. تافي  
عیسی دوق رويت بايق فرکارا کا صحابة ۲ يي دولو. يي کات:  
مو جاگ بایک ۲ له! بري ديري مو جاءوه فد اییو هق فواق  
فریسی بوبوه دالم روتي يي! فواق فریسی هق مانیس لوار،  
فاهیت دالم، کالو بندیغ بولیہ کات، هق يي بوات تو اد  
کواس سروف اییو روتي.

2 کران فرکارا هق دوق سوسوف لاني، لام ۲ نق تربوک بلاک.

3 اف ۲ مو دوق کیچیق دالم کلف فون، لام ۲ اورغ دالم چره

نق بولیہ دغر جوگ. فس اف ۲ مو دوق بیسیق دالم بلیق  
فون، لام ۲ بولیہ دغر داورغ لوار جوگ.

### کیت کنا تاکوت کا سیاف

4 هي صحابة ۲ کو، عیسی کات، مو جاغن تاکوتله کا

مانسي، هق اد کواس بولیہ بونوه توبوه کیت، هق لبیه  
لاکي تاءلیه بوات!

5 دغرله، اکو نق بري تاهو هق مان مو کنا تاکوت! توهنله،  
هق مو کنا تاکوت، کران لفس ماتي، يي بولیہ امبیق مو بوه

- دالم نراک . سوځکوه هق توله ، هق مو کما تاکوت .  
 6 بوروغ تياق هق اورغ بورق جوال ليم ايکور دوا کوفغ ، تاءار  
 سئیکور هق توهن ترلوف ، عيسى کات .  
 7 فواق مو فون ، توهن تاهو سموا ، هيڅگ سمفي بيلغ بيلاغ  
 اورت رموت مو . سابيت تو ، مو جاغن تاکوتله ! فواق مو ار  
 هرگ کا توهن لبیه فد هرگ بوروغ هق بریبو۲ ايکور لاکي .

### کيت مفاکو اتوا تاء مفاکو عيسى

- 8 فس عيسى کات لاکي ، کا صحابة ۲ دي : سياف مفاکو دافن  
 اورغ رامې کات دي جاني ميليق کو ، اکو ، مائسي هق تورون  
 دشرگ فون نق مفاکو سروف تو جوگ ، دافن ملائیکه ۲ راحيره .  
 9 تافي ، سياف تاء سير مفاکو دافن اورغ رامې ، کات دي جاني  
 ميليق کو ، اکو فون تاء سير مفاکو سروف تو جوگ ، دافن  
 ملائیکه ۲ راحيره .  
 10 کالو سياف ۲ کچيق هينا چارا حال اکو ني فون ، اورغ تو بوليه  
 امفون لاکي ، تافي سياف کچيق هينا چارا حال روح توهن ،  
 اورغ تو تاءار جالن نق بوليه امفون .  
 11 ماس کو۲ دافن ، عيسى کات ، بيلا اورغ امبيق مو کي دافن کتوا۲  
 دالم مسجد يهوي ، اتوا کي دافن کتوا۲ کراجان فون ، مو  
 تاءسه روسيغله اف مو نق جواب ، اف مو نق رويت .  
 12 فد کتيک تو جوگ ، روح توهن نق اجر مو ، بري تاهو بالس  
 مان مو کما جواب کا فواق تو .

### عبارة اورغ کاي هق بودوه

- 13 ار سئورغ دالم اورغ رامې کچيق دغن عيسى کات : هي  
 توان گورو ! سوروه کاکق امب بري کا امب کاتيقله ، فساک هق

- چيءَ ڪيت ڏولو، بري بوليءَ ڪا امب ڪاٽيٽي، سڪيان!
- 14 تافي عيسى ڪات ڪا ڏي: هي هاوڻ! بوڪن ڪرڇ اڪو نق ڪرت سين بوڪو مو ڪڏوا، اتوا نق بهائي فساڪ چيءَ مو تو!
- 15 فس عيسى ڪات ڪا اورڻ رامي تو: مو ڪنا جاگاله طبيعة طمع تو! ڪيت بوليءَ هرت بنڊا بايق ۲ مان فون، هيڊوف ڪيت تاءِ ڪاي لائي.
- 16 فس عيسى رويت ڏغن عبارة ني، نق بري اورڻ رامي ارتي: اد اورڻ ڪاي سئورڻ، تانه ڏي بوليءَ حاصلن بايق.
- 17 فس ڏي ڏوق فيڪير ڊالم هاتي ڪات: اڪو نق بوات ڪان، لتق ڊمان، حاصلن ڪو سموا؟ تاءِ ڏاڏا تمفت نق تاروه!
- 18 ها، نق بوات ڪيني! نق رومبق سموا تمفت ڪڏوڻ هق سڊيا نق بوات لائين هق بسر، بارو فادن بوبوه سموا.
- 19 فس، اڪو بوليءَ سنڻ هاتي ڪات بارڻ ڪو ڏوق ڪمس بلاڪ ده، نق بري بوليءَ فائي بايق تاهون لائي. اڪو بوليءَ برادو امبيق ريڻ ده، ماڪن مينوم بري سوڪ ۲ له! بالس توله ڏي ڪيچيڻ ڊالم هاتي ڏي.
- 20 تافي توهن ڪات ڪا ڏي: هي اورڻ بودوه! مالم ني جوگ، مو ڪنا بري پاوا مو ڪليڪ. فس، سموا بارڻ هق مو ڏوق تاروه تو، نق جادي هق سياف فول؟
- 21 بالس توله، عيسى ڪات، سموا اورڻ هق سوڪ هيٺفون هرت انتوق ڏيري ڏي، تاءِ سير ڪاي ڊفنڊاڻ توهن.

### فرڪارا هق مستحق سڪالي

- 22 فس عيسى ڪات ڪا مريد ۲ ڏي لائي: سابيت توله، اڪو فسڻ ڪا فواق مو ڪات: مو جاڻن بيمبڻ، جاڻن ڪڏوه، ڪا بارڻ مڪانن انتوق ڏيري مو، اتوا ڪا ڪائين فڪاين انتوق توبوه مو فون.
- 23 ڏيريمو لبيه مليا فد بارڻ مڪانن. توبوه ڊڊان مو فون لبيه فد فڪاين لائي.

- 24 چوب فرهاتي تيغوق كهيدون بوروغ ۲ تو! دي تاء منانم، دي تاءمغتم، رومه فادي فون دي تاء ار جوگ، تافي توهن بري ماكن كا دي. فواق مو فون مليا لاگي فد بوروغ، بوكن؟
- 25 فس، سا لاگي، عيسي كات، فيكيرله! ار كادق، اورغ دالم فواق مو هق بوليه تمبه عمور دي سيكيت ۲، دغن ترايشت ۲ نق بوليه؟
- 26 تنتو تاء ار! كالو مو تاء ليه بوات فركارا كچيك سروف تو، باء اف مو دوق فيكير بيمغ سعمور كوء دافن؟
- 27 فس لاگي، مو تيغوق بوغا تليفوق فول، عيسي كات، بالس مان دي بوليه كمغ. دي تاء كنا تنون، تاء كنا جاهيت باجو، تافي راج سليمان هق كاي سكالې فون، تاء ار كاين فكاين موليق، سروف بوغا تليفوق تو.
- 28 توهن بري جاني موليق، بوغا ۲ رمفوت ماچم ني، هق هاري ني كمغ، ايسوق كچوت كريغ ده، نق باكر ساج. اوه فواق مو، هق كورغ فرچاي! تنتوله، لبه ۲ لاگي، توهن نق بري كاين فكاين كا فواق مو، بوكن؟
- 29 سابيت توله، عيسي كات، جاغن مو دوق روسيغ، جاغن مو دوق ايشت كا جالن چاري ماكن ساج.
- 30 كران اورغ ۲ هق تاء كنل توهن ددنيا، سموا دوق چاري بارغ ۲ تو ساج. تافي فواق مو ني، عيسي كات، توهن باف مو تاهو ده كات، مو كنا فاكي بارغ ۲ تو جوگ.
- 31 تافي، فركارا هق مستحق سكالې، فواق مو كنا كاچغ چاري جالن نق توروت فرينته توهن باف مو دولو، باروله توهن نق بري سموا فركارا هق مو كنا فاكي تو.

---

هاتي كيت توجو كا تمفت هرت كيت دوق

---

- 32 هي صحابه ۲ كو، هق. اكو كاسيه، ولو فون فواق مو تاء

- رامي لاني، عيسى کات، مو تاءسه تاکوتله، کران توهن باف  
 مو برکن بري مو بوليه مړينته سکالي دغن دي داخيره .
- 33 بائیک جوال هرت بندا مو، امبيق دويت کي بوات صدقه کا  
 اورغ مسکين . فس سيمغن انتوق ديري مو، بيگ دويت هق تاء  
 چاريق، ياءيت دشرگ . مو کنا هيغفون تاروه هرت مو دسيتو  
 تمفت هرگ دويت مو تو تاءتراليه، تمفت فنچوري تاءليه ماسوق،  
 گگت ۲ فون تاءليه ماکن .
- 34 کران تمفت مان هرت بندا مو دوق لاني، هاتيمو نق توجو  
 کوء تو .

---

همب ۲ توهن هق دوق سيمغن ده

---

- 35-36 فس عيسى رويت دغن عبارة کات : مو کنا سيمغن ديري  
 انتوق اف ۲ نق جايي اتس مو . سروف کولي ۲ دوق ننډي  
 توان دي کليق تمفت فولوت منيکاح . دي ايکت فيغکغ، فکغ  
 فليتا، فس بيلا توان کليق سمفي ده، با گرتوق فينتو، فواق  
 تو بوک سلالو .
- 37 فس سوک هاتيله کولي ۲ هق تون بوليه ماري تيغوق دي دوق  
 توغکو سيف ده . سوغکوه، لفس فد تو، عيسى کات، تون تو  
 نق ايکت فيغکغ دي سنديري، سوروه کولي ۲ دودوق، فس  
 دي نق کرج انتوق کولي ۲ ري فول
- 38 سوک هاتيله کولي ۲ تو، کالو تون بوليه ماري تيغوق دي دوق  
 بالس تو . ولو کات توان ماري فوکول دوا بلس تغه مالم، اتوا  
 لمبت لاکي فون .
- 39 فس، مو کنا ايغتله، عيسى کات، کالو تون رومه تاهو فرياغ  
 مان فنچوري نق چوئکيه فافن ماسوق، تنتو دي نق جاگ  
 موليق، تاءبري فنچوري تو ماسوق .
- 40 فواق مو فون کنا دوق جاگ سروف تو جوگ، کران فد ماس



مو تاءسځک ، اکو مائسي هق تورون دشرگ ني ، نق تورون ماري فول .

### کولي هق توان بوليه هارف

- 41 فس فيتروس تان عیسی کات : توان رویت چریتا ساءني انتوق فواق کیت ساج که ؟ اتوا انتوق اورغ رامی کاتیق ؟
- 42 عیسی فون جواب بالسنی : اورغ بالسن مان ، کولي هق توان دي کات بوليه هارف ، فس هق بیجق ؟ دیاله اورغ هق توان سوروه جاگ کولي ۲ هق لاین ، نق بهاگي مکانن هق سوغ کا دي
- 43 سروف ، هاري ۲. سوک هاتيله کولي تو ، کالو توان دي کلیق ، تغه ۲ دي دوق بوات فرکارا ۲ تو .
- 44 فس ، اکو نق رویت کفد مو ، عیسی کات ، کولي هق جوجور تو ، توان نق هارف کا دي سموا هرت دي .
- 45 تافي ، کالو کولي تو دوق ایغت کات توان کلیق لمبت لاکي ، فس دغن ایغت تو ، دي کي بوات خیانه کا کولي ۲ لاین ، تاء کیرا بتینا جنتن ، فس دي ماکن بايق ، سهیځگ جاي مابوق ، جاتوه ساتو هاري ، تکه کولي تو دوق سځک کات ، توان دي لمبت کلیق لاکي ، تییا ۲ توان سمفي کلیق . توان کولي تو نق کوم دي هابیس ۲ ریغ ، بري فاته فوتوس ، فس بري نصیب سروف دغن فواق اورغ هق تاء طاعة کا توهن ، عیسی کات .
- 47 فس عیسی کات لاکي : کولي هق تاهو ده کهندق توان دي ، تافي تاء سیمفن ديري نق بوات توروت ، توان نق سوروه فیات بري تروق .
- 48 تافي کولي هق تاء تاهو کهندق توان دي ، فس بوات هق سوغ کنا فیات ، اورغ تو ، توان نق سوروه فیات بري کهور ساج . کا اورغ هق توهن بري بايق ، داورغ تو توهن هارف نق بوليه بايق جوگ . فس اورغ هق اورغ لاین بري تځگوغ بايق

فرکارا، دې اورغ لائين تو دوق هارف نق بوليه بايق جوگ.

### عيسى ماري، بوکن انتوق بري اورغ دوق سنغ

49 لفس تو، عيسى کات فول: هق اکو باوا ماري کا ماءنسي  
دنيا، سرووف افي. فس، کالو افي تو ميالا ده، باروله فواس  
هاتيکو!

50 اکو کنا تريما سيقسا، سرووف اورغ سيلم دالم اير، هق بوليه  
بنديغ کات روکون مندي هق اکو. فس هاتيکو تاءليه سنغ  
ملينکن سمفي اکو تريما کسيقسائ تو هابيس ده.

51 جاغن مو سغک کات، اکو ماري کا دنيا نق بري اورغ دوق  
سنغ سام سنديري، عيسى کات. دق! تافي اکو ماري ني نق  
بري اورغ فچه بله.

52 لفس فد ني، دالم سبواه رومه ليم اورغ، هق تيگ نق برلاون  
لغن دوا، فس هق دوا نق برلاون دغن تيگ.

53 رومه تو نق فچه بله. چي نق لاون لغن انق جنتن، انق  
جنتن لغن چي. مق نق لاون لغن انق بتينا، انق بتينا  
لاون لغن مق. تو تـوا نق لاون لغن مننتو، مننتو فون لغن  
تو تـوا.

### مو کنا ارتي تندا فرياغ ۲ هق توهن تورون

54 فس تو، عيسى کات کا اورغ رامي: بيلا مو نمفق، نايک  
فوکوق کو متھاري جاتوه، مو کات سلالو: ها، هاري ني نق  
هوچن! فس جادي سوغکوه.

55 بيلا مو براس اغين فوفوت ماري باليق هيلير، مو کات: ها، هاري  
ني کماراو! فس جادي سوغکوه، عيسى کات.

56 هي فواق مو هق بوات ۲ تاءرتي! مو تاهو ده سموا تندا  
دلاغيت اتوا ديومي، تافي باءاف مو تاءرتي تندا هق توهن

تورون انتوق ماس لاني؟

مو کنا بري باءيك سمولا دغن سترو

- 57 فس عيسى کات لاکي: باءاف فواق مو تاءليه فاکت کيرا هق مان بتول، دالم بوکو فواق مو؟
- 58 ميسل، کالو ار اورغ هق دوق ادو مو نق بوات بوکو، مو کنا چوب کيچيق دغن دي بري باءيك سمولا، بلغ دوق کي کاتمفت توء حکيم. کالو تاءبايک دولو، دي نق هيريت مو کي سمفي کادافن توء حکيم، توء حکيم فول نق سره مو کا سلدادو هق نق بوبوه مو دالم گوق.
- 59 فس، سمفي سکت تو، مو تاءليه توبيت ده، ملينکن مو باير دندا مو دولو، بري ليچين هابيس.

فاليغله تيغگل دوسا ۲ مو

باب 13

- 1 فد ماس تو جوگ، ار اورغ دسيتو رويت کا عيسى چارا حال فيلاتوس دوق بونوه سفواق اورغ کاليل، بري داره دي برچمفور دغن داره قربان، هق فواق تو دوق سمبله فد ماس تو. فس، عيسى تان فواق تو: مو سغک کات اورغ کاليل سيقسا بالس تو، سبب دي بوات دوسا لبه فد اورغ لاءين دنکري کاليل که؟
- 3 بق! عيسى کات. تنتوله، کالو فواق مو تاءفاليغ تيغگل دوسا مو، مو نق کنا سيقسا سروف تو جوگ!
- 4 فس، بالس مان فول، دغن اورغ لافن بلس دسيلوم تو، هق رومه باتو رونتوه بري ماتي هابيس. مو سغک کات دي ساله بايق فد اورغ لاءين دکوت جروسليم که؟ بق! عيسى کات.
- 5 تنتوله، کالو فواق مو تاءفاليغ تيغگل دوسا مو، مو فون نق ماتي سروف تو جوگ.

### عبارة فوهون ارا هق تاءتوبيت بواه

- 6 لفس تو، عيسى رويت دغن عبارة دالم چريتا ني: اد سئورغ هق اد فوهون ارا دالم كيون ري. دي هارف كات نق بوليه حاصلن، تافي تاءبريواه.
- 7 سيب تو، دي رويت كا اورغ جاگ كيون، كات: تيشوقله! تيگ تاهون ده، اكو ماري نق امبيق بواه فوهون ني، تافي تاءراجين بريواه سبوتير هابوق. تبغ تاهوفله فوهون ني! بوات روگي كا تانه ساج!
- 8 تافي اورغ جاگ كيون كات: بلرله توان! كيت ننتي تيشوق ستاهون لاگي، نق ليغكا بوه باج دولو،
- 9 فس كالو بريواه تاهون دافن، موجورله. كالو تاءبريواه لاگي، بارو كيت تبغ!

### اورغ بتينا بوليه لفس كسيقسائ دي

- 10 فد ساتو هاري، هاري ميغكو، عيسى دوق مفاجر اورغ
- 11 دالم مسجد اورغ يهوي. فس اد اورغ بتينا دوق سييتو، هق ماسوق هنتو لافن بلس تاهون ده. سابيت تو، توبوه دي لمبوت هابيس، دي تاءليه بغه، چالن بوغك سعمور.
- 12 بيلا عيسى تيشوق اورغ بتينا ني، دي فغكيل ماري كات: هي، كاوان! مو لفس ده كسوساهن مو!
- 13 فس، دي لتق تاغن اتس اورغ بتينا. با لتق تاغن، اورغ بتينا بوليه برديري بتول سلالو. فس دي فون دوق فوجي كا توهن دسييتو.
- 14 تافي اورغ هق جادي كتوا دالم مسجد موريه، كران عيسى بري سيار اورغ ساكيت فد هاري ميغكو، هق لارغ تاءبري بوات كرج. فس ني باغون رويت كا سموا اورغ كات: انم هاري كيت

بوليه كرج. ماريله بري سيار فپاڪيت مو دالم ماس انم هاري تو،  
جاغن ماري فد هاري ميڱكو!

15 تافي عيسى جواب كا بي كات: هي فواق مو هق كيچيق مانيس  
لوار! تنتو سموا فواق مو، هق فيرا لمبو اتوا هيمر، مو كا  
رومبق جيرت دي، باواء توبيت دالم كندغ، بري ماكن اير فد  
هاري ميڱكو، بوكن؟

16 فس، اورغ بتينا ني، كتورونن نبي ابراهيم، هق هييليس دوق  
ايكت لافن بلس تاهون ده، موليق كادق، بري دي لفس فد  
هاري ميڱكو؟

17 هق عيسى رويت تو بري مالو سترو ۲ دي. تافي اورغ رامي  
بركنن فركارا ۲ فليق هق عيسى دوق بوات تو.

### عبارة بنيه ساوي

18 عيسى كات: بيلا توهن ماري امبيق فرينته دي اتس

مائنسي، نق جاني بالس مان؟ نق بنديغ دغن كاف؟

19 نق بنديغ دغن سبوتير بنيه ساوي هق اورغ امبيق كي تانم

دالم فاكر دي. كهوور ۲ تومبوه جادي فوهون بسر. سمفي بوروغ

بوليه كي بوات سارغ اتس چابغ دي.

### عبارة ايبو روتي

20 فس عيسى رويت عبارة سا لاكي كات: اكو نق بنديغ دغن

كاف، بيلا توهن ماري امبيق فرينته دي دالم هاتي مائنسي؟

21 جادي سرور اورغ بتينا هق امبيق ايبو روتي ماري چمفور دالم

گندوم تيگ كيلو، فس ايبو تو اد كواس بري سموا تفوغ تو كمبغ

موليق ۲.

### فینتو هق سمفیت

- 22 تکه تو، عیسی دوق برجالن کي کا کوت جروسلم . تغه  
دوق کي تو، بي ماسوق کو دالم کمفوغ اتوا دالم ککي، نق  
مغاجر اورغ.
- 23 فس اد سئورغ ماري تان دي کات: هي توانکو! سيکيت ساج که،  
اورغ هق توهن بري سلامت؟ عیسی فون جواب بري سماو اورغ  
تو دغرکات:
- 24 مو کنا اوسها چاريله ماسوق کو فینتو هق سمفیت، کران  
سسوځکوهن، عیسی کات، بايق اورغ نق ماسوق کو فینتو تو،  
تافي نق ماسوق تاء ليه.
- 25 اد ساتوماس، توان رومه نق باغون کي کاتوف فینتو، سلق  
سیف ده، بارو فواق مو ماري نق گرتوق فینتو بلغ ۲ فڅکیل  
توان: هي توان! بوکاله فینتو! توان نق جواب: فواق مو ماري  
رمان؟ اکو تاء کنل!
- 26 فس فواق مو نق کات: کيت بياس کي ماکن فولوت ده دغن توان،  
فس توان فون بياس کي مغاجر کو کمفوغ ۲ کيت!
- 27 فس توان نق جواب فول: اکو رويت ده براف کالي کات اکو تاء  
کنل مو؟ کيله جاء وه درفدکو، فواق مو هق بياس بوات جاهت!  
28 فس عیسی کات کا اورغ رامي تو فول: ماس کو دافن، بيلو مو  
بوليه نمفق ابراهيم، اسحاق، يعقوب دغن سماو نبي ۲ تو،  
دوق دالم ده، تمفت هق توهن مرينته راحيره تو، فس  
فواق مو فول، کنا دوق لوار نق ماسوق تاء ليه، نق تروق  
سوځکوه فواق مو، عیسی کات، دغن ترياق تاغيس، دغن  
کاجيت کيکي سابيت ساکيت هاتي.
- 29 فد ماس تو، عیسی کات، بايق اورغ نق فاکت ماري، باليق  
متهاري ناء يک، باليق متهاري جاتوه، باليق هولو، باليق

هيليير، نق ماسوق دوق ماكن جاموان سكالې دغن نبي ۲ سائي،  
 دالم تمفت هق توهن مريته داخيرة تو.  
 30 تافي، عيسي كات، بايق هق فريشكت تيغكي بوليه ماسوق دولو  
 لاني، نق رنده كو دافن. فس، اورغ هق كنا دوق دغوغوغ  
 لاني، نق ماسوق دولو بوليه فريشكت تيغكي كو دافن.

### عيسي ساينغ كا كوت جروسليم

- 31 فد ماس تو جوگ، ار سفواق اورغ فريسي ماري رويت كا  
 عيسي كات: توان تائه دوق له، سيني، سبب راج هيرود دوق  
 نق بونوه توان!
- 32 تافي عيسي جواب كات: كيله رويت كا راج هيرود هق فندي  
 منيفو تو، كات: اكو عيسي ني، هاري ني دوق همبت هنتو،  
 دوق بري سيار اورغ ساكيت. ايسوق بوات لاكي، هيغك سمفي  
 33 لوسا، بارو سوده كرج كو. تافي ولو جادي بالس ۲ مان فون  
 اكو كنا توروت جوگ جالن كو ني، تكه ماس تيگ هاري ني،  
 كرلن تاءار تمفت لائين، ملينكن كوت جروسليم ساج، تمفت  
 هق نبي ۲ كنا بونوه.
- 34 فس عيسي كات: اوه اورغ جروسليم! مو بونوه نبي ۲، مو امبيق  
 باتو فيكوغ فسوروه ۲ توهن سعمور. براف كالي اكو براس نق  
 فلوو فواق مو بري جايي ميليي كو، سروف ايم دوق فوگيل  
 انق دي، بري ماسوق باوه سايف، تافي مو تاءسير!
- 35 سبب توله، رومه تگ مو نق تيغگل هابيس. فس دغرله!  
 عيسي كات، جق دهاري ني هيغك سمفي هاري كا دافن، هق  
 فواق مو نق كات: براونتوغلله اورغ هق ماري دغن نام توهن،  
 فواق مو تالیه تيغوق اكو ده.

## عيسى بري سيار اورغ ساكيت فد هاري ميغكو

باب 14

- 1 فد ساتو هاري، هاري ميغكو، عيسى كي ماكن ناسي درومه سئورغ كتوا دالم فواق فريسي. سموا اورغ هق دوق دسيتو فون
- 2 دوق فرهاتي تيغوق كا عيسى. فس اد سئورغ ساكيت سميف كاكي تاغن، ماري دوق دكت عيسى.
- 3 عيسى تان گورو ۲ تورات دغن فواق فريسي تو، بري دي دغر سموا، كات: حكوم تورات بنر بري كيت تولوغ اورغ ساكيت بري سيار، فد هاري ميغكو، كا دق؟
- 4 تافي فواق تو دوق سپف تاءجواب. عيسى فون امبيق اورغ ساكيت تو، بوات بري سيار، فس بنر بري دي كي.
- 5 فس عيسى كات كا فواق تو فول: فواق مو، كالو انق اتوا لمبو فون، جاتوه دالم تلاك فد هاري ميغكو، تنتو مو نق كي اغكيت ناءيك سلالو، بوكن؟ تاءكيرا كنا هاري ميغكو فون!
- 6 هق عيسى كات سائي، فواق تو تاءليه جواب.

## عيسى سوروه مرنده دير

- 7 فس، عيسى فرهاتي تيغوق، دالم فواق هق ماري ماكن ناسي دسيتو، اد اورغ هق دوق بربوت تمفت دودوق هق موليق دافن. سبب تو، عيسى رويت ساتو چريتا دغن فاكي عبارة، بري سموا اورغ دغر، كات بالس ني:
- 8 كالو سياف كنا فاده كي ماكن فولوت، جاغنه مو دوق تمفت موليق هق دافن. تاكوت اد اورغ هق لبيه حرمة فد مو، كنا فاده جوگ. فس، توان رومه نق ماري سوروه مو بري تمفت موليق كا اورغ تو. مو فون كنا مالو، فس فول، كنا براليه، دوق سود دبالاځ اورغ.
- 10 بق! عيسى كات. بيلا مو كنا فاده كي ماكن فولوت، مو كي



- دودوق تمفت رنده ساللو. فس، بيلا توان رومه ماري، دي نق کات: هي کاون! ماري دوق تمفت موليقله! مو فون نق بوليه تريما حرمة، دافن سمو اورغ سييتو.
- 11 کران اورغ هق سوک اغکيت ډيري دي، توهن نق بري رنده، ماس دافن، تافي اورغ هق سوک مرند ډيري دي، توهن نق اغکيت فول، کوء دافن.
- 12 فس، عيسى کات فول کا کتوا فريسي هق فاده اورغ کي کا رومه دي تو: بيلا مو بوات جاموان نق فغکيل اورغ رامي، جاغن مو اجق ساءين ۲ مو، اتوا اديق براديق قوم کلوارگ مو سنډيري، اتوا ساءين ۲ هق کاي دالم کمفوغ، کران فواق ۲ ني بوليه بالس نق اجق مو کي کا رومه دي فول.
- 13 بق! عيسى کات. بيلا مو بوات جاموان، مو کنا فغکيل اورغ مسکين، اورغ چدرا، اورغ برجالن کيچوق دغن اورغ بوت، ماري ماکن جاموان مو، بارو مو نق بوليه اونتوغ. کران فواق ۲ ني، نق بالس بوي مو تاءليه. فس، مو نق بوليه بالس، فد هاري اورغ هاتي بتول نق بغکيت هيډوف کليق تو.

### عبارة چارا حال جاموان بسر

- 15 ار سئورغ دالم فواق هق دوق ماکن ناسي سکالي دغن عيسى ساءني. دي کات کا عيسى: اه! براونتوغ سوغکوه، اورغ هق بوليه ماکن جاموان توهن راحيرة!
- 16 عيسى فون کات کا اورغ تو: ار سئورغ دوق سيمفن نق بوات جاموان بسر. دي فاده بايق اورغ. فس بيلا سمفي ماس ده،
- 17 دي سوروه کولي دي کي اجق سمو اورغ تو ماري ساللو، کات: کيله کا رومه توان امب! هيډاغن سيف ده!
- 18 تافي اورغ هق کنا فاده تو، فاکت مينتاء ډيري کات تاءليه کي بلاک. هق مولا ۲ کات: مينتاء معافله، امب تاءليه کي! کنا

کي تيغوق تانه هق بارو بلي سکفيغ!

19 فس اورغ لائين فول کات: امب مينتاء معاقله، تاءليه کي! امب بلي لمبو کاسي ليم کو، نق بوات کالا. امب کنا کي اجر ري. ترفاکي کا دق.

20 فس، سئورغ لاکي فون مينتاء معاف سروف تو جوگ، کات: امب تاءليه کي، سبب بارو بريني!

21 کولي فون کليق کي رويت کا توان ري بالاس تو. توان فون موريه ساغت. فس ري سوروه کولي ري فول، کات: موکيله ساللو! چاري اورغ دالم کدي، کوء لوروغ ۲، کوء جالن ۲ بسر، اورغ مسکين اورغ چدرا، اورغ بوت، اورغ برجالن کيجوق، سوروه ري ماري بلاک!

22 تاءلام، کولي کليق رويت کا توان کات: هق توان سوروه تو، بوات بلاک ده، تافي ار لاکي، هيذاغن هق لبيه.

23 فس، توان سوروه کولي توبيت کي سکالي لاکي، کات: موکيله، کوء دارت، چاري اورغ کوء کمفوغ ۲، کوء چارق ۲، سوروه ري ماري جوگ، نق بري فنوه هيذاغن، رومه کو ني!

24 کران اکو رويت کا فواق مو سموا، کات: اورغ هق اکو فاده دولو، تاءليه ماکن سئورغ هابوق، جاموان اکو ني!

### سياف نق جايي انق مريد عيسي

25-26 اورغ رامي ماري برهيمفون، نق تورت عيسي، فس عيسي فالينغ کات کا سموا اورغ ني: کالو سياف نق تورت جاري مريد اکو، تاءليه، ملينکن ري جوغ فوتوس دغن اييو باف ري، دغن انق بيني، اديق براديق، بتينا جنتن، سمفي کا ديري ري سنديري فون.

27 ري کنا سفگوف فيکول کايو امفت چابغ يغ هيئا هق توهن بري کا ري، تورت اکو کي، کالو سمفي کا ماتي فون، باروله بوليه

جادي انق مريد كو.

- 28 ميسل، عيسى کات، سياف بي دالم فواق مو، نق بوات رومه  
بات، دغن تاءکيرا دولو، هابيس بايق مان، نق بري سوده  
29 کرج تو. تاکوت با بوات فلافيق، هابيس بلنجا، فس سمو  
30 اورغ نق مشنجيغ کا دي، کات: تيغوقله! نفسو نق بوات رومه  
بسر ۲، تافي تاءسوده!  
31 فس ميسل سا لاکي، عيسى کات، سئورغ راج، عسکر سفلوه  
ريبو اورغ، نق کي لاون دغن راج اد عسکر دوا فولوه ريبو  
اورغ، هق نق لغکر ماسوق نکري بي. راج هق عسکر سفلوه  
ريبو سائي، کنا بوات بالس مان؟ بي کنا دوق فيکير بري  
هالوسي دولو، کات، کواس بي چوکوف کا دق، نق لاون  
سترو تو.  
32 کالو کواس تاءفادن، تکه سترو تو دوق جاءوه لاکي، بي کنا  
هنتر فسوروه بي کي دولو، مينتاء نق بري جاني بايک.  
33 فس، عيسى بري سود دغن فرکتان ني: فواق مو فون کنا  
بوات سروف تو جوگ! کالو سياف نق جادي انق مريد کو،  
بي کنا جوغ سره سرب سروبي اف هق دي اد.

### کارم هق تاءترفاکي

- 34 کارم تو بارغ هق برکون سوغکوه، عيسى کات، تافي کالو  
کارم تو جاني تاور، نق بوات بالس مان بري جادي ماسين فول؟  
35 کارم هق فونه ده بالس تو، نق بوات باج بندغ تاءليه، نق  
بوات بوبوه تنامن فون تاءليه جوگ. کنا تاهوق ساج!  
سياف اد تليغا نق دغر، دغرله، عيسى کات.

اورغ بوات دوسا فون، عيسى کاسيه جوگ

باب 15

1 فد ماس تو، اورغ کوتيف چوکي، کرج هق سمو اورغ هينا،

دغن اورغ هق تاء توروت حکوم توهن، بايق اورغ، ماري نق دغر  
فعاجران عيسى.

- 2 کورو ۲ تورات دغن فواق فريسي تاء برکن. دي دوق برسوغوت ۲  
کات: ايه! عيسى ني سوک برچمفور گاهول دغن اورغ بردوسا  
سموا ني. دي دوق ماکن ناسي فون، دغن فواق ۲ ني!  
3 بيلا عيسى دغر هق فواق تو دوق کيچيق سائي، دي فون  
فاليغ رويت دغن فاکي عبارة کا فواق تو، کات:

### چريتا کمبيغ بيربيغ هيلغ سئيکور

- 4 ميسل، سئورغ دالم فواق مو اد بيربيغ سراتوس ايکور فس  
هيلغ سئيکور. توان دي نق بوات لاگو مان؟ دي نق تيغگل  
هق سمبيلن فولوه سمبيلن ايکور تو دفاغ، کي چاري هق هيلغ  
سئيکور، هيغگ سمفي برتمو.  
5 بيلا تموده، دي فون فيکول بيربيغ تو کليق کا رومه دغن سوک  
6 هاتي، فس فغکيل سائي ۲ کمفوغ ماري سوک ۲ سکالي دغن دي.  
نيله بيربيغ هق هيلغ، اکو تموده! دي کات.  
7 بالس تو جوگ، عيسى کات، بيلا ساتو اورغ بردوسا توبه،  
جادي سوک ريا دالم شرگ، لبيه لاگي فد سوک ريا انتوق  
سمبيلن فولوه سمبيلن اورغ هق بتول، تاءکنا توبه.

### چريتا دويت فيرق هيلغ سکفيغ

- 8 فس ميسل سا لاگي، عيسى کات: اورغ بتينا سئورغ اد  
دويت فيرق سغولوه کفيغ، هيلغ سکفيغ. اورغ بتينا تو، نق  
بوات لاگو مان؟ دي نق چوچوه فليتا، کي سافوس، چاري  
هيغگ سمفي تمو.  
9 بيلا تموده، دي فون فغکيل سائي ۲ کمفوغ ماري، سوک ۲

سڪالي دغن دي. ني له دويت هق هيلغ، اكو تموده! دي کات. 10  
بالس تو جوگ، عيسى کات، ملايڪه ۲ توهن براس سوک هاتي  
سوڳوه، بيلا اد ساتو اورغ توبه تيڳل دوسا.

### انق بوغسو تيڳل کي جاءوه

- 11 ميسل سا لاڳي، عيسى کات، اد اورغ، دي اد انق جنتن  
12 دوا اورغ. انق بوغسو ماري کيچيق دغن ايه دي کات: يا ايه!  
بريله سلالو، فساك هق بڳيان اكو!  
ايه دي فون، بهائي هرت دي کا انق دوا اورغ تو.  
13 لفس فد تو، تاءلام، انق بوغسو فون، هيمنون جوال بڳيان  
دي، امبيق دويت، توبيت کي کا نگري جاءوه. دسيتو، دي  
دوق بلنجا بوروس، دغن تاءبرايت.  
14 بيلا دويت دي هابيس، با يتولن دغن کماراو بسر سرات نگري  
تو. فس دي تاءاد سکارا هابوق.  
15 سابيت تو، دي کنا کي کرج کا اورغ دالم نگري تو. اورغ ني فون  
سوروه دي کي فيرا بابي دبنڊغ.  
16 دي لافر هيڱ دي براس نق ماکن بري کيڱ دغن کوليت کاچغ  
هق بري ماکن کا بابي، تافي اورغ تاءبري کا دي.  
17 باروله دي سدر ديري کات: کولي هق کرج درومه ايه کو، اد  
ماکن لبیه، تاءچيکف نق ماکن، تافي اكو، انق دي سنديري  
دوق سيني، نق ماتي دغن کران مومر!  
18 ايه! اكو نق کليق کي چاري ايه کو، کات کا دي: يا ايه، اكو  
مڱاکو ساله کا توهن، فس دغن ايه جوگ.  
19 اكو تاءسوڱ نق فڱکيل انق ايه لاڳي. بلرله بري اكو دوق  
کرج سرورف کولي ايه ساج!  
20 سوده فيکير بالس تو، انق بوغسو سائي باغون کي چاري ايه  
دي. فس ايه دي نمفق انق دوق جاءوه لاڳي. دي فون براس

- کسیاغ بلس، فس هوڭگل کي سمبوت انق، فلوڤ سيوم دي.
- 21 انق فون کات کا ايه دي: يا ايه، امب مڱاکو ساله کا توهن، فس نڙن ايه جوڱ. امب تاءسوغ نق فڱگيل انق ايه لاڱي...
- 22 تافي ايه دي فڱگيل کولي ۲ ماري، کات: کي امبيق باغتله، باجو جوبه هق موليق سکالي، ماري بري انق کو فاکي!
- 23 امبيق چينچين، کاسوت، ماري بري دي فاکي، فس کي امبيق انق لمبو هق ڱموڤ سکالي، ماري سمبليه. کيت نق بوات جاموان
- 24 سوک ۲! کران انق کوني، سروف دي ماتي ده، فس هيڊوف کليڤ. دي هيلڱ لام، لاني تمو ده!
- فواق دي سموا فون، برجامو سوک ۲ بلاک.
- 25 فد ماس تو، انق سولوڤ ڊوق ربنڊغ لاڱي. بيلا دي کليڤ سمفي
- 26 ڊکت رومه، دي دغر بويي لاڱو. فس دي فڱگيل کولي تان دي:
- 27 اف، بويي تو؟ کولي جواب کات: اڊيق توان کليڤ ده، فس ايه سوروه سمبليه انق لمبو هق ڱموڤ بوات جاموان، سابيت اڊيق توان کليڤ نڱن سلامت.
- 28 بيلا انق سولوڤ دغر بالس تو، دي موريه ساعت، تاءسير ماسوق ڊالم رومه، تمفت جاموان. فس ايه دي سنڊيري تويت اڱق دي ماسوق.
- 29 تافي انق سولوڤ کات کا دي: ايغتله! براف تاهون ده امب کرج کا ايه، تاءبياس لڱکه حکوم ايه سکالي فون، تافي ولو ڱمبيڱ سڱيکور فون ايه تاءبياس بري، نق جامو نڱن سائين سوک ۲!
- 30 تافي انق ايه تو، دي بلنجا هرت ايه تاءبراڱت، نڱن فيرا اورڱ بتينا بيليڤ بري هاييس، فس بيلا دي کليڤ، ايه فون سمبليه لمبو هق ڱموڤ، بري کا دي!
- 31 ايه جواب کا دي کات: ايغتله انق کو! مو ڊوق سکالي نڱن اڱو سعمور، فس هرت بنڊا هق اڊ، سموا فون جاني هق مو
- 32 بلاک. تافي موليقله، کيت برجامو بري سوک ۲ کران اڊيق موني،

سبب دي سرورف اورغ ماتي ده، فس هيدوف كليق. دي هيلغ لام، لاني تمو ده!

### چريتا كتوا هق فندي ميکير

باب 16

- 1 لفس تو، عيسى رويت چريتا کا مريد ۲ دي: اد سئورغ کاي، دي کاجي ساتو اورغ جادي کتوا سموا کرج دي. دي دغر کات کتوا تو دوق بلنجا بوروس، دويت توان دي.
- 2 توان فون فغکيل کتوا تو ماري، کات کا دي: اکو دغر ده چارا حال مو. باوا ماري کليق، سموا سورت بنچي مو! مو کنا برادو ده، کرج دغن اکو!
- 3 کتوا سائي فون، دوق کيرا دالم هاتي: اکو نق بوات لاگو مان، کالو توبيت کرج ني؟ نق ميغکول تاء رق، فس نق مينتاء صدقه فون، مالو. اه، اکو ايغت ده نق بوات لاگو مان بري اورغ سمبوت اکو، بيلا اکو برهنتي کرج ني!
- 5 بيلا دي کيرا سوده ده، فس دي سوروه سموا اورغ هق لکت اوغ توان دي، ماري کيچيق دغن دي. اورغ هق مولا ۲ دي تاش: مو لکت اوغ توان اکو بايق مان؟
- 6 اورغ تو جواب: سراتوس تمفاين مييق زيتون! کتوا کات کا دي: بايق تو اوغ مو، تافي ماريله، مو توليس ليم فولوه تمفاين ساج! فس اورغ سا لاگي، دي تاش: مو لکت اوغ بايق مان؟ اورغ تو فون جواب: لکت اوغ گندوم سراتوس گوندي! کتوا فون کات: ماريله مو توليس لافن فولوه گوندي ساج، سوده!
- 8 ولو کتواني تاء جوجور، تافي توان دي فوجي جوگ، کران دي فندي ميکير بالس تو. سسوغکوھن، عيسى کات، اورغ هق چاري هرت دنيا فندي ميکير سام سنديري، فد فواق هق توهن بري دوق دالم چره!
- 9 فس، عيسى تمبه لاگي کات: نصيحه کوني، مو کنا فاکي هرت

دنيا هق كورغ موليق تو، انتوق بري بوليه سائين لاني. فس  
بيلا هرت تو هابيس ده، مو بوليه سمبوت ماسوق تمفت هق  
اد، بوات سلام ۲.

10 اورغ هق بري تندا كات بوليه هارف دغن فركارا كچيك، بوليه  
هارف دغن فركارا بسر جوگ. اورغ هق تاء جوروس دغن فركارا  
كچيك فون، تنتو تاء جوروس دغن فركارا بسر جوگ.

11 فواق مو فون، كالو تاءليه هارف دغن فاكي هرت دنيا لاني،  
تنتو تاءليه هارف نق بوليه هرت هق سجاتي راخيرة.

12 كالو مو فاكي بارغ اورغ لاني تاءليه هارف، تنتو مو تاءليه هارف  
نق بوليه اف جاني ميليق مو سنديري راخيرة! عيسى كات.

13 تاء اورغ بوليه كرج كا توان دوا اورغ سكالپ. تنتو كولپ نق  
بنچي كا توان سئورغ، نق كاسيه سئورغ. هق ئي كاسيه تو،  
ئي نق طاعة ستيا، هق ئي بنچي تو، نق تيغوق هينا. بالس  
تو جوگ، عيسى كات، اورغ تاءليه كرج كا توهن، فس كرج  
توروت هرت دنيا، دوا سكالپ.

### دوا تيگ فركارا هق عيسى بياس رويت

14 اورغ فريسي هق دغر سموا فركتان عيسى سائي، دوق  
مغنجيغ ۲ كا عيسى، سبب فواق فريسي تو سوگ كا دويت، تافي  
15 عيسى كات كا دي: فواق موله فندي نق بري اورغ فوجي كات بتول،  
تافي توهن تاهو فيكيران مو. كران، اف هق مائسي فوجي كات  
مليا، دفتداغن توهن تاءترفاكي سيكيت هابوق.

16 سسوغكوهن، سمفي كا فرياغ نبي يحيا، هق بري اورغ تريما روكون  
مندي بفتيزما تو، اد كتاب تورات دغن كتاب نبي ۲ لائين تافي  
جق دماس تو، اد جوگ خبريغ بايك، چارا حال فرينته توهن  
دالم هاتي مائسي، دوق ملارت كي سرات تمفت، فس سموا اورغ  
دوق بربوت ۲ نق ماسوق امبيق تمفت باوه فرينته توهن تو.



- 17 تافي ايغته! موده لاڳي هيلغ لاغيت دغن بومي، فد هيلغ  
تيتيق هق كچيك سكالې دالم كتاب تورات تو!
- 18 ميسل، كالو سياف چري دغن بيني دي، فس منيكاځ دغن اورغ  
لائين، اورغ جنتن تو بوات زناء. فس كالو سياف امبيق اورغ  
بتينا هق چري ده بوات بيني دي، اورغ جنتن تو فون بوات  
زناء جوځ.

### اورغ كاي دغن اورغ مسكين نام لازرو

- 19 فس عيسى رويت چريتا ني فول: اد سئورغ كاي، فكاين  
دي موليق ۲ بلاك، مكانن دي كنف ۲ هاري فون، بارغ مهل هق  
اد زات.
- 20 فس، اد سئورغ لاڳي، نام لازرو، مسكين ساغت، تبوه دي
- 21 بركوډيس هابيس. اورغ بياس باو۹ دي ماري لتق دافن فينتو اورغ  
كاي، دغن هرافن دي نق بري كيغ فروت، دغن ننني بارغ هق  
جاتوه رميجا اورغ كاي تو. دوق سينتو تو، انجيغ ۲ فون بياس  
ماري جيلت گوډيس دي.
- 22 تاءلام، اورغ مسكين تو ماتي، فس ملايكة ۲ ماري امبيق دي  
ناءيك كي دودوق، دكت دغن نبي ابراهيم، رميجا جاموان توهن  
تو. تاءلام لاڳي، اورغ كاي فون ماتي فول. اورغ فون امبيق دي  
كي تانم سوده ده.
- 23 دي فون كي كا نراك، دوق دالم كسيقسائ تروق. فس دي  
لغځق تيغوق، نمفق نبي ابراهيم دوق سكالې دغن لازرو،  
جاءوه سايوف ۲ نون.
- 24 دي فون فغكيل كات: توء ابراهيم! كسياغ بلسله كا امب گاتيځ!  
مينتاء سوروه لازرو. چلوف جاري دالم اير، ماري تيق ليه  
امب بري سجوق! سبب امب دوق دالم افي ني سيقسا ساغت.
- 25 تافي نبي ابراهيم جواب كات: يا چوچوكو! مو تاءايغت كه تكه

- مو دوق هيدوف، مو تريما بلاك ده، سموا فرکارا موليق هق  
 مو؟ لازرو تکه تو، تريما سموا فرکارا هودوه. تافي لاني،  
 لازرو بوليه ده سوک هاتي، فس مو دوق دالم کسيقسائ فول.  
 26 فس لاگي، ابراهيم کات، ار لوره هق دالم لتق دانتارا فواق  
 اکو دغن فواق مو، هق سکت جالن، تاءبري فواق مو لغکه  
 ماري کوئي، فس اکو فون تاءليه لغکه کي کوئي نون.  
 27 کالو بالس تو، اورغ کاي کات، امب مينتاء جوگ ۲، بري توء  
 ابراهيم سوروه لازرو کي کا رومه ايه کو، کران امب ار لاگي،  
 28 اديق براديق ليم اورغ. بري لازرو رويت امران کا دي، تاءسير  
 بري دي ماري کا تمفت کسيقسائ سروف امب ني!  
 29 تافي ابراهيم جواب کا دي: کتاب موسی دغن نبي ۲ لائين دي  
 ار ده. بلرله دي توروت هق توله!  
 30 اورغ کاي کات لاگي: دق! هق تو تاءفانن، توء ابراهيم! کالو  
 اورغ هق ماتي ده، کليق کي رويت کا دي، تنتو دي نق فرچاي  
 توروت!  
 31 تافي ابراهيم جواب فول: کالو دي تاءفادول کا کتاب موسی  
 دغن نبي ۲ لائين، اورغ ماتي هيدوف کليق ماري رويت فون،  
 تنتو دي تاءفرچاي جوگ!

### چارا حال بوات دوسا

باب 17

- 1 فس عيسى کات کا مريد ۲ دي: مستي کنا ار حال ۲ هق بري  
 اورغ بوات دوسا. تافي نق تروق سوغکوه اتس اورغ هق  
 تنجوق جالن بري اورغ بوات دوسا تو.  
 2 کالو دي بري اورغ فريغکت رنده بوات دوسا، نق تروق لاگي  
 اتس دي، فد اورغ امبيق باتو کيسر بسر، ايکت دتکق، کي  
 تاهوق دي دالم لاءوت!  
 3 عيسى کات: فرهاتيله بايک ۲! کالو مو نمفق اديق براديق مو

بوات ساله ، مو تگهله ي . فس کالو يي مینتاۑ معاف دغن مو ،  
 4 معافله کا يي . کالو يي بوات ساله کغد مو توجهه کالي سهاري ،  
 فس کنف ۲ کالي يي ماري مینتاۑ معاف ، مو معافله جوڭ کا يي !

### چارا حال ايمان

5 صحابة ۲ عيسى کات کا يي : يا توان گورو ، مینتاۑ بري ايمان  
 کيت تگوهه لاڳي !

6 ربي فون جواب : کالو ايمان مو اڊ بسر بنیه ساوي فون ، مو  
 اڊ کواس بوليه سوروه فوهون ارا ني ، کات : چابوتله مو ، کي  
 تانم دالم لاءوت ! فس ، فوهون تو نق توروت فرينته مو .

### فاتوت کيت کرج کا توهن سروف همب

7 فس ، عيسى کات : ميسل ، مو اڊ کولي هق کرج کا مو ، فس

ي دوق مپغکول اتوا دوق فيرا بيریخ ۲ مو دبنده . بيلا يي

کليق ، مو نق کات کا دق : ماريله ماکن ناسي هق سيف ده !

8 نق ! تنتو مو نق سوروه يي کي مناق بري ماکن کا مو ، فس

يي کنا توغگو مو ماکن دولو ، بارو يي بوليه ماکن سنديري .

9 بيلا کولي توروت سموا سوروهن توان ، تاءسوغ فاتوت کولي تو

سوروه توان يي تريما کاسيه کا يي ، بوکن ؟

10 فواق مو کنا بالس تو جوڭ . بيلا مو بوات سيف ده ، سموا

فرکارا هق سوروه کغد مو ، مو کنا کات : اکو جاني کولي ساج .

فاتوتله اکو بوات کرج بالس ني !

### اورغ فپاکيت بادم سفولوه اورغ

11 تکه عيسى دوق برجالن کي لاڳي کا کوت جروسليم ، يي

لالو کي کوۑ کلیواسن نکري کاليل دغن نکري سماریا .

- 12 تغه ۲ نق ماسوق دالم ساتو كمفوغ ديق نون، تيبام سفولوه اورغ فپاكيت بادم تمو دغن دي. فواق ني دوق جاءوه فد عيسى،
- 13 فس فغكيل دغن سوارا درس كات: يا توان گورو عيسى! كسياغ بلس كا فواق امب گاتيقي!
- 14 عيسى فالينغ تيغوق دي فس كات: مو كيله بري امام ۲ فيقست توبوه مو! تغه ۲ دي دوق كي تو، تيغوق توبوه دي سيار ليچين.
- 15 فس ار سئورغ دالم فواق تو، بيلا دي تاهو كات سيار ده، دي فالينغ كليق كا تمفت عيسى فول، بلغ ۲ دوق فوجي توهن دغن سوارا درس.
- 16 بيلا سمفي دكت ده، دي سجدو دافن عيسى، اوچف تريما كاسيه كا دي. جادي، اورغ ني بوكن اورغ يهودي، اورغ سمباريا.
- 17 فس عيسى كات: سفولوه اورغ هق اكو بري سيار، بوكن؟ مان
- 18 سمبيلن اورغ لاكي؟ باءاف اورغ ني سئورغ ساج، فالينغ كليق، تريما كاسيه كا توهن، فس دي بوكن بغسا يهودي كيت!
- 19 فس عيسى كات كا اورغ تو: باغونله، كي ايكوت سوک مو! سابيت مو فرچاي، مو بوليه سيار.

### ماس توهن نق ماري امبيق فرينته دي

- 20 ار تيگ امفت اورغ دالم فواق فريسي ماري تان عيسى كات: بيلا، توهن نق ماري امبيق فرينته دي بري سمفرن؟ عيسى جواب: توهن تاءمري امبيق فرينته دي كوئ جالن اورغ نمفق.
- 21 اورغ تاءليه كات: ها، تو دي! اتوا: ها، نيله دي! كران، سسوگوهن، توهن ماري ده نق امبيق فرينته دي دالم هاتي فواق ۲ مو!
- 22 لفس تو، عيسى رويت كا صحابة ۲ دي كات: نق سمفي ماس هق فواق مو براس نق تيغوق سوغكوه ۲، هاري هق اكو، مائسي دشرگ ني، نق تورون فول بري نمفق. تافي توهن

- 23 تاء بري. ننټي، اد اورغ نق رويت كهد مو: ها، تو دي! اتوا  
ها، نيله دي! جاغن مو توبيت كي توروت دي.
- 24 بيلا سمفي هاري هق اكو تورون دشرگ تو، ماري سروف كيلت،  
امبيق دكاكي لاغيت باليق ني، هيڭگ سمفي دكاكي لاغيت باليق  
نون. تافي، بلوم فد تو، اكو مائسي هق تورون دشرگ ني،  
25 مستي كنا سيقسا تروق، كران اورغ هق دوق اد ماس لاني،  
تاء سير تريما اكو.
- 26 تافي بيلا سمفي هاري هق اكو مائسي ني نق تورون دشرگ،  
عيسي كات، نق جادي سروف زمان نبي نوح.
- 27 فد ماس تو، سموا اورغ دوق ماكن مينوم، دوق برلاكي بريني،  
سروف سعمور، هيڭگ سمفي كا هاري نبي نوح ماسوق دالم  
كفل تو، فس تيبا ۲ اير به ماري، بري سلم ماتي هابيس.  
28 بيلا سمفي هاري تو، عيسي كات، نق جادي سروف زمان لوط  
جوگ. سموا اورغ دوق ماكن مينوم، جوال بلي، دوق منام،  
بوات رومه، سروف سعمور.
- 29 تافي بيلا سمفي كا هاري هق لوط توبيت دنگري صودوم تو،  
تيبا ۲ افي دغن بارا ۲ فانس، تورون ماري دلاغيت اتس اورغ  
نگري تو، بري ماتي هابيس.
- 30 نق جاني بالس تو جوگ، عيسي كات، هاري هق اكو مائسي  
دشرگ ني، نق تورون فول بري نمفق.
- 31 فد ماس تو، كالو اورغ دوق اتس سوتوه رومه، جاغله دي  
تورون نق امبيق بارغ دولو. فس، كالو هق دوق دبنده فون،  
جاغله فالينغ كليق كا رومه دولو!
- 32 ايغته! اف هق جاني كا بيني لوط تو! عيسي كات.
- 33 سياف ۲ دوق كاچغ چاري جالن نق بري ديري دي سلامت  
اتس دنيا، نق روگي پاوا دي ساج. تافي سياف ۲ جوغ سره  
پاوا دي، تتتوله دي نق بوليه سلامت!

- 34 اڪو رويت بري مو ايغت، عيسى کات، فد ماس تو، دوا اورغ  
دوق تيدور اتس گرغ تشه مالم، فس توهن نق امبيق سئورغ،  
تيغگل سئورغ.
- 35 فس دوا اورغ بتينا دوق مغيسر، نق امبيق سئورغ، تيغگل  
36 سئورغ.
- 37 فس، صحابة عيسى تان دي: يا توانكو، دمان نق جاني بالس  
تو؟ عيسى فون جواب: دمان اد بارغ ممفوس، دسيتوله بوروغ  
ايريغ نق کي.

### باب 18 اورغ بتينا مسکين دغن توء حاکيم

- 1 لفس تو، عيسى رويت چريتا ني دغن فاکي عبارة. توجوان  
دي، نق بري مريد ۲ دي کاجغ مينتاء دعا دغن تاءبراس مالس.
- 2 اد سئورغ حاکيم دوق دساتو بندر. دي تاءتاکوت کا توهن، تاء  
تاکوت کا مائسي.
- 3 فس، اد اورغ بتينا هق توءلاکي ماتي، دوق دبندر تو جوگ.  
دي اولغ کي سعمور، مينتاء حاکيم کرت سين منغ دي، دغن  
گو لاون.
- 4 لام ده، حاکيم مالس نق دغر کا دي، تافي سود سکالي، دي  
5 فيکير کات: ولو اڪو تاءتاکوت کا توهن، تاءتاکوت کا مائسي  
فون، تافي بلرله اڪو نق کرت سين منغ دي، سبب دي نق  
ماري کاجو سعمور، بري اڪو سرابوت!
- 6 فس ربّي عيسى کات: دغرله اف هق توء حاکيم کات تو، فس  
دي حاکيم هق تاءعاديل!
- 7 کالو بالس تو، تنتو توهن نق کرت سين منغ اورغ هق جاني  
ميليقي دي، هق دوق مينتاء دعا سياغ مالم دغن تاء فوتوس.  
توهن نق لمبت که؟
- 8 نق! تنتو توهن تاءلمبت، نق کرت سين منغ فواق هق جاني

میلیق ئی. تافی بیلا اکو، مائسی هق تورون دشرگ نی، ماری  
فول، عیسی کات، نق تمو کالاق اورغ هق دوق هارف کا توهن  
سوڭکوه؟

### دعا مان توهن برکن؟

- 9 عیسی رویت عبارة سا لاکي، انتوق توجو کا اورغ هق اغکیت  
دیری ئی کات مولیق، کا اورغ لائین ئی هینا.
- 10 ار دوا اورغ کي کا بیت المقدیس نق بر دعا، اورغ فریسی سئورغ  
سئورغ لاکي کرج کوتیف چوکی، هق سموا اورغ هینا.
- 11 اورغ فریسی باغون بریری سئورغ ئی، بر دعا بالس نی:  
یا الله، یا توهن کو! اکو مغوجف تریما کاسیه کا توهن کران  
اکو تائبیاس طمع، تائبیاس منیفو اتوا بوات زناء فون، تاء  
سرووف اورغ ۲ لائین تو! اکو اوچف تریما کاسیه جوگ، کران  
اکو تاء سرووف دغن اورغ کوتیف چوکی نی.
- 12 یا توهن! اکو بیاس فواس دوا هاری دالم سمیغگو، فس درفد  
سموا حاصلن کو، اکو بری سکیان دالم سفولوه، کلوار زکات.  
13 تافی اورغ کوتیف چوکی فول، ئی دوق بریری جاوه دغن اورغ  
فس، تکه بر دعا، ئی مالو نق لغئق نایک کا اتس. ئی دوق  
لوروت دادا دغن کران سسل سوڭکوه، فس کات:  
یا توهن! کسیاغ بلس له، کا اکو نی، اورغ بردوسا!
- 14 سسوڭکوهن، عیسی کات، بیلا دوا اورغ تو کلیق کا رومه ماسیغ ۲  
جادی اورغ بردوسا هق میسل تو، هق توهن کات تاء ساله ده،  
بوکن اورغ فریسی. کران اورغ هق سوک بسر کا دیری کات ملیا،  
تنتو توهن نق بری رنده فول، فس اورغ هق سوک مرنده  
دیری، توهن نق بری ملیا.

### عيسى بري برکت اتس بوق ۲

- 15 ار اورغ هق باوا۱ انق ۲ کچیک کي کا تمفت عيسى، نق  
مینتاء عيسى سوروه لتق تاغن اتس کفلا بوق ۲ بري برکت کا  
ري. فواق صحابة عيسى فون تیغوق اورغ ني، فس لارغ ري  
تاءسير بري ماسوق .
- 16 تافي عيسى فغکیل بوق ۲ ماسوق ماري، بلغ ۲ کات: بلر ري  
ماسوقله! جاغن لارغ ري، کران اورغ ۲ لاگو نیله هق توهن بري  
ماسوق دوق باوه فرینته ري!
- 17 مو ایغتله، عيسى کات، سیاف هق تاءسير بري توهن مرینته  
دالم هاتي سروف دغن بوق ۲ سائي، تتتوله اورغ تو نق  
ماسوق دوق باوه فرینته توهن تاءليه، بیلا ۲ فون.

### اورغ کاي ماري چاري عيسى

- 18 ار سئورغ کتوا اورغ يیهوي، ماري کیچیق دغن عيسى کات:  
يا توان گورو هق باءیک! امب کا بوات لاگو مان، نق بري  
بولیه هیدوف هق کلل؟
- 19 عيسى جواب: باءاف مو کات اکو باءیک؟ توهن سا ساج هق  
باءیک. مو تاهو ده حکوم ۲ توهن هق کات:
- 20 جاغن بوات زناء، جاغن بونوه اورغ، جاغن چوري، جاغن  
کیچیق بوهوغ، فس بري حرمة له کا ایبو باف مو!
- 21 اورغ تو جواب: جق کچیک ۲ لاگي، امب تورت سموا حکوم ۲ ني.
- 22 بیلا عيسى دغر بالس تو، ري کات: ار سکارا لاگي هق مو  
کورغ. مو جوالله هرت مو سموا، فس کي صدقه کا اورغ  
مسکین بري هابیس. بوات بالس تو، مو نق بولیه کلیق  
هرت دشرگ. فس ماريله، تورت اکو کي!
- 23 تافي بیلا کتوا تو دغر هق عيسى سوروه تو، ري براس



- سوسه هاتي، کران هرت دي بايق .
- 24 عیسی تاهو اورغ تو سوسه هاتي . سبب تو دي کات: تنتو فایه اورغ کاي نق سره دیری دي دوق باوه فرینته توهن .
- 25 کالو بندېخ، موده لاځي سئیکور اوتنا مپوروت لوبغ جاروم، فد اورغ کاي جوغ سره دیری ماسوق دوق باوه فرینته توهن !
- 26 اورغ هق دوق دغر کا عیسی، تان دي کات: کالو بالس تو، سیاف دي نق بولیه سلامت ؟
- 27 عیسی فون جواب: فرکارا ۲ هق تاءلیه جايي کالو برگنتوغ فد مائسي، دغن توهن، بولیه .
- 28 فس فیتروس کات: تیغوقله توان، کیت تیغگل بلاگ درومه، نق توروت توان کي !
- 29 عیسی کات: سوغکوهرله، فس دغر هق اکو نق رویت فد مو ! سیاف ۲ هق جوغ تیغگل رومه تغک دي، اتوا ادیق برادیق، ایبو باف اتوا انق بیني فون، سابیت دي نق بوات کرج دالم فرینته توهن، تنتو دي نق تریمه لبیه ۲ فد سموا تو، تکه دي 30 دوق د دنیا. فس داحیره فول، نق تریمه هیدوف یغ ککل جوگ.

### عیسی رویت کالي یغ کتیک حال دي ماتي

- 31 فد ماس تو، عیسی کویت صحابه دي دوا بلس اورغ تو، کي سوکو فد اورغ رامي سیکیت، رویت کا دي کات: دغرله ! لاني کیت دوق توجو کا کوت جروسلم. دسیتوله، سموا فرکارا هق نبي ۲ دولو بیاس رویت چارا حال اکو، مائسي هق تورون دشرک ني، تنتو نق کنا جايي .
- 32 اکو نق کنا سره کا اورغ بغسا لاین، فس، فواق تو نق مغنجیغ کا اکو، نق ماکي، نق لوده ۲ اتس کو، نق فیات 33 کا اکو، سمفي کنا بونوه ماتي. تافي ماسوق هاري یغ کتیک توهن نق بری اکو هیدوف کلیق سمولا !

34 صحابة ۲ عيسى تاء تاهو سيكيت هابوق معنا هق عيسى رويت  
سائي، سروف دوق سوسوف تاء نمفق، دي تاء فهم اف هق  
عيسى دوق كيچيق تو.

### عيسى بري هيلغ اورغ مات بوت د جريكو

- 35 عيسى برجالن كي تو، نق ماسوق دكت بندر جريكو. فس  
ار اورغ مات بوت دوق مينتاء صدقه تفي جالن.
- 36 بيلا بوپي اورغ رامي لالو كو، دي، دي فون تان: اف بوپي رامي  
37 ني؟ اورغ رويت كا دي: عيسى اورغ نصره نق لالو كو، ني!  
38 دي فون مناء و سوارا درس، كات: يا عيسى، انق چوچو راج  
راء و! كسياغله كا امب كاتيق!
- 39 بايق اورغ هق كي دولو فد عيسى فون، لارغ دي، سوروه دوق  
ديام. تافي دي مناء و كهوور درس لاكي، كات: يا انق چوچو  
راج راء و! كسياغله كا امب كاتيق!
- 40 عيسى فون برادو سلالو، سوروه باوا، ماري اورغ مات بوت. بيلا  
دي سمفي دكت، عيسى تان دي: مو نق مينتاء اف سوروه اكو  
بوات؟
- 41 دي جواب كات: يا تون، مينتاء بري مات امب بوليه نمفق  
سروف دولو!
- 42 عيسى كات فول: تيغوقله! كران مو فرچاي، مات مو بوليه هيلغ!  
43 فد كتيك تو جوگ، مات دي بوليه نمفق. فس دي فون توروت  
عيسى كي، بلغ دوق اوچف تريما كاسيه كا توهن. اورغ رامي،  
هاوا دي تيغوق كجادين ني، دي سماو فون فاكث فوجي كا توهن  
جوگ.

### عيسى كي تمو دغن زاكي

باب 19

لفس تو، عيسى ماسوق لالو كو، بندر جريكو، فس ار

- 2 سئورغ نام زاكي دوق سييتو ، جاني كتوا اورغ كرج كوتيف  
چوكي ، فس ري اورغ كاي.
- 3 ري براس نق تيغوق عيسى تو اورغ لاكو مان ، تافي تاءليه ،  
كران اورغ رامي ، فس ري رنده .
- 4 ري فون هوغلگ كي دافن سيكيت ، نائيك فوهون ارا نق تيغوق  
عيسى هق لالو كوء تو .
- 5 بيلا سمفي كا تمفت ري ، عيسى فون لغئق فغكيل ري كات:  
هي زاكي ! تورون باغت سيكيت ديه ! هاري ني اكو كئا كي
- 6 برهنتي درومه مو ! زاكي فون تورون سلالو ، سمبوت عيسى  
كي كا رومه دغن سوک هاتي .
- 7 بيلا اورغ رامي تيغوق فرکارا ني ، ري تاءبرکن ، فس دوق  
برسوغوت ۲ کات : باءاف ري كي برادو درومه اورغ هق تاءسير  
توروت حکوم توهن ؟
- 8 لفس تو ، زاكي باغون برديري دافن اورغ رامي ، فس کات کا  
ربي عيسى : دغرله توان ! امب نق بهاگي ستغه ، سموا هرت  
امب ، بري کا اورغ مسکين . فس اورغ مان ۲ هق امب بياس  
تيفو ، امب نق هنترکليق دويت ري امفت کالي گندا !
- 9 عيسى فون کات کا زاكي : هاري ني ، توهن بري مو سلامت ،  
سکالي دغن اورغ رومه تئگ مو ! فس مو جاي انق چوچو  
نبي ابراهيم هق سبنر .
- 10 کران اكو ، مائسي هق تورون دشرك ني ، ماري نق چاري اورغ  
سست ، بري ري سلامت .

### عبارة دويت مس سكيلیغ

- 11 فس عيسى دوق رويت چريتا دغن فاكي عبارة ، کا سموا  
اورغ هق دوق دغر کا ري . کران ري دکت نق سمفي ده کا  
کوت جروسليم ، فس فواق تو سفک کات ، ماس توهن نق

- 12 امبيق فرينته دي دغن سمفرن سمفي ده. سابيت توله عيمسو رويت چريتا ني: ار سئورغ كتورونن راج، كنا كي كا نكري جاءوه، نق مينتا كواس جاني راج دنكري دي، فس تو، دي نق كليق.
- 13 بلوم فد دي كي، دي فغكيل همب دي سفولوه اورغ ماري، نق بري كا دي سكفيغ رويت مس سئورغ، دغن فسن بالس ني، كات: امبيق رويت ني، كي بوات كرج هق بوليه لاب، سمفي اكو كليق فول.
- 14 لفس تو، دي فون كي كا نكري جاءوه، تافي رعيت نكري هق دي تيغكل ني بنجي كا دي، فس هنتر سفواق اورغ كي رويت كا راج بسر ديق نون كات: كيت تائسير بري اورغ تو جاني راج نكري كيت ني!
- 15 بيلا راج هق كي مينتا تو، بوليه ده كواس، دي فون كليق ماري كا نكري هق سديا. فس دي فغكيل همب ۲ هق امبيق رويت مس سكفيغ سئورغ دولو تو، نق تاهو بوليه لاب بايق مان، دغن فاكي رويت تو.
- 16 همب هق مولا ۲ ماسوق كات: يا توانكو، امب فاكي رويت مس سكفيغ تو، بوليه لاب سفولوه كفغي!
- 17 راج فون كات كا دي: موليقله! مو همب هق بايك، كران مو جاني جوجور دالم فركارا هق كچيك، اكو نق بري مو فرينته اتس سفولوه بندر.
- 18 همب هق كدوا ماسوق فول كات: يا توانكو، امب فاكي رويت مس سكفيغ تو، بوليه لاب ليم كفغي!
- 19 راج كات كا دي: مو فون بوليه فرينته اتس ليم بندر.
- 20 فس همب سا لاكي ماري رويت: يا توانكو، نيله رويت مس سكفيغ هق توانكو بري دولو. امب بوغكوس تاروه دالم كاين

- 21 کران تاکوت کا توانکو، سابیت امب تاهو ده توانکو کرس هاتي.  
توان بیاس امبیق لاب هق اورغ لاین کرج. توان گي کوتیف  
حاصلن تمفت تون تاءتنام!
- 22 راج کات کا ري: چیه! مو همب جاهت ساج! اکو نق جاتوه  
حکوم توروت فرکتان مو! مو کات اکو بولیه لاب هق اورغ  
لاین کرج، فس کوتیف حاصلن تمفت اکو تاءتنام.
- 23 کالو بالس تو، باءاف مو تائبوه رویت تو دالم بیغک، فس  
بیلا اکو کلیق ني، نق بولیه رویت برانق کاتیق؟
- 24 لفس تو، راج سوروه اورغ هق دوق سیتو: امبیقله رویت  
هق دوق رغن يي سکفیغ، بري کا اورغ هق ار سفولوه کفیغ!
- 25 فواق تو کات: بري باءاف کا يي، توانکو؟ يي ار ده سفولوه  
کفیغ!
- 26 راج فون جواب: رغلره هق اکو نق رویت ني! اورغ هق ار ده،  
يي نق بولیه باپق لاگي، تافي اورغ هق تاءاف سکارا، هق  
ار سیکیت فون، نق کنا رمفس هابیس.
- 27 فس راج سوروه فول: باوا ماريله، فواق هق جاي سترو اکو،  
هق تاءسیر بري اکو جاي راج تو، فس جاتوه حکوم بونوه  
کا ري دافن اکو ني!

### عیسی بلارق سروف راج، ماسوق دالم کوت

- 28 سود کات بالس تو، عیسی فون برجالن هادف گي کوء
- 29 دافن، کا کوت جروسلم فول. بیلا سمفي دکت کمفوغ بیت  
فاکي رغن کمفوغ بیت عني، دکاکي بوکیت زیتون، يي سوروه  
مرید يي روا اورغ، گي دولو. يي فسن کات بالس ني:
- 30 مو کیله کا کمفوغ هق دوق هادف. با ماسوق، مو نق تمو  
رغن سئیکور انق هیمر، دوق تمبت دسیتو، هق اورغ تاء  
بیاس ناءیک لاگي. کیله، اوغکي جیرت يي فس باوا ماري سینی!

- 31 کالو اد اورغ تاش: مو بواغ باء اف؟ مو جواب کات: تون کيت  
نق فاکي سبنتر.
- 32 دوا اورغ تو فون کي، تمو دغن فرکارا هق عیسی رويت تو.
- 33 تغه دي دوق اوغکي جیرت انق هیمر تو، تون دي ماري تاش:  
مو دوق اوغکي باء اف، جیرت انق هیمر تو؟
- 34 دي فون جواب: تون کيت نق!
- 35 فس، دي هیريت انق هیمر کي کا تمفت عیسی، امیق کاین  
باجو هق دي، همفر اتس بلاکغ هیمر، بري عیسی ناء یک.
- 36 تکه عیسی ناء یک هیمر کي تو، باپق اورغ همفر کاین باجو  
دتغه جالن عیسی لالو.
- 37 بیلا سمفي دکت ایبو کوت، نق تورون بوکیت زیتون تو، سماو  
اورغ رامی هق توروت عیسی کي، فاکت اوچف تریما کاسیه دغن  
سوارا درس، نق فوجي کا توهن کران فرکارا ۲ هق توهن بري  
دي کلیه ده. دي کات بالس ني:
- 38 بري توهن تورون رحمتله اتس راج هق ماري  
دغن نام توهن تو! دیاله هق بري سلامت سجهترا  
دشرگ! دیاله هق یغ مهالمیا، دتمفت هق تیغکي سکالي!
- 39 دالم فواق اورغ رامی تو، اد اورغ فریسی جوگ. دي فون کات  
کا عیسی: هي کورو! لارغ فواق مو، سوروه دوق دیام!
- 40 عیسی جواب کات: اکو رويت فد مو، کالو فواق ني دوق سپف  
باتو ۲ هق دوق اد سینی کنا کیچیق کنتي ني!

---

عیسی دوق مناغیس کران سایغ کا کوت جروسلم

---

- 41 بیلا ماسوق دکت لاگي، عیسی فندغ کلیه کا ایبو کوت تو،  
فس دي سبوت فرکتان ني، بلغ ۲ مناغیس:
- 42 هي کوت جروسلم! کالو مو بولیه سدر حال فرکارا هق نق  
بري سلامت، مولیقله، تافي مات مو تاءنمفق. سبب تو تنتو

- 43 نق سمفي ده، هاري حكومن مو. فواق سترو ۲ مو نق ماري ليغكوغ كلييغ كوت مو ني، عيسى كات، نق بوات تمبون تانه تيغكي بري بوليه ماسوق هيمنيت فواق مو بري هابيس.
- 44 دي نق فوگكه بوات خيانه كوت ني، سكالې دغن فواق مو هق دوق دالم، هيغك سمفي باتو هق برتغكوف فون تاءاد سكفيغ هابوق، سبب مو تاءدولي، هاري هق توهن تورون نق بري سلامت كا فواق مو!

### عيسى همبت فواق اورغ جوال دالم بيت المقدس

- 45 بيلا سمفي ده دكوت، عيسى ماسوق دالم بيت المقدس، تمفت سوچي هق توهن، فس دي نق همبت اورغ هق دوق جوال بلي دسيتو. دي كات: اد رويت دالم كتاب توهن:

رومه ني اكو نق بري جاري تمفت اورغ بردعا.

- تافي، عيسى كات، فواق مو بري جاري تمفت منوسوف اورغ فپامون!
- 47 لفس تو، عيسى مهاجر اورغ گنف ۲ هاري دالم بيت المقدس تو. فس فواق امام ۲ بسر، گورو تورات، دغن كتوا ۲ كسموا،
- 48 دوق چاري جالن نق بونوه عيسى. تافي تاءليه بوات اف ۲ سبب اورغ رامي سموا سوک دغر فهاجران عيسى.

### باب 20 اورغ ماري تان: عيسى باوا تيته هق سياف؟

- 1 فد ساتو هاري، تکه عيسى دوق مهاجر دالم بيت المقدس فس دوق سرو خبريغ بايك كا اورغ رامي تو، فواق امام بسر، دغن گورو ۲ تورات، سكالې دغن كتوا ۲ اورغ يهوي تو، فاكت ماري تان عيسى كات: رويته، کواس هق مان بري مو بوليه بوات
- 2 فرکارا ۲ ني؟ سياف سوروه مو باوا تيته دي، بري بوليه بوات؟

- 3 عيسى جواب: اكو فون نق تان مو جوگ، ساتو فرکارا؟ بيلا
- 4 يحيا بري اورغ تريما روكون مندي تو، دي باوا تيته هق سياف،  
هق توهن كه؟ اتوا هق مائسي؟ جوابله!
- 5 فواق ۲ تو فون فالينج بحس سام سنديري، كات: ايه! كيت نق  
كات بالس مان ني؟ كالو كيت جواب كات: ماري درفد توهن،  
دي نق تان كيت: ها! باء اف مو تاء فرچاي كا يحيا؟
- 6 كالو كيت كات: ماري درفد مائسي فون، تنتو سموا اورغ رامې  
ني نق امبيق باتو فيكوغ كيت، سبب فواق تو فرچاي فوتوس  
كات يحيا جادي نبي!
- 7 سبب تو له، فواق تو جواب كا عيسى: كيت تاء تاهو، يحيا
- 8 امبيق رمان كواس دي. فس عيسى كات: كالو بالس تو، اكو  
فون تاء سير رويت جوگ، اكو باوا تيته هق سياف، بوليه  
بوات فرکارا ۲ ني!

### عبارة اورغ فاوه كبون جابيت

- 9 فس تو، عيسى رويت چريتا كا اورغ رامې دغن فاكې عبارة.  
او سئورغ بوات كبون جابيت. فس تو، توان بري فاوه كا اورغ.  
فس، دي سنديري توبيت كي دوق نكري اورغ، لام جوگ.
- 10 بيلا سمفي فرياغ كوتيف بواه، توان كبون سائني هنتر انق  
كولي دي كي كا اورغ ۲ هق فاوه، سوروه امبيق بكيان بواه ۲ هق  
باليق توان. تافي فواق هق فاوه كبون گوم انق كولي تو،  
فس همبت كليق، دغن تاء بري اف سكارا.
- 11 فس توان كبون هنتر سئورغ لاكي. اورغ ني فون، فواق تو گوم  
بوات هودوه كا دي، همبت كليق دغن تاء بري اف سكارا.
- 12 فس دي هنتر اورغ يځ كتيگ فول. هق ني، فواق فاوه توبوات  
تروق لاكي، فس تولق توبيت كلوار.
- 13 فس توان كبون فيكير كات: اكو نق بوات لاكو مان؟ اه! اكونق



هنتر انق کو سنديري هق اكو كاسيه . تنتو اورغ هق فاوه تو  
نق حرمة كا ري .

14 تافي بيلا فواق هق فاوه تو تيغوق انق توان كيون ماري ،

ري كيچيق سام ري كات : نيله انق توان كيون سنديري . ماري

كيت فاكت بونوه ري ، باروله هرت ري ني نق جادي ميليق كيت .

15 فس ، ري تولق توبيت دالم كيون تو ، بونوه . توان كيون نق

بوات لاكو مان كا اورغ هق فاوه تو؟ عيسى تان .

16 تنتو ري نق ماري بونوه فواق تو ، بري فاوه كا اورغ لائين فول .

بيلا اورغ رامي دغر فركتان عيسى ني ، ري كات : اوه يا توهن !

جاغن بري جاني سرورف توله !

17 عيسى فون فرهاتي تيغوق كا اورغ رامي تو كات : كالو بالس تو ،

مو كنا فيكير اف معنا ايات دالم كتاب هق كات :

باتو هق توكنغ رومه تاهوق كات تاءترفاكي ، جادي

باتو هق لتق رتمفت مستحق سكالپي دالم رومه .

اورغ مان ۲ هق ماري ترانتوق دباتو تو ، نق فچه

هابيس ، فس اورغ مان ۲ هق تيمفا دباتو تو ،

نق كفيت هنجور .

18

اورغ ماري تان عيسى چارا حال باير حاصل

19 فواق گورو ثورات دغن فواق امام بسر ، هولور تاغن نق

ايكت عيسى سلالو ، سبب ري تاهو كات عيسى رويت عبارة تو

دوق توجو كا ري . تافي ري تاكوت كا اورغ رامي تو .

20 لفس تو ، ري دوق ننتي تيغوق فلواغ موليق . ري اوفه اورغ كي

جادي مات گلف ، هق بوات سرورف هاتي جوجور ، نق امبيق

فركتان عيسى بوات هيد بوليه ادو عيسى كا فمريته كراجان

روم ، بري جاتوه باوه كواس ري .

- 21 فواق مات گلف سائي، ماري تان عيسى: يا توان گورو! کيت تاهو ده کات توان کيچيک بتول، مغاجر هق سوځگوه سعمور .
- کيت تاهو ده، توان تيغوق اورغ سروف بلاک، فس مغاجر سوځگوه ۲ کهنديق توهن انتوق مائسي. سبب توله، توان فيکير بالس مان. کالو کيت باير حاصل کا مهاراج روم، کيت 22 ساله حکوم توهن کا دق؟
- 23 تافي عيسى تاهو ده کفنداين تيفوداي دي، فس دي جواب:
- 24 ماري تنجوقله کا اکو دويت فيرق سکفيغ، بري اکو تيغوق، عيسى کات. ها! روف دغن نام سياف، فوکول اتس دويت ني؟
- فواق تو فون جواب: هق مهاراج روم، توان!
- 25 عيسى فون رويت کا دي: ها جيلا! بايرله کا مهاراج روم هق جادي ميليق راج، فس سره کا توهن هق جادي ميليق توهن.
- 26 فواق تو نق امبيق فرکتان عيسى بوات هيده دافن اورغ رامي تاليه. دي براس حيران کا هق عيسى جواب تو، فس دي دوق ديام.

### اورغ تان عيسى چارا حال اورغ ماتي هيدوف کليق

- 27 لفس فد تو، ار اورغ دالم فواق صدوقي ماري کا تمفت عيسى. فواق صدوقي تو جايي ساتو فواق اوکام يهوي هق فرچاي کات: اورغ ماتي تاءبگکيت هيدوف کليق فد هاري قيامه.
- 28 فواق تو کات: هي توان گورو! دالم کتاب، نبي موسی کات، کالو اورغ جنتن ماتي تيغگل بيني دي بلوم فد بوليه انق، ادیق دي تو کنا منيکاح دغن بکس بيني کاکق دي، فس کالو بوليه انق، کنا کيرا سروف انق بکس لاکي هق ماتي تو.
- 29 بياس جادي، ار ادیق برادیق جنتن توجه اورغ. هق سولوغ بريني، فس دي ماتي دغن تاليه انق لاکي.
- 30 ادیق يغ کدوا فون منيکاح دغن بکس بيني کاکق دي، فس

- 31 تاءان نق بوليه انق جوگ ، يي ماتي . فس اديق يڭ كتيگ ، جايي بالس تو جوگ ، سمفي كا هق بوغسو ، اديق يڭ كتوجوه فون . سموا منيكاڄ رغن اورغ بتينا تو ، فس ماتي بلاك ، رغن تاءبوليه انق لاڳي .
- 32 سودسكالي ، اورغ بتينا تو فون ماتي جوگ .
- 33 كيت نق تان توان : فد هاري بڭكيت نون ، بيلا سموا اورغ ماتي نق هيديوف سمولا ، اورغ بتينا تو نق جايي بيني هق سياف ؟
- 34 كران توجوه اورغ تو منيكاڄ رغن يي بلاك !
- 35 عيسى فون جواب بالس ني : سوغڳوه ، تكه مائسي دوق درنيا يي برلاكي برييني ، تافي بيلا مائسي بڭكيت هيديوف كليق ،
- 36 اورغ هق سوغ نق بوليه هيديوف راخيرة تو ، تاءبرلاكي برييني ، سبب يي دوق سروف ملايكة ، تاءكنا ماتي ده . يي جايي انق 2 توهن ، سبب يي سوده هيديوف كليق سمولا .
- 37 فس ، چارا حال اورغ ماتي نق بڭكيت هيديوف سمولا تو ، عيسى كات ، نبي موسي سنديري بري تنتو دالم ايات هق رويت چارا حال هوتن ستومفوق هق مپالا تو . دالم ايات تو موسي فغڭيل توهن :

توهن هق ابراهيم ، اسحاق رغن يعقوب دوق سمبه

- 38 معنائ ، عيسى كات ، دپاله توهن اورغ هق هيديوف لاڳي ، بوكن انتوق اورغ هق ماتي ده ، كران رتمفت توهن ، سموا تو دوق هيديوف چارا بارو .
- 39 ار اورغ دالم فواق گورو تورات هق كات : موليقله هق توان گورو جواب تو !
- 40 يي مڭاكو بالس تو ، كران يي تاءبراني نق تان اف لاڳي رغن عيسى .

### عيسى سنديري تان چاراحال فريغكت المسيح تو

- 41 فس عيسى تان فواق تو: بالس مان بوليه كات المسيح هق توهن جنجي تو، نق جاني كتورونن راج داءود؟
- 42 کران راج داءود سنديري رويت دالم کتاب زبور کات:

توهن رويت ده کا ربي کو کات: دودوقله دسبله کانن کو، سمهنگ اکو، توهن، بري سترو ۲ مو دوق سروف فلافيق دباوه کاکي مو!

- 44 راج داءود فغکيل کا المسيح تو ربي، بوکن؟ کالو کيتو، بالس مان المسيح هق توهن جنجي تو، بوليه جاني كتورونن راج داءود؟

### عيسى بري امران ترهاف گورو ۲ تورات

- 45 تکه سموا اورغ تو دوق دغر کا عيسى، بي فالينغ کات کا
- 46 صحابة ۲ بي: جاگ بري باءيك ۲ له ترهاف گورو ۲ تورات! بي سوک فاکي باجو جوبه، برجالن کي ماري تمفت اورغ برهيمفون نق بري اورغ تگور بي دغن حرمة. دمسجيد، بي سوک فيليه تمفت موليق نق دودوق. دتمفت جاموان فون سروف تو جوگ. بي سوک تيفو داي اورغ ۲ بوجغ، نق رمفس رومه دي. فس تو 47 بي کي بوات دعا هق فنجغ ۲ دافن اورغ. تنتو حکومن اتس فواق تو نق تروق فد اورغ لائين!

### اورغ بتينا مسکين سمبه دويت کا توهن

باب 21

- 1 فد ماس تو، عيسى دوق کليه کوء تو کوئي، دالم بيت المقديس، فس نمفق اورغ کاي دوق بوه دويت دالم توغ تمفت سره دويت کا توهن، هق ار دسيتو.

- 2 فس ري نمفق اورغ بتينا بوجغ مسكين ، ماري بوبوه روا كفيغ رويت ، روا ۲ كوفغ سا .
- 3 عيسى فون كات : اكو نق رويت كغد مو كات : اورغ بتينا مسكين ني بري بايق فد سموا اورغ لائين ۲ تو !
- 4 كران اورغ ۲ لائين تو بوات صدقه هق لبیه كيرا بلاك ده ، درفد ككايان ري ، تافي اورغ بتينا ني ، مسكين كيتو لالو فون ، ري بري كسموا هق ري فاكي انتوق نق هيديوف !

### عيسى رويت حال بيت المقدس نق رونتوه

- 5 فس ار اورغ ۲ دسيتو دوق كيچيق حال بيت المقدس كات چوميل سوغكوه ، دغن باتو ۲ موليق ، دغن بارغ ۲ مهل ، هق اورغ ماري سمبه كا توهن .
- 6 عيسى فون كات كا ري : سموا فركارا هق مو دوق كليہ ني ، ماس دافن نق رونتوه ، تاءتيغگل سكفيغ هابوق هق دوق برسوسون ني ، نق برتابور رات ۲ هابيس .

### كسوساهن دغن كسيقسائين

- 7 فس فواق تو تان عيسى كات : توان كورو ! رويتله ، بيلا نق جادي فركارا ني ؟ فس تندالكو مان بوليه كيت تاهو كات ماس تو نق سمفي ؟
- 8 عيسى جواب : مو كنا جاگ بري موليق ! جاغن كنا تيفو ! بايق اورغ نق ماري ، لفس سا ۲ ، فاكي نام كو كات : اكله ري ، هق توهن جنجي تو ! اتوا ، سمفي ده ماس ! تافي ، جاغن مو تورو ري ، عيسى كات :
- 9 مو تاءسه بيمبغله ، بيلا مو نق بوليه بويي اورغ موسوه ، اتوا هارو هارا دالم نكري . فركارا ۲ ني مستي كنا جادي دولو

- تافي بوکن تندام کات دنيا نق سود سلالو.
- 10 فس عیسی کات لاڳي: نڱري نق برلاون سام نڱري، کراڄان فون
- 11 نق برلاون سام کراڄان. تانه نق برکوچق تروق، سرات دنيا
- فس نق جادي کماراو دغن فپاکيت حق ملارت هابيس. نق جادي
- فرکارا حق بري تاکوت ساغت، دغن تندام بسر حق تورون
- رلاڳيت.
- 12 بلوم فد سماو فرکارا ني جادي، اورغ نق ايکت مو بوات پان، نق
- باوا موکي اڊو، کا کتوا مسجد اورغ ييهوي، فس بويه دالم
- گوق. اورغ نق باوا مو برديري دافن کتوا ۲ دغن راج ۲ کران اڳو
- 13 عیسی کات. تکه توله، فلواغ مو بوليه رويت خبر بايک کا
- ني تو.
- 14 بري هاتي مو دوق تتف، مو تاء کنا بيمغ چارا حال نق جواب
- 15 بالس مان کا دي، کران اڳو نق بري مو سبوت فرکتان دغن
- بيجقسان، سهيڱ سترو ۲ مو تاء ليه بحس کات بوهوڱ.
- 16 فد ماس تو، ايبو باف مو فون نق سره مو کا فواق تو. اريق
- براديق، اورغ حق کنا دغن مو، ساءين ۲ مو فون، نق بوات بالس
- تو جوگ، نق بري فواق تو جاتوه حکوم بونوه کا اورغ دالم
- 17 فواق مو. گنف ۲ اورغ نق بنچي کفد مو کران اڳو، عیسی کات.
- 18 تافي رمبوت مو سئورت فون تاء بيناس.
- 19 مو اود سمفي سودله، کران بالس تو مو نق بوليه سلامت.

### اورغ نق بوات خيانه کوت جروسليم

- 20 فس عیسی کات: بيلا مو تيغوق عسکر برييو ۲ فواق ماري
- ليغکوڱ کوت جروسليم ني، مو نق تاهو کات، تاء لام، کوت
- جروسليم ني نق فونه هابيس ده.
- 21 تکه تو، اورغ حق دوق دالم نڱري ييهوديه، کنا لاري کي دودوق

- دبوکیت. اورغ هق دوق دالم کوت فون، کنا لاري توبیت. فس  
 اورغ هق دوق ددارت، جاغندله ماسوق دالم کوت!  
 22 سبب ماس تو جادي هاري حکومن اتس کوت، فس مستي کنا  
 23 جاني سروف هق کتاب رویت دولو. فد ماس تو، نق تروق  
 سوغکوه کا اورغ بتينا هق مئندوغ فروت بسر، اتوا هق ار  
 انق کچیک. کران کسوساهن بسر نق تیمفا اتس نکري ني،  
 فس مرک توهن نق تورون اتس رعیت ۲ ي.  
 24 اورغ نق کنا بونوه دغن فدغ، اورغ لاین نق کنا ایکت باوا کي  
 کا رات ۲ نکري. اورغ قوفور نق جیجق دالم کوت جروسليم،  
 سهیغک چوکوف ماس هق توهن لتق انتوق ي.

### مائسي هق تورون دشرگ تو نق ماري فول

- 25 فد ماس تو، عیسی کات، نق ار تندا دمتھاري، دبولن،  
 اتوا دبینتغ ۲ فون. فس نکري ۲ اتس دنيا نق فوتوس هرافن،  
 کران تاکوت بوپي لاءوت دغن اومبق ۲ بسر.  
 26 اورغ نق هیلغ عقل کران تاکوت، تکه دي دوق ننتي فرکارا نق  
 جادي اتس سموا دنيا. بینتغ ۲ داودارا فون نق توروت جالن  
 ي تاءليه، کي ایکوت سير.  
 27 باروله اکو، مائسي هق تورون دشرگ ني، نق تیمبول دغن  
 اون، فس نق تورون ماري بري پات، کواس اکو هق بسر،  
 دغن کمليان اکو.  
 28 بيلا فرکارا ني مولا ۲ نق جادي، عیسی کات، مو بوليه یغه  
 لغکي نايک کا اتس، سبب هق مو نق سلامت دکت ده !

### فعاجران درفد فوهون ارا

- 29 لفس تو، عیسی رویت چريتا دغن فاكي عبارة ني: تیغوقله

- فوهون ارا دغن فوهون ۲ لائين ، نق جادي تندا انتوق فواق  
 مو ، عيسى کات .
- 30 بيلا داهن ۲ فوهون تو هيچو سگر ، فس داهون ۲ نق فچه  
 فوچوق ، مو تاهو ده کات ، دکت نق سمفي فرياغ موليق .
- 31 بالس تو جوگ ، بيلا مو تيغوق کجادين سائي ، مو نق بوليه  
 تاهوکات ، سمفي ده ماس ، توهن نق امبيق فرينته دي هق سود .
- 32 ايغتله ، عيسى کات ، بلوم فد سمو اورغ لانيس ني ماتي هابيس  
 لاگي ، فرکارا هق اکو رويت سائي نق جاني .
- 33 لاغيت دغن بومي نق هيلغ ، تافي فرکتان کونق ککل سلام ۲ .

### کيت کنا جاگ

- 34 مو کنا جاگاله ديريمو ، عيسى کات ، تاکوت مو تاء فادول  
 کا تندام تو ، کران مو دوق توروت بري فواس هوا نفسو مو ،  
 اتوا دوق ماکن ارق ، اتوا دوق بيمبغ کا چارا ماکن دالم دنيا  
 ساج ، فس تاکوت هاري تو نق تيبام ماري ، تکه مو تاء کابر ،
- 35 سروف جاتوه دالم فرغکف ، سبب تنتو نق ماري اتس سمو مائنسي  
 دنيا . مو کنا جاگاله دغن برعا تاء فوتوس ، بري ار ريغ ،
- 36 بوليه تاهن سمو فرکارا ني دغن سلامت ، سهيفگ مو بوليه  
 ماسوق برديري دافن اکو مائنسي هق تورون دشرگ ني ، عيسى  
 کات .
- 37 فد ماس تو ، عيسى کي مفاجر اورغ دبیت المقديس کنف ۲  
 هاري . دکت نق کلف ، دي توبيت کي تيدور دبوکيت زيتون .
- 38 فاگي ۲ ، اورغ رامي کي کا بيت المقديس فول ، نق دغر فغاجران  
 دي .

### جالن سترو ۲ عيسى نق بونوه دي

### باب 22

فد ماس تو ، دکت نق سمفي هاري راي ، هق اورغ يهوني



- ٢ بوات جاموان روتي تاء بوبوه اييو، ياءيت هاري راي فسخر.  
 فواق امام ٢ بسر دغن گورو ٢ تورات دوق چاري جالن نق بونوه  
 عيسى، دغن سوليت، کران دي تاکوت کا اورغ رامي.  
 ٣ فد ماس تو جوگ، يودس هق اورغ فغکيل اسکريوت، سئورغ  
 دالم دوا بلس صحابة عيسى تو، توروت سروان شيطان. دي کي  
 ٤ مشورة دغن فواق امام بسر، سکالي دغن کفلا ٢ عسکر هق  
 جاگ بيت المقديس. فواق ٢ ني دوق کيرا جالن مان يودس نق  
 بري فواق تو بوليه ايکت عيسى.  
 ٥ سموا اورغ تو فون براس سوک هاتي، فس جنجي نق اوفه دويت  
 ٦ کا يودس. يودس فون سئگوف نق بوات. لفس تو، دي ننتي  
 فلواغ نق بري بوليه بوات درهاک کا عيسى، سره دي کا فواق  
 امام تو، تکه اورغ رامي تاءاد.

• فواق عيسى سيمفن نق ماکن جاموان فسخر

- ٧ با سمفي هاري هق نق ماکن روتي تاء بوبوه اييو تو، فد هاري  
 تو جوگ، کنا قربان انق کيس انتوق جاموان هاري راي فسخر.  
 ٨ عيسى فون سوروه فيتروس دغن يحيا کات: مو کيله سيمفن  
 جاموان هاري راي فسخر انتوق فواق کيت!  
 ٩ دوا اورغ تو تان: فس نق کي برسيف دمان؟  
 ١٠ دغرله بري بائک ٢، عيسى کات. بيلا مو ماسوق دالم بندر، اورغ  
 جنتن هق فيکول بويوغ اير نق تمو دغن مو. توروت دياه!  
 رومه مان دي ماسوق، مو فون ماسوق کوء تو جوگ.  
 ١١ فس رویت کا توان رومه: توان گورو کيت کات: دمان تمفت  
 توان گورو دغن صحابة ٢ دي نق ماکن جاموان فسخر؟  
 ١٢ توان رومه فون نق تنجوق بري مو کليه، بيليق بسر داتس  
 لوتیغ رومه دي تو، هق دوق سيف ده. مو سيمفله، دسيتو  
 انتوق جاموان کيت!

13 دوا اورغ تو فون گي، تمو سموا فرکارا سروف هق عیسی فسن  
کا دي، فس دي سیمفن انتوق جاموان فسخر دسیتو.

### جاموان ربی عیسی

- 14 بیلا سمفي مالم برجامو، عیسی دوق ماکن سکالي دغن  
صحابه ۲ دي: دي فون کات کا فواق صحابه ني.
- 15 نیات هاتي کو سوغکوه، نق ماکن جاموان ني دغن فواق مو بلوم  
16 فد کنا سيقسا، کران سسوغکوهن اکو نق ماکن جاموان ني  
فول تاءليه، سهيگک سمفي ماس هق توهن نق لتق فرينته  
دي، انتوق نق بري سمفرن مقسود جاموان فسخر ني!
- 17 لفس فد تو، عیسی امبيق چاون ایر بواه جابیت هق بسر. دي  
مغوجف تريما کاسيه کا توهن، فس کات:  
فواق مو سموا اميقله چاون ني، فاکت مينوم کنف ۲ اورغ، کران  
18 سسوغکوهن، جق دهاري ني اکو تاءمينوم ده، ایر جابیت ني،  
سهيگک سمفي ماس هق توهن نق بري سمفرن فرينته دي!  
19 لفس تو، عیسی امبيق روتي، مغوجف تريما کاسيه کا توهن،  
فس چوبيق روتي تو، بهاکي کا صحابه ۲ سموا. عیسی کات:  
اميقله روتي ني، ايغت کات توبوه کو، هق اکو نق بري انتوق  
فواق مو. بواتله سروف ني، جاي تندا فرايغاتن کا اکو!  
20 بالس تو جوگ، لفس ماکن، عیسی امبيق چاون ایر بواه  
جابیت فول، بهاکي کا صحابه سموا، بلغ ۲ کات: ايغتله کات  
ایر دالم چاون ني جاي تندا فرهوبوشن هق بارو، توهن  
دغن مائسي، هق جامين دغن داره کو. داره کو ني، کنا  
منيليه توبیت انتوق فواق مو سموا!
- 21 لفس تو، عیسی کات فول: دغرله فواق مو! تاغن اورغ هق  
درهاک کا اکو، دوق جمفوت مکانن سکالي دغن اکو ني.
- 22 سوغکوه فون، اکو مائسي هق تورون دشرگ ني، کنا گي

ايڪوت جالن هق توهن لتق ده، جق ماس اوال لاڳي، تافي دهشت سوڻگوهه ڪا اورڻ هق درهاڪ ڪا اڪو ني!  
 23 فس، صحابه ۲ عيسيٰ دوق تان سام يي ڪات: سياف دالم فواق ڪيت، هق جادي اورڻ درهاڪ؟

### صحابه ۲ عيسيٰ دوق بحس هق مان هق بسر

24 لفس تو، صحابه ۲ عيسيٰ دوق بحس سام سنديري، هق مان بسر دالم فواق يي.  
 25 عيسيٰ ڪات ڪا يي: راج ۲ دنيا فاڪي ڪواس اتس رعيت ۲ يي. اورڻ هق ار فرينته، نق بري اورڻ فڻگيل يي: فنولوڻ رعيت هق بئڪ! تافي فواق مو بوڪن بالس تو. موليق لاڳي، اورڻ هق تيڻگي سڪالي دالم فواق مو، ڪنا جادي سروف اورڻ هق مودا سڪالي. فس اورڻ هق جادي ڪفلا، ڪنا جادي سروف ڪولي ڪرج درومه.  
 27 سياف هق تيڻگي؟ عيسيٰ تان. اورڻ هق ماڪن دميجا، اتوا اورڻ هق اڱڪيت ماري؟ تننو هق دوق دميجا، هق تيڻگي. تافي تيڻوقله! اڪو هق بياس ڪرج سروف ڪولي دالم فواق مو. فواق مو تبينڱ ڪاچڻ توروٽ اڪو ماري، دالم سموا ڪسوساهن،  
 28 فس اڪو نق بري مو ڪواس بولييه فرينته، سروف توهن باف ڪو بري اڪو ڪواس بولييه فرينته جوڳ.  
 29 فس، بيلا اڪو ماري امبيق فرينته بري سمفرن، فواق مو بولييه دوق ماڪن جاموان دميجا ڪو، فس مو نق بولييه دودوق اتس تحت، انتوق ڪرت سين اتس فواق اورڻ اسرائيل، دوا بلس بڻسا تو.

### عيسيٰ رويت دولو حال ڪلاڪوان فيتروس

31 لفس تو، عيسيٰ فالينڱ رويت ڪا صيمون فيتروس: صيمون، هي

- 32 صيمون، مو نغرله! توهن بنر بري هييليس ماري چوب هاتي فواق مو، سروف اورغ تافيس فادي، نق بواغ هق همفا. تافي اكو برعاه ده انتوق مو صيمون، مينتاه بري مو فرچاي تاه فوتوس كا اكو، عيسى كات. فس، بيلا مو فاليغ فرچاي كا اكو سمولا، مو كنا تولوغ بري سائين ۲ مو فرچاي قواة كاتيق!
- 33 صيمون فيتروس فون جواب: يا توانكو! امب جوغ ريلا توروت سكالې دغن توانكو سعمور، ولو كنا ماسوق دالم كوق، اتوا ماتي فون، تاه اف!
- 34 تافي عيسى جواب كات: نغرله فيتروس هق اكو نق رويت ني! بلوم فد ايم بركو كوق مالم ني، مو نق سبوت دافن اورغ تيگ كالې ده، كات مو تاه كل اكو!

### كندي دويت، بيگ اتوا كاسوت فون

- 35 فس عيسى كات كا فواق صحابه فول: ايغته، بيلا اكو هنتر فواق مو كي دولو تو، دغن تاه باوا كندي دويت، بيگ، اتوا كاسوت فون، مو بياس كورغ اف كا دق؟ بق! فواق تو جواب. تافي لاني، عيسى كات، سياف هق ار دويت دالم كندي، اتوا بيگ فون، كنا باوا كي سكالې. فس، سياف تاه ار فدغ فون، بايك ري جوال باجو لابه ري، كي بلي سبيله فدغ. 36
- 37 كران اكو رويت كا فواق مو، عيسى كات ار ايات دالم كتاب، هق مستي كنا جاني اتس اكو. ايات ني كات:

اورغ كيرا ري سروف اورغ ساله .

- 38 فس هق ايات رويت چارا حال اكو تو، سمفي ماس ده . فس، صحابه ۲ كات كا عيسى: تيغوقله توانكو! سيني ار ده ، فدغ دوا بيله! عيسى جواب كات: فادن ده .

### عيسى دوق برعا رکبون اتس بوکيت زيتون

- 39 لفس فد تو، عيسى توبيت رتمفت جاموان، گي کا بوکيت زيتون، تمفت يي بياس گي سممور. صحابة ۲ فون توروت گي سکالي.
- 40 بيلا سمفي دسيتو، عيسى کات کا صحابة ۲: مو کا برعاه! جاغن بري هاله کا فرکارا ۲ هق ماري نق سويي مو!
- 41 فس عيسى هوندور سيکيت، لبيه کورغ تيگ رفا، فس يي دوق ملوتوت مينتاء دعا لاگو ني:
- 42 يا باف، مينتاء باف بري جائوهله کسيقساڻ هق دوق چارغ انتوق اکوني! تافي، جاغن توروت کهندق کو، بري جاني ايکوت کهندق باف ساج!
- 43 فس تيبام سئورغ ملايکه ماري بري نمفق کا عيسى، نق تولوغ، بري قواة هاتي.
- 44 فس، سابيت عيسى دوق دالم سيقسا سغسارا ساغت، يي کهور قواة برعا، سهيغڭ فلوه توبيت تيتيق اتس تانه سروف داره.
- 45 بيلا باغون درفد دعا تو، عيسى فاليج گي فول کا تمفت صحابة ۲ يي سائي، فس نمفق فواق تو سموا دوق تيدور جندرا، لتيه کران سوسه هاتي.
- 46 عيسى فون کات کا ري: تيدور باءاف؟ باغونله، مينتاء دعا کا توهن، جاغن بري هاله کا فرکارا ۲ هق ماري نق سويي مو!

### فواق سترو ۲ ماري ايگت عيسى دالم کبون

- 47 تاءان سود عيسى کيچيق، تيبا ۲ اورغ رامي سمفي، سکالي رغن يودس، سئورغ دالم فواق صحابة دوا بلس اورغ تو.
- 48 يودسله هق باوا فواق تو ماري. يودس فون ماسوق دکت نق کوچوف فيفي عيسى، تافي عيسى کات: هي يودس! مونق بوات

درهاک کا اکو ماءنسي هق تورون دشرگ ني، دغن کوچوف  
بالس ني که؟

49 بيلا اورغ هق دوق سکالي دغن عيسي نمفق توجوان فواق تو، ني

تان عيسي: توان نق بري کيت لاون دغن فدغ که، دغن فواق ني؟

50 فس، سئورغ صحابة عيسي چابوت فدغ، تاکير سئورغ فواق

امام بسر، کنا تليغا کانن فوتوس.

51 تافي عيسي لارغ ني کات: برادوله، فادن ده! فس ني جامه

تليغا اورغ کنا تاکير ساني، بري سيار.

52 اد فواق امام بسر دغن کفلا ۲ عسکر ني، سکالي دغن کتوا ۲

اورغ يهودي، دالم فواق هق ماري ايکت عيسي تو. عيسي فون

کات کا ني: باءاف مو ماري ايکت اکو، باوا فدغ دغن ميوکول،

بالس ني، سروف اکوني اورغ جاهت؟

53 اکو دوق دغن مو دبیت المقدیس کنف ۲ هاري. باءاف مو تا

ايکت اکو، تکه اکو دوق سیتو؟ تتافي، فرياغ نيله توهن بئر

بري کا فواق مو، دغن فواق ۲ هيليس هق هاتي کلف، نق

بوليه بوات ايکوت سوک مو!

### فيتروس کات ني تاءکنل عيسي

54 فواق تو فون ايکت عيسي، باوا کي کا رومه امام بسر، فس

55 فيتروس توروت بلاکغ جاء وه ۲. اد افي هق اورغ توکوغ دلامن

دافن رومه امام بسر. فيتروس فون ماسوق دوق سکالي دغن

اورغ هق دوق دکت افي تو.

56 فس اد بودق بتينا هق کرج درومه امام بسر. دي نمفق

فيتروس دوق تمفت چره دکت افي. دي فون تيغوق توجو کا

فيتروس، کات: اورغ ني توروت عيسي جوک!

57 تافي فيتروس کات: دق سکالي، ميقي! اکو تاءبياس کنل دغن ني.

58 لفس تو تاءلام، اد سئورغ جنتن هق نمفق فيتروس، فس کات:

- 59 مو فون جادي سفواق دغن اورغ تو جوگ! تافي فيتروس کات :  
بق ، بوکن!
- 60 لفس تو، سجم لاکي، ار اورغ لاین هق کاجغ رويت حال فيتروس  
کات: ها، تنتو سوغکوه اورغ ني دوق تورت عیسی، سبب ني  
اورغ کاليل جوگ! تافي فيتروس کات: کاف هق مو دوق کات تو؟  
اکو تاء ارتي! تاء دان سود، فرکتان فيتروس ني، فس ايم فون  
برکوکوق.
- 61 بيلا بويي ايم برکوکوق، عیسی فالیغ تیغوق کافيتروس، باروله  
فيتروس ترايغت فرکتان هق تون دي رويت ده کا دي دولو:  
بلوم فد ايم برکوکوق مالم ني، مو بق سبوت دافن اورغ، تیگ  
کالي، کات مو تاء کنل اکو!
- 62 لفس تو، فيتروس توبیت کي کا لوار، دوق ترياق تاغیس، کران  
سسل.
- 63 فس فواق هق جاگ عیسی دوق مغنجیغ ماین کا دي، دغن کوم  
کاتیق. فواق ني امبیق کاین فکوف مات عیسی، فس تان دي لاگو  
64 ني: مو فندي رويت فرکارا ۲ هق مات تالیه نمف، بوکن؟ مو  
رویتله، سیاف دي دوق تمفر مو؟  
65 فس دي کیچیق هینا کا عیسی بايق فرکارا لاکي.

### عیسی دوق دافن جملیس کتوا ۲ یهوي

- 66 بيلا سمفي فاكي ايسوق، جملیس کتوا ۲ یهوي ماري  
برهیمفون سکالي، یاءیت سمو کتوا ۲ سکالي دغن امام ۲ بسر، دغن  
کوروا ۲ تورات. فواق ني فون سوروه باوا عیسی ماسوق دافن دي  
67 فس دي اوصول تان عیسی کات: کالو مو جاني المسيح، هق  
توهن جنجي نق ماري تو، مو رویتله! عیسی فون جواب:  
68 کالو اکو رويت فون، تنتو مو تاء فرچاي. کالو اکو تان اف ۲ فون  
69 مو تاء جواب! تافي لفس فد ني، اکو مائسي هق تورون دشرک

- ني ، نق دودوق دسبله کانن توهن هق مهاکواس تو!  
 70 فس فواق تو تان فول: کالو کیتو، سوغکوه کا بق مو جاي انق توهن؟ عیسی جواب: هق فواق مو کات تو، سوغکوه!  
 71 فس فواق تو کات: کیت تاءکنا چاري سقسي لاین ده. کیت دغر سندیری هق ني کیچیق سائي.

عیسی دوق دافن فمرینته کراجائن روم

باب 23

- 1 لفس تو، فواق کتوا ۲ سموا فاکت باوا عیسی کي مغبهاف فیلاتوس اورغ فمرینته کراجائن روم. فواق تو مغادوکا فیلاتوس کات: کیت تمو اورغ ني، دوق مغاجر رعیت ۲ کیت بري ساله،  
 2 دوق لارغ تاءسیر بري باير حاصلن کا مهاراج روم، فس مغاکو کات ني جادي المسيح، ساتو راج هق توهن هنتر ماري.  
 3 فیلاتوس فون تان عیسی: مو جادي راج اورغ یهوي سوغکوه، کا دق؟ عیسی فون جواب: هق تولن کات تو، سوغکوه.  
 4 لفس تو، فیلاتوس کات کا فواق امام ۲ بسر، سکالي دغن اورغ رامي هق دوق سیتو: کیت تاءتمو چاري کسلاهن داورغ ني!  
 5 تافي کتوا ۲ یهوي تمبه لاکي، کات: اورغ ني کي هاسوت سموا رعیت ۲ دغن فمأجران يي. يي کي مغاجر رعیت ۲ سرات نكري يهوديه، امبيق دنکري گاليل ماري سمفي کا کوت ني فول.  
 6 بیلا فیلاتوس دغر بالس تو، دي تان نق تاهو، عیسی اورغ نكري گاليل کا دق؟ بیلا دي تاهو کات عیسی دوق دالم نكري  
 7 گاليل هق راج هیرو، دي سوروه باوا عیسی کي مغبهاف هیرو، سبب فد ماس تو، هیرو تو دوق ار دکوت جروسليم جوگ.  
 8 هاوا دي تمو دغن عیسی بالس ني، راج هیرو فون براس سوک هاتي، سبب يي بیاس دغر چارا حال عیسی، فس دي براس نق تمو دغن دي لام ده.



- 9 ښي هارف نق بوليه تيغوق فرکارا فليق ، هق عیسی بوات .  
فس ، ښي اوصول تان عیسی ماچم ۲ بوکو ، تافي عیسی تاءجواب  
سفاته هابوق .
- 10 تکه تو ، امام ۲ بسر دغن گورو ۲ تورات دوق دکت راج هیرو  
جوگ ، دوق ابو عیسی دغن هاتي فانس .
- 11 هیرو دغن عسکر ۲ ښي فون سوک مغنجیغ دغن بوات هینا کا  
عیسی . ښي امبیق کاین هق مهل نق ماکي عیسی سروف راج .
- 12 فس تو هنتر ښي کلیق کا فیلاتوس فول . فد هاري تو جوگ هیرو  
دغن فیلاتوس باءیک سمولا . ډولو دوا اورغ ښي تاءبرلاگ .

### فیلاتوس سوروه فیات عیسی

- 13 فیلاتوس فون فغکیل امام ۲ بسر ، کتوا ۲ اورغ یهوی ،  
دغن رعیت ۲ ، سوروه ماري برهیمفون ، فس ښي کات بالس ښي :  
14 فواق مو باوا اورغ ښي ماري مغانو کا اکو ، کات ښي اجر رعیت ۲  
بري سموا اورغ بوات ساله . اکو فریقسا ده اورغ ښي ، دافن  
فواق مو سموا ، فس اکو تاءتمو کات ښي ساله سروف مو ادو .  
15 فس ، راج هیرو فون تاءتمو سروف تو جوگ ، سبب ښي هنتر  
اورغ ښي کلیق ماري سینی فول . اورغ ښي فون تاءبوات ساله اف ۲  
هق سوغ بوليه بونوه .
- 16 سبب تو ، اکو سوروه فیات ښي ، فس لفس ښي کي .

### فیلاتوس لفس برابس ، حکوم عیسی

- 17 جادي ، فد هاري راي فسخر کنف ۲ تاهون ، فیلاتوس کنا  
بري لفس ساتو اورغ ساله ، بالس مان هق اورغ رامي مینتاء .  
18 تافي سموا اورغ رامي فاکت مناءوغ دغن سوارا درس ، بلغ ۲ کات :  
عیسی کي بونوه ، برابس لفس !

- 19 برابس ني، ماسوق ڪوق بوڪو تولوغ بوات هارو هارا دالم ڪوت
- 20 دغن بونوه اورغ. فيڪيران فيلاتوس نق لفس عيسى. ي فون  
ڪيچيڪ دغن اورغ رامي سڪالي لاکي.
- 21 تافي سموا اورغ تو ڪاچغ مناءِ و، ڪات: فاکو عيسى دڪايو امفت  
چابغ! بونوه ي دڪايو امفت چابغ!
- 22 فس فيلاتوس ڪيچيڪ دغن اورغ رامي ڪالي يغ ڪتيگ: تافي اورغ  
ني بوات ساله اف؟ اڪو تائموي بوات ساله هق فاتوت  
بوليه بونوه. اڪو نق سوروه فيات ي، فس لفس ي ڪي!
- 23 تافي سموا اورغ تو فون ڪاچغ مينتاءِ ڪهور درس لاکي، نق بري  
عيسى ڪنا بونوه دڪايو امفت چابغ، سهيگڱ فيلاتوس ڪنا  
جاتوه ڪوم ڪا عيسى، توروت ڪهنڊق اورغ رامي تو.
- 24 ي فون لفس اورغ هق ماسوق ڪوق ڪران بوات هارو هارا دغن  
بونوه اورغ، هق فواق تو مينتاءِ،
- 25 تافي ي سوروه اورغ ڪي بونوه عيسى ايڪوت ڪهنڊق اورغ رامي تو.

### عيسى ڪنا باوا ڪي ڪا تمفت بونوه

- 26 تغه فواق تو باوا عيسى ڪي ڪا تمفت بونوه، ي تموي دغن  
سئورغ نام صيمون، اورغ ڪوريني، هق ماري زدارت نق ماسوق  
دالم ڪوت جروسليم. فواق تو فون ترڪم صيمون، امبيق ڪايو  
امفت چابغ هق عيسى، فقسا سوروه صيمون فيڪول توروت  
بلاڪغ عيسى.
- 27 اڊ اورغ رامي لاکي، فاکت توروت عيسى ڪي. فس اڊ اورغ بتينا  
سفواق، هق ترياق تاغيس ڪران ڪسياغ بلس ڪا عيسى.
- 28 عيسى فون فالينغ ڪات ڪا ي: هي اورغ بتينا جروسليم! جاغن  
مو ترياق ڪسياغ بلس ڪا اڪوله! باءِ ڪ مو ترياق انتوق تبوه  
مو سنڊيري، فس انتوق انق ۲ چوچو مو.

- 29 کران دکت نق سمفي کسوساهن بسر. فد هاري تو سمو اورغ  
نق کات: موجورله اورغ بتينا هق مندول! موجور جوگ، اورغ  
بتينا هق تاءار انق کچيک دوق فيق!
- 30 فد هاري تو، عيسى کات، اورغ نق فغکيل کا بوکيت ۲ دغن باتو۲  
بسر، سوروه دي رونتوه تورون تينديه تبوه دي، بري ليندوغ  
فد کسوساهن تو.
- 31 فس عيسى کات لاکي دغن فاكي بنديغن: فد ماس لاني، فوهون  
کايو دوق سکر لاکي، فس اورغ دوق بوات جاهت سروف ني.  
کالو کيتو، ماس دافن بيلا فوهون کايو کچوت کريغ، تنتو  
نق تروق لاکي!

### عيسى کنا فاکو دکايو امفت چابغ

- 32 ار جوگ دوا اورغ هق ساله، کنا باوا کي بونوه سکالي
- 33 دغن عيسى. بيلا سمفي کا ساتو تمفت اورغ فغکيل تمفت  
تغکورق، دسيتوله دي فاکو عيسى دکايو امفت چابغ سکالي  
دغن دوا اورغ جاهت تو، سبله کانن سئورغ، سبله کيري سئورغ.
- 34 عيسى فون بردها کات: يا باف، امغونله کا فواق ني هق نق  
بونوه اکو، کاتيقي! دي تاء تاهو کات، فريواتن دي ساله سکت  
مان! فواق تو فون امبيق فکاین عيسى، بهاکي سام سنديري  
دغن کوچق اوندي.
- 35 ار اورغ رامي هق دوق تيغوق دسيتو. فس، کتوا۲ اورغ  
يهوني دوق مغنجيغ کا عيسى کات: اورغ لاین دي تولوغ بري  
سلامت بوليه. کالو دي جاني المسيح، دي هق توهن فيليه  
تو، بائیک دي بري سلامت تبوه دي سنديري!
- 36 فواق عسکر فون دوق مغنجيغ کا عيسى جوگ. دي ماسوق  
دکت، هولور اير بواه جابيت هق ماسم بري عيسى مينوم،

- 37 بلځ ۲ کات: کالو مو جاني راج اورځ يهودي سوځکوه ، تولوځله  
توبوه مو سنديري ، بري سلامت !
- 38 اډ جوگ ساتو نوتيس داتس کفلا عيسي ، هق توليس کات:  
اينيله راج اورځ يهودي .

### اورځ ساله سئورځ عيسي امفون ده

- 39 سئورځ دالم دوا اورځ ساله هق کنا فاکو سکالي دغن عيسي  
تو ، سومفه ماکي کا عيسي کات: ها ! مو جادي المسيح راج  
کيت کا رق؟ باءاف مو تاءتولوغ توبوه مو سکالي دغن اکو کدوا  
ني ، بري سلامت؟
- 40 تافي اورځ ساله سئورځ لاکي تو ، تکه سائين دي کات: مو تاء  
تاکوت کا توهن که؟ کران کيت کنا حکوم سروف دغن دي جوگ .
- 41 فس حکوم هق کيت عاديل ، جاني بالسن هق سوځ دغن  
کسلاهن کيت ، تافي اورځ ني ، دي تاء بوات ساله اف ۲ !
- 42 فس ، دي فالينځ کا عيسي کات: يا عيسي ، بيلان توان امبيق  
فرينته جاني راج ، ايغثله کا امب کاتيق !
- 43 عيسي فون جواب کا دي کات: دغرله باءيك ۲ هق اکو نق جنجي  
ني . جق دهاري ني ، مو نق دوق سکالي دغن اکو ، دتمفت  
کسوکاڼ تو !

### عيسي سود پاوا ، ماتي

- 44 لبيه کورځ فوکول دوا بلس تغه هاري ، جاني گلف هابيس  
سرات نکري تو ، سمفي فوکول تيگ .
- 45 تکه متهاري گلف تو ، کائين تابير هق دوق تيبينځ دتمفت  
سوچي دالم بيت المقديس ، تيبا ۲ چاريق دوا .
- 46 فد ماس تو فون عيسي کات: يا باف ، اکو سره روح کو کفدمو !

بيلا سوده كات بالس تو، پاوا دي فون، سود.

- 47 كفلا عسكر ۲ هق دوق جاگ دسيتو، تيغوق كجادين ني. دي فون فوجي توهن: فس كات: تنتوله اورغ ني تاء ساله اف ۲!
- 48 اورغ رامي هق دوق برهيمفون دسيتو، بيلا دي تيغوق كجادين ني، دي فون كليق كا رومه، بلغ ۲ دوق لوروت دادا، جاي تندا سوسه هاتي.
- 49 سما اورغ هق كدل رغن عيسى دوق تيغوق جاءوه ۲. فواق بتينا هق توروت عيسى ماري رنكري كاليل فون، دوق سكاللي رغن اورغ تو.

### اورغ تاروه مائت عيسى دالم قبور

- 50 ار سئورغ نام يوسف، اورغ ارامتيا، ساتو بندر هق اورغ يهوي. اورغ ني هاتي بتول، فس دي دوق ننتي ماس توهن نق امبيق فرينته رغن سمفرن.
- 51 سوغكوه فون، يوسف ني سئورغ دالم جمليس كتوا ۲ يهوي، تافي دي تاء ستوجو رغن چاداغن فواق تو نق حكوم عيسى. دي فون كي مغيراف فيلاتوس، مينتاء مائت عيسى.
- 52 لفس تو، دي كي امبيق مائت نورون، بوغكوس رغن كائين فوتيه، باوا كي تاروه دالم قبور، هق فاهت ربوكيت. قبور ني، تاء بياس بوبوه مائت لاكي.
- 54 هاري تو، سما اورغ دوق برسيف انتوق هاري ميغكو، هاري هق اورغ يهوي كا برهنتي كرج. فرياغ تو، نق ماسوق ده هاري سبتو.
- 55 فواق بتينا هق ماري سكاللي رغن عيسى تو، توروت يوسف كي كا قبور جوگ، فس تيغوق بالس مان لتق مائت عيسى تو.
- 56 لفس تو، فواق بتينا سائي، كليق كي چاري مييق واغي، رغن فركاكس ۲ نق بوبوه مائت عيسى. فس، فد هاري سبتو، دي

برهنٽي کڙج ، تاء بوات اف ۲ ، ايکوت حکوم اورغ يهوني .

### عيسي هيدوف کليق فول

### باب 24

- 1 فد هاري احد ، فرياغ دينهاري ، فواق بتينا تو کي کابور باوا<sup>۹</sup> فرکاکس ۲ هق يي چارغ تاروه تو .
- 2 با سمفي دسيتو ، يي نمفق باتو بسر ، هق دوق کاتوف فينتو
- 3 قبور ، ترکوليغ توبيت ده . يي فون ماسوق دالم ، تافي تاء<sup>۹</sup> تمو دغن مایت .
- 4 تکه يي دوق تيغوق ۲ تاء<sup>۹</sup> اره نق کامق ، تيبا ۲ نمفق دوا اورغ دوق دکت فواق يي . فلکين اورغ ني برسینر بانر .
- 5 اورغ بتينا فون سيوکور سوسوف موک کا تانه ، کران يي تاکوت فس دوا اورغ ساء<sup>۹</sup>ني کات کا يي : باء<sup>۹</sup> اف مو ماري چاري اورغ هيدوف دتمفت اورغ ماتي ؟
- 6 يي تاء<sup>۹</sup> دسيني ، يي بگکيت ده ! مو تاء<sup>۹</sup> ايغت که ، هق يي رويت کا مو دولو ، تکه يي دوق دنکري کاليل ؟
- 7 تکه تو ، يي رويت کات : اکو ، مائسي هق تورون دشرک ني ، مستي کنا جاتوه دالم تاغن اورغ بردوسا ، کنا فاکو دکايو امفت چابغ ، فس ماسوق هاري يغ کتيگ ، اکو نق هيدوف کليق فول !
- 8 با دغر ، باروله اورغ بتينا تو ايغت فرکتان عيسي .
- 9 فواق يي فون تيغگل قبور ، کليق کي رويت کا صحابة ۲ عيسي سبلس اورغ تو ، دغن سمو اورغ هق دوق سکالي دغن يي .
- 10 فواق اورغ بتينا ساء<sup>۹</sup>ني ، نام يي مريم مقدالا ، يحانه ، دغن مريم مق يعقوب ، دغن ساء<sup>۹</sup>ين ۲ يي هق ماري رويت حال ني
- 11 کا صحابة ۲ عيسي . تافي صحابة ۲ عيسي تاء<sup>۹</sup> فرچاي کا اورغ بتينا ، کات چريتا دوغيغ ساج .
- 12 تافي فيتروس باغون هوغلک کي کا قبور جوگ . با سمفي ، يي

جغوق تیغوق دالم قبور، نمفق کلاين باروت مایت دوق سروف  
سدیا. لفس تو، یی کلیق کا رومه، دغن براس حیران اتس  
کجادین نی.

### دوا اورغ برجالن کا کمفوغ عماوس

- 13 فد هاري تو جوگ، ار دوا اورغ مرید عیسی، برجالن کلیق  
کا کمفوغ یی، نام عماوس. کمفوغ تو دغن کوت جروسلم لبیه  
کورغ سبلس باتو.
- 14 تغه ۲ دوق کی تو، یی کیچیق چارا حال سموا فرکارا هق جایی  
اتس عیسی.
- 15 تکه یی دوق کیچیق دوق چریتا کی ماری، تییا ۲ عیسی سندیری  
ماسوق رکت، برجالن کی سکالی دغن یی.
- 16 تافی توهن تاء بری مات یی کدل دغن عیسی.
- 17 فس عیسی تان یی کات: تغه جالن سانی، مو دوق چریتا  
چارا حال اف؟ دوا اورغ تو فون برهنتی سبتر. موک یی  
نمفق سروف سوسه هاتی.
- 18 سئورغ هق نام کلیوفس جواب: سموا اورغ هق ماری زیاره کوت  
جروسلم تاهو ده، کجادین دالم تیگ امفت هاری نی! گامق  
توان نی سئورغ ساج، هق تاء تاهو لاکی!
- 19 عیسی تان فول: کجادین اف؟ دوا اورغ تو جواب: چارا حال  
عیسی، اورغ نصره تو. یی نبی هق بولییه مشاجر، بولییه بوات  
باپق فرکارا فلیق، دغن کواس بسر. هق توهن کات مولیق،  
فس سموا اورغ برکنن جوگ.
- 20 فس، امام ۲ بسر دغن کتوا ۲ کیت کی ایگت یی، بری جاتوه  
حکوم یونوه فاکو رکایو امفت چابغ.
- 21 تافی دولو، کیت ار هرافن یی نق بری بغسا اسرائیل کیت  
سلامت. فس، سا لاکی، هاری نی جایی هاری یغ کتیگ لفس

- 22 فد عيسى ماتي تو. فس لاگي، اورغ بتينا هق دالم فواق کيت بوات بري کيت حيران جوگ. ديني هاري، هاري ني، دي گي کا قبور عيسى، تافي تاءتمو دغن مایت.
- 23 بيلا دي کليق قبور، دي رويت کات، نمفق سروف ملائكة ۲ هق رويت کا دي کات عيسى هيدوف ده.
- 24 لفس تو، فواق کيت دوا تيگ اورغ گي کا قبور، تيغوق سروف دغن هق اورغ بتينا تو دوق رويت. فواق کيت تو فون تاءتمو دغن عيسى جوگ.
- 25 بيلا دغر ده هق دوا اورغ تو رويت، عيسى کات کا دي: باءاف مو بودوه؟ باءاف مو بري لمبت ماسوق هاتي، هق نبي ۲ دولو
- 26 رويت؟ دالم کتاب نبي ۲ تو کات، المسيح هق جنجي تو، مستي کنا تريما کسيقسائن ني دولو، باروله نق بوليه فريغکت مليا هق دي!
- 27 لفس تو، عيسى هوري معنا سموا ايات ۲ دالم کتاب چارا حال دير دي، امبيق دکتاب نبي موسي دولو، لفس تو، کتاب سموا نبي ۲ لائين.
- 28 بيلا سمفي دکت کمفوغ هق دوا اورغ تو، عيسى بوات نق گي
- 29 لاگي، تافي دوا اورغ تو اجق دي کات: باءيك برهنتي دغن امب سيني دولو، کران هاري نق گلف ده! عيسى فون برهنتي درومه اورغ تو.
- 30 بيلا تيگ اورغ تو دوق ماکن ناسي سکالي، عيسى امبيق روتي اوچف تريما کاسيه کا توهن، فس چوبيق روتي بري کا دوا
- 31 اورغ تو، باروله مات دي بوليه کتل عيسى. عيسى فون راءيب ساللو.
- 32 دوا اورغ تو فون کيچيق سام سنديري: سابيت هاتي کيت براس بدبر فون، تکه دي دوق کيچيق دغن کيت تغه جالن، فس تکه دي دوق هوري معنا کتاب ۲ تو!



- 33 فس، دي باغون ڪي سلاو، ڪا جروسليم فول. دجروسليم تو،  
 ٻي تمو دغن صحابة سبلس اورغ، دغن سموا اورغ هق دوق  
 سڪالي دغن صحابة ۲ تو.
- 34 فواق تو تغه دوق ڪيچيق سام دي ڪات: ربي عيسى هيدوف  
 ڪليق سوڱوڳوه. دي بري نمفق ده ڪا صيمون!
- 35 فس، دوا اورغ هق بارو سمفي سائي رويت حال دي تمو  
 دغن عيسى دتغه جالن، فس بالس مان عيسى بري ڪنل ڊيري  
 دي دغن چوبيق روتي تو.

### عيسى بري نمفق ڪا فواق صحابة دي

- 36 تغه دوا اورغ تو دوق رويت چريتا ني، تيبام عيسى دوق  
 برڊيري دافن دي ڪات: سلامتله فواق مو!
- 37 فواق تو فون ترڪجوت، دي براس ڪتر ڪناليغ ڪات هنتو.
- 38 فس، عيسى ڪات ڪا دي فول: باءاف مو دوق بيمبغ دغن شك  
 هاتي بالس ني؟
- 39 تيغوقله، ڪاڪي تاغن ڪو هق سغوتي! چوب مو جامه ڪليه  
 سنڊيري! هنتو تاءار ڊاڪيغ، تاءار تولغ سروف اڪو ني!
- 40 عيسى ڪات بالس تو، دي هولور تاغن ڪاڪي بري فواق مريد
- 41 تيغوق. تڪه فواق تو دوق شك هاتي دغن حيران، تاءبراف
- فرچاي لاڳي، عيسى ڪات ڪا دي: ار ڪاف ڪاتيق، نق ماڪن ؟
- 42 فواق تو فون بري ايڪن فغڱم سڪرت ڪا عيسى.
- 43 عيسى فون امبيق ماڪن سلاو، دافن فواق تو.

### عيسى برشرح بلوم فد دي نائيڪ ڪا شرڱ

- 44 لفس تو، عيسى ڪات ڪا سموا مريد ۲ دي: تڪه اڪو دوق  
 سڪالي دغن مو، اڪو بياس رويت ده، بوڪن، ڪات سموا  
 فرڪارا هق توليس ده چارا حال اڪو، دالم ڪتاب نبي موسي،

دالم ڪتاب زبور، سڪالي دغن ڪتاب نبي ۲ لاءين، سموا مستي  
ڪنا جادي اتس ڪو!

45 لفس تو، عيسى بري چره فيڪيران فواق تو، بري بوليه فهم

46 سموا ڪتاب ۲ تو، ڪات: سوده توليس ده ڪات، اورغ هق

جادي المسيح مستي ڪنا سيقسا، فس ماسوق هاري يڻ ڪتيڳ  
دي نق بڻگيت هيڊوف ڪليق فد قبور.

47 فس لاڳي، توهن سوروه ڪي رويت خبر دي، مولا ۲ رڪوت

جروسليم دولو، فس سمفي سموا نڳري. خبرني ڪات، دغن

ڪران المسيح ني، توهن نق امفون سموا ڪسلاهن اورغ هق  
باليق هاتي توبه.

48 فس، عيسى ڪات، فواق مو نق جادي سقسى اتس سموا فرڪارا

49 ني. تافي مو ڪنا ننڍي دالم ڪوت جروسليم دولو، هيڳ

اڪو بري ڪا مو، ڪواس هق تورون دشرڪ، هق توهن باف ڪو

جنجي نق بري ڪا فواق مو!

### عيسى نايڪ ڪليق ڪا شرڪ

50 فس تو، عيسى اڇق فواق مريد ۲ دي سموا توبيت ڪي

سمفي ڪمفوڻ بيت عني. دسيتوله، دي اڱگيت تاغن تاده،

مينتاء سلامت اتس سموا فواق تو.

51 تڪه دوق تاده تو، دي فون ڪهور ۲ نايڪ ڪا شرڪ، ڪهور

سڱڻجاء وه دغن فواق تو.

52 سموا فواق تو فون فاڪت ڪليق ڪا ڪوت جروسليم، دغن

53 براس سوڪ هاتي. فس، دي دوق اولڻ ڪي ڪا بيت المقدس

ڪنف ۲ هاري نق اوچف شڪور ڪا توهن سعمور.